

Mateo Jesushuunoa Cununi

Jesucristo ahuun shunifo

Lc 3.23-38

¹ Un mato Jesucristohuunoa tsain shara tapi-mai. Ahuun shunifoan aton anufo un mato yoiqui tau huai. Ahuun shuni David yafi Abraham.

² Abraham facu Isaac ini.

Isaac facu Jacob ini.

Jacob facu Judá yafi ahuun yorafo ini.

³ Judápan facu Fares yafi Zara ini. Aton ahuari Tamar ini.

Fares facu Esrom ini.

Esrom facu Aram ini.

⁴ Aram facu Aminadab ini.

Aminadab facu Naasón ini.

Naasón facu Salmón ini.

⁵ Salmón facu Booz ini. Ahuun ahuari Rahab ini.

Boozpan facu Obed ini. Ahuun ahuari Rut.

Obed facu Isaí ini.

⁶ Isaí facu David ini. Nan David Israelifoan aton niaifocoin ipaoni.

David facu Salomón ini. Salomón ahuafin Uriaspan ahuin ipaoniquin.

⁷ Salomón facu Roboam ini.

Roboam facu Abías ini.

Abías facu Asa ini.

⁸ Asa facu Josafat ini.

Josafat facu Joram ini.

Joram facu Uzías ini.

⁹ Uzías facu Jotam ini.

Jotam facu Acaz ini.

Acaz facu Ezequías ini.

¹⁰ Ezequías facu Manasés ini.

Manasés facu Amón ini.

Amón facu Josías ini.

¹¹ Josías facu Jeconías yafi ahuun yorafo ini.

Nantianri Babilonia anoa niaifoan ahuun ranushumuafo nichini Israelifo rutushon atirifi ahuun mai ano ihuushonafoanno ahuun oinmatifo huanon. ¹² Chipofin Babilonia anoashu futsafori cainni.

Jeconías facu Salatiel ini.

Salatiel facu Zorobabel ini.

¹³ Zorobabel facu Abiud ini.

Abiud facu Eliaquim ini.

Eliaquim facu Azor ini.

¹⁴ Azor facu Sadoc ini.

Sadoc facu Aquim ini.

Aquim facu Eliud ini.

¹⁵ Eliud facu Eleazar ini.

Eleazar facu Matán ini.

Matán facu Jacob ini.

¹⁶ Jacob facu José ini.

José ahuin María nan Jesús ahua ini. Jesús Upa Diosin catonni nocon Numamisi inon. Nan non Cristoran huamisi. ¹⁷ Abraham ahuun funafo catorce ahuun unutani David ini. David ahuun funafori catorce ahuun unutani Babilonia anoshon ato achinifo ato mai ano inonfo. Nanfoan ahuun funafori catorce ahuun unutani Cristo cainni.

Jesús cainni

Lc 2.1-7

¹⁸ Jesucristo cainfin iscaniquin. José María yoini, —Non fiananon, —ishon. Ascafia fiananfo-taima María man facu nanua ini. José ayamafian Diosin Yoshin Sharapan nanumana. ¹⁹ Ascashon José Dios tanasharacoinshon ahuun chain ahuin

rafini huacasmaquin yorafoan ointaifi yoicasmani. ²⁰ Nanscara ahuun nomuranshon shinanfiaino ahuun namapan Diosin ahuun oinmatinin afu nai muran imisi aqui oshon yoiquin isca huani, —José minfin David funaquin. Ascacun shinanchacaquima María fihuu. Nan facu nanuafin Diosin Yoshin Sharapan nanumanaquin. ²¹ Ascan nan caianofin anuqui Jesusran min huashquicain. Nantonmain ahuun yorafo chaca soashofain ato numashquiamaiton, —ishon yoini. ²² Diosinhuunshon inon pacoai yoimisifoan cununifo cuscan man aaquin. ²³ Nanfoan cunuquin isca huani,

“Nicapon. Ainfo funuoma tosa afu iyamafiamsi facu nanushquin. Caianno furonanfacu iishquin. Ahuun anufin Emanuel (Onicoinnin tsainman Diosin nofu icaran) ishquiquin,”

ishon Dioshuunshon inon pacoai yoimisi cununi.

²⁴ Ascaino José moinacahuatan nan Diosin oinmatinin afu nai muran imisi yoia cuscan María fiini. ²⁵ Fiifiashocai afu ipaonima furun caiyain chain. Ascashu furun caincun José anuqui Jesusran huani.

2

Nocofunu tapicoianfo fari oaiquirinoashu Jesús oinpai funifo

¹ Ascano Herodes niaifoaitian Jesús Belén anoashu cainni. Nan Belén Judea muran ini. Nantianri fishifohuunoa tapicoianfo fari oaiquirinoashu fucani Jerusalén ano noconifo. ² Ascano nococashon ato yocanifo,

—Raniashumun a facu caianquin Judiofoan aton niaifo ishquiai. Non fishi oianhuunshon non tapia facu caincun. Man nonfin ahuun fishi fari oai aria oianquin. Ascacufin non aqui unimai oaquin. Min nocon niaiforan ishon oinpai non oaran, —ishon ato yocanifo.

³ Ascaifohan nicaí Herodes ahuun ointi fucashriscatani. Jerusalén anoa yoraforifi Herodes icai cuscan arifi muunifo. ⁴ Ascacun ahuun yorafohuunshon Diosin cufimisifoan niaiffo yafi Moisés cununi cuscan tapimamisifo Herodes ato yoimaquin isca huani, —Uqui fucahuun, —ishon ato yoimanano aqui fuaifohan ato yocaquin —¿Raniashumun Cristo cainshquiquin? —ishon Herodes ato yocani. ⁵ Ascaiton cumacaquin, —Belén Judea murannoashu cainshquin, —nannori Diosinhuunshon inon pacoai yoimisisfoan cunuquin isca huani.

⁶ “Belén anoafoan ua nicasharacahuun. Maton mai Judea muran. Maton pushu ichapayamafiano nannoashu niaifo uhuapacoin cainshquin. Uhuun yora Israelifohan aton cushumisi iishquiran,”

icashu cununi.

⁷ Ascacun Herodes a fishifohuunoa tapicoianfo tsoa yoitama tsain ato fomaquin isca huani, —Fucahuun. Un matofu tsainon, —ishon ato yoimani. Ascano nocotoshiaifohan ato yocaquin, —¿Ahuutianmun man fishi oinquin tau huaquin? —ishon ato yocaiton. Tapimanifo ahuutianmain oinqui tau huafoquin. ⁸ Ascashon aton yoini, —

Belén ano focashon facu funatacahuun. Fuchicashon nasofuratan ua yoi fuushcaquin. Urifi un ahuun noicanon, –ishon Herodes ato yoini.

⁹⁻¹⁰ Ascano niaifoan ato yonoa cuscan nicatan fishifohuunoa tapicoianfo fonifo. Focaquin oianfo fishi fari oaiquirinoashu oaiton oincani unimacoinnifo. Ascatan muufocaquin oianfo facu raca manaon nituni. ¹¹ Ascaiton oincani pushu muran iquifainshon facu yafi ahua María fuchinifo. Ascashon ratoconun mai chachishon facu yoinifo isca huaquin, –Minfin fasi sharastacoquin. Min nocon Ifo, –ishon yoinifo. Ascacatan aton mao fupucashon ahuaara chicoin inancoinnifo. Oro inanfain ahuun ininti shara inanfain ininti sharacapa futsa ahuun anu mirra nanri inannifo. ¹² Ascashu nanno oshayofoan aton namapan Diosin ato yoiquin isca huani, –Afanan Herodes ari foyamacahuun. Fai futsan mato mai ari fotacahuun, –ishon Diosin ato yoini. Ascacuai Jerusalén ano fonifoma.

José futan María furun Belén anoshon Egipto ano ichoquinifo

¹³ Man fishihuunoa tapicoianfo atom-aquinoashu foafono Diospan oinmatinin afu nai muran imisi José ahuun namapan yoiquin isca huani, –Funinaca huahuun. Nan facu yafi ahua Egipto ano iyoricatahuun. Ascashu nanri iyohuu nan un mia afanan yoiatian. Nan Herodes facu funaiqui rutushquin, –ishon Diospan oinmatinin José yoini. ¹⁴ Asca huaino moinacahuatan facu ahua futan yamu Egipto ano ichoquinifo. ¹⁵ Ascashu nanno iyopaonifo

nan Herodes naitian. Ascacun Diosihuunshon inonpacoai yoimisiton cunushoni isca huaquin,

“Unfin uhuun facu Egipto anoa afanan yoimanicain,”

ishon yoini cuscacoin man aaquin.

Herodes ahuun ranushumuafu yononi facumishtifo rutunonfo

¹⁶ Ascano fishihuunua tapicoianfo fai futsan foafo nicai, —Ua paraforan, —icashu Herodes fasi sinacoinni. Nan fishifohuunua tapicoianfoan yoiafo man fari rafu caano fishi oinquin tau huafo. Ascacun Herodes ranushumuafu yononi, —Belén anoafu yafi a chaima icafoan aton furo-nanfacufo fari rafu yafu non yomumishti rutuqui cuyotacahuun, —ishon ato yononi. ¹⁷⁻¹⁸ Ascano

“Ato nicafo Ramá anoashu uaicani aton facuhuunoashu uaiyanan shoraras-cafoan nicacaquin. Aton ointi main huamapaicaquin, ‘Uaiyamacahuun,’ ato huafainfono aton facu manocani unupainifomaran,”

ishon Jeremías Diosihuunshon inonpacoai yoishomisiton cununi cuscacoin man aaqui.

¹⁹ Ascashu man Herodes naano Diosin oinmatin afu nai muran icaton José ahuun namapan yoiqui isca huani, ²⁰ —Moinacahuahuu. Facu yafi ahua afanan Israelifo muran ato nasoquishquin. A facu rutupaimisifo man naafoquin, —huani.

²¹ Ascaino moinacahuatan José ahua yafi furun Israeli mai ano afanan ato iyoni. ²² Caaquin nica Herodes man naano ahuun facu Arquelao Judea murannoa niaifo nicai José musuni. Ascaiton Diosin oinmati afu nai muran imisiton afanan

ahuun namapan yoini, —Judea muran caquima futsanori catahuun, —huani. Ascano Judea muran catama Galilea anori fonifo. ²³ Ascashu Nazaret pushurasi muran fonifo. Diosihuunshon inon pacoai yoimisiton nannori cunuquin isca huani, “Cristofin Nazarenon ishquiquin,” ishon cununi.

3

Nan ato unu muran iquimamisi Juan tsoa istaipama ano ipaoni

Mr 1.1-8; Lc 3.1-9, 15-17; Jn 1.19-28

¹ Ascatan man fari ichapa finoanno nan Juan yorafo unu muran iquimamisi tsoa istaipama Judea ano cani. ² Ascano nannoshon ato yoiquin isca huani, —Nantifi yorafoan ua nicacahuun. Maton chaca shatucoincashion Diosin tsain nicacoincahuun. Samamashta Diosin mato yonoshqui oiquin, —ishon Juanpan oi ashcafinin ato yoini.

³ Nan Isaías Diosihuunshon inon pacoai cuscan yoimisi ipaoni. Nanton Juanhuunoa yoini isca huaquin,

“Tsoan istaipamashon Diosin yonoo cuscan oi ashcafinin yoiquin isca huanon-pacoin, ‘Nocon Ifo nocoqui ooshquin. Ascacun itisharacahuun. Maton chaca shatucoincahuun,’ ”

ishon Isaías Juanhuunoa cununi.

⁴ Ascano camello inapan ahuun rani sahuuti huashon Juanpan sahuua ini. Ascashion yoina fichin aqui nanushumuni. Ascatan ocutsuru pifain afuchi fona ayani. ⁵ Ascano Jerusalén

anoafo yafi unu Jordán ano icafo non Judea muran icafori ahuun tsain nicapaicani aqui funifo. ⁶ Ascashon aton chaca shatupaicaquin yoiaifoan Juanpan unu Jordán muran ato iquimapacuni afanan ipaoni cuscan huatama ismanonfo.

⁷ Ascaino Fariseofo yafi Saduceofo Juanqui funifo yorafo ato unu muran iquimanaiton oin fucani. Nanfori Israelifo ini. Ascaiton oinquin Juanpan ato yoini isca huaquin, —Manfin rono paupaton facu cuscaracoinfoquin. Icoinra huayamaifoan Diosin atoqui sinaquin ato omitsiscapanonfo. Ascan manfin omitsiscapanacafo muran focasmafiacui maton chaca man shatupaima.

⁸ Ascacun chaca shatucoincashon Diosin mato yoia cuscan nicacoincahuun. Man ipaoni cuscan ayamacahuun. Man ascaiton yorafoan ointirofo man afanan chaca huapaitama Dios fusti man tanasharaiton.

⁹ Ascashon maton nomuran shinanquin isca huayamacahuun, “Nonfin Abraham funafo non ahuun caiforiquin. Diosin Abraham yoiyotiani cuscan nocorifi ashotiro. Ascan Diosin noco onaintimashquimaran,” ishon anori shinaryamacahuun. Diosin onihuapaiquifin na unu cusumunnoa toquirifo Abraham ahuun funafo oni huatiroquin. ¹⁰ Fana fimi sharayamaiton ifoan ahuun tapo nantifi ruratinin shatuquin cuyoshon chi muran potatiro coi futsunon. Nanscarifiai natianri Diosin man itishara chaca shatutama man isharayamacaiyaiton mato omitsiscamapacushquin.

¹¹ Ascacun un mato unu muran iquimapacua maton chaca shatucoinshon natian Diosin

tanasharashon man ismanon. Ascafia futsa matoqui chipo oi. Naantofin ua fasi finoncoianquin. Ahuamamishti huatiro. Nantorifi ahuun Yoshin Shara mato ya rafumapacunaca. Ascano ahuunshon maton nomuran man shinansharanon. Matofu rafuano nantifi ahuara chacafo ahuunshon shatuashu a cuscara shara man inon. Ascan uncai a cuscarama. Un ahuara shara huahuu rafanancai un ahuun oinmatima. Ascatama uhuun ramapaiyamainoricai un ahuun oinmati icuanama. ¹² Ascano naantorifi chipo a icoinra huafo yafi a nicacasmaifo ato pashcanan huaashquin. Nan icoinra huafosi a icari ato ihuicoinsquin afu isharapacushanonfo. Ascan nan nicacasmamisifo chi urumanhuan muran ato potai anoashu omitsiscai unupacunacafomaran, –ishon Juanpan nan Fariseofo yafi Saduceofo yoini.

Jesús unu muran iquimani

Mr 1.9-11; Lc 3.21-22

¹³ Ascaino Jesús Galilea anoashu unu Jordán ano cani. Nan Juanpan ato unu muran iquimana nanno cani naanrifi iquimanon. ¹⁴ Ascashu aqui nocoaiton Juanpan Jesús yoini, –Uacaiarocon mian acafin shara icuanaquin, –huaiton. ¹⁵ Jesús cumani, –Upa Diosin noco yonoa cuscan fusti nantifi non aca shara itiro. Ascan natian ua iquimahuu, –huaiton. –Ascan min ua yoiai cuscan un mia unu muran iquimairan, –ishon Juanpan yoini. ¹⁶ Asca huatan Jesús unu muran iquimana cainna cahuan mapuinifoanni. Ascatapaiyaino Dios ica ariashu nai fupuini. Nai

fupuicaino Diospan Yoshin Shara ruhui cuscara Jesusqui fotopacu cahuani. ¹⁷ Ascano nanno niafoan nai murannoa Upa Diosin ahuun oi nicanifo yoiquin isca hwaiton, –Nan uhuun Facu un catoan. Un fasi ahuun noi. Un fasi aqui unimacoinran, –ishon Apa Diosin yoini.

4

Yoshin chacanun Jesús chaca huamapaini *Mr 1.12-13; Lc 4.1-13*

¹ Ascano Jesús Diosin Yoshin Sharapan tsoa istaipama ano iyoní. Nannoshon nan yoshin chaca Satanás cuarenta oshatan chaca huamapaifainni. ² Nan cuarenta oshatan piqí tununi. Ascashu fasi fonaincoinni. ³ Ascaino nan yora chaca huamapaimisi aquí nocoshon yoini isca huaquin, –Min Diospan facumainquin na toquirifo misi onihuahuu, –ishon Satanás yoiáiton. ⁴ Jesús cumani, –Noncai misi fustihuunoashu ipatiroma. Diosin tsain fusti non yopacoin. Nan noco yoia cuscan fustihuunoashu non isharatiroquin, –hwaiton.

⁵ Nicaquin Satanás Jesús Jerusalén pushurasi shara Diosin ahuun yorafofu imisi ano iyoní. Nan Israelifoan aton Diosfu tsainti pushu pumancaya cuyacoin iyoshon yoiquin, ⁶ –Minmain Diospan facuquin nuriashu pacucaintahuun. Diosin tsain mihuunoa cununi isca huaquin,

“Diosifin ahuun oinmatifo afu nai muran icafo yonoiquin min pacuaiton mia cushunonfo. Min tauri toquirifoquin rutunonma mia achinonfo,”

nannorifi Diosin tsain mihuunoa cununiquin, — ishon Satanás yoiaiton. ⁷ Afanan Jesús cumani, —Ascafia Diospan tsain cununiri isca huaquin, Ahuara musunicoin huaquin shinanyamacahuun uatsi Diosin cushuiquin ishon. Ascacun asca huayamahuu ishon cununiran, —Jesús huani.

⁸ Ascaiton afanan Satanás Jesús machi cuyamamaquin iyoshon nan manifoti sharashtacoin oinmani. ⁹ Ascashon yoini, —Oinpon Mian ratocounun mai chachishon ua yoiquin, “Minfin uhuun Ifoquin,” mian huaitofin nan na maitio un mia inantiroquin, —ishon yoiaiton. ¹⁰ Afanan Jesús cumaqui, —Diospan tsain cununiri “Nan nocon Ifo Diosin fustifin non ratoconun mai chachishotiroquin. Nan fustimain nocon Ifocun,” ishon cununi. Ascan umaquinoashu cariscatahuun Satanás, — ishon Jesús yoini.

¹¹ Asca huaino Satanás Jesusmaquinoashu caino Diosin ahuun oinmatifo afu nai muran icafo aqui fotonifo pimashcaquin.

*Jesús Galilea anoshon ato tapimaquin tau huani
Mr 1.14-15; Lc 4.14-15*

¹² Ascashu nan Juan ranushumuafoan cunu muran iquimanafu nicatan Jesús Galilea ano nasoni. ¹³ Nan Nazaret anoashu pushconi. Nannoashu Capernaum ano cani atofu iyoicai. Nan Galilea ian cusumunri Capernaum ini. Nannori mani rafutan ato mai Zabulonfo yafi Neftalifo icafo. ¹⁴⁻¹⁶ Jesús nanno inon pacoai cuscan nan Isaías inon pacoai yoimisiton ahuunoa cunuquin isca huani,

“Zabulonfo yafi Neftalifo Galilea ian ano icafo. Nanno aton mai. Unu Jordán ocuma futsa. Nannori Dios icoindra huamafo atofu icafo. Ascashu nanfo faquish muran ica shinantsafo. Ascafia samamashta oianfo shafariscatani cafiscashqui. Nanscarifiai numamisimaisi omitsiscapanacafo muran focuanafo. Ascacun Cristo atoqui nocorisca ato numashquiran,”

icashu atohuunoa cununi.

¹⁷ Nannoshon Jesús ato yosiquin tau huaquin isca huani, —Nocon Ifo Diosin matoqui samamashta nocoyoi. Ascacun maton chaca shatucahuun. Chaca huatamarocon Diosin tsain nicacoincahuun, —ishon Jesús ato yoini.

Jesús rafu non rafuri nushumisifo ato cunani afu fononfo

Mr 1.16-20; Lc 5.1-11

¹⁸ Ascano ato yoitan Jesús ianmanhuan cusumun cani. Caquin Simón chipocu Andrés futan nushutinin nushuaifoan ato ointoshini. Nan Simón ahuun anu futsa Pedro. Nan rafutafin nushumisicoin inifoquin. ¹⁹ Ascaiton ato yoiquin, —Ufu fucahuun. Manfin nushumisicoinquin. Man shiman ichaparasi nushutinin fia cuscan natian man uqui yora ichapa ihuushqui un aton Ifo inon, —ishon Jesús ato yoini. ²⁰ Ascaino nushuti huafaicani afu fonifo.

²¹ Ascashu chaimashta catan Zebedeo facu rafuri fuchini. Nan rafuri nanu rafu Santiago yafi Juan. Nan rafutan apa futan shasho naquishon nushuti icushaifoan atori yoini, —Ufu fucahuun,

—ato huaino. ²² Samamashta apa shasho naqui nichifainifocani afu fonifo.

Jesús yorahuanrasi ato yosini

Lc 6.17-19

²³ Ascatan afu foafoanno nantishon Galilea ano cahuancacaiquin. Judiofoan ichananti pushu muranshon Jesús ato Apa Diosin tsain shara yoiquin isca huafoanfafaini, —Itisharacahuun. Upa Diosin mato iquishquin oiran, —ishon ato yoifoafafaini. Ascashon pau futsa futsatapafaoan icaifoan ato caya huamani. ²⁴ Ascaiton Siria mai anoafaoanri ahuunoa nicacashon isinincaifo aqui ihuunifo ato cayahuamapacunon. Ascashon isipaunun icaiton caya huamafain yoshin chaca atomaquinoa potafain nisofori caya huamafain yoratiso charishi futsuari caya huamapaoni. Nantifi ato caya huamapacuni. ²⁵ Ascaiton yorafoan mufainifo. Atirifi Galilea anoashu fuaino atirifi Decápolis anoashu fuaino atirifi Jerusalén anoashu fuaino atirifi Judea anoashu fuaino atirifiri unu Jordán oquirinoashu fucatan Jesús mufainifo.

5

Jesús machi anoshon ato yosini

Lc 6.20-23

¹⁻² Yorahuanrasi aqui fuaifoan oin Jesús mapufaintan machi pochinin tsaoni. Nanno tsaono ahuunshon tapiafo a shinain caiton noco yosiquin isca huani.

³ —Tsoa futsan aton nomuran shinanquin isca huai, “Ufcái un isharatiroma. Un Dios yopacoinran,” icaiton

Diosin ato unimamashquin. Ascashu uhuun
Upa Diosin niaifo ano afu ipatirofoquin.

⁴ Ascan tsoara futsa uaiquin omitsiscafiashu chipo
unimatiro.

Diosin atohuun ramapaiquin aton ointi main
huamatiro.

⁵ Cacapaimisi itamarocon futsa ahua huamisima.
Mato ahuun nomuran shinanquin isca
huai, “Ufi apaiyai cuscan atama Diosin ua
amapaiyai cuscan fusti un atiroran,” ishon
shinanfafainaiton Diosin ato unimamatiro.

Nan cuscarafo Diosin yoiyotiani cuscan ato
inanshquin. Diosin icano arifi afu inonfo.
Ascashu nantifi ahuunari atonari iishquin.

⁶ Ascan nan ratoranfo Diosifu ipaiquin ahuun
tsain tapipaiquin finaifo a cuscara shara
iishcaquin.

Nan cuscarafoan fuchipaiyaifo cuscan Dios ato
imatiro a cuscara shara inonfo.

⁷ Ascan nan futsafohuun ramapaiquin ato shara
huaiton Diosin man tapia.

Ascacun nanrifi ahuun ramapaiqui a shara
huashopacunaca arifi unimanon.

⁸ Ascan nan Dios fusti tanasharashu ahuun nomu-
ran shinansharamisi.

Nan cuscarafoan chipo Dios ointirofo. As-
caiton Diosin ato ointi unimamashquin.

⁹ Ascan tsoan nan noicasmatanainfoan ato rau-
nan huaino afanan rau huantanano.

Nan cuscarafo Diosin yoiquin, isca huaqui,
“Min uhuun facuran,” ishon ato yoiaino fasi
unimacoinsheani.

¹⁰ Tsoa Diosin yonoa cuscan aiton futsafoan omit-
sisa huafainfoan tunua.

Nan cuscarafo Diosin ato unimamashquin.
 Ascashon nan Diosin niaifo icariafo nanfori
 atona iishquin.

11-12 Ascan futsafoan uhuunshon mato
 roaquin omitsiscamafain matohuunoa
 chani futsa futsatapafu yoifiaifoanno
 shinanchacayamacahuun. Mato omitsisca huaifo
 cuscan mato shunifori nan Diosin tsain yoimisifo
 omitsisca huapaonifo. Ascan man uhuunoashu
 omitsiscafiashu Upa Diosiqui man nocoaitian fasi
 sharacoin mato imashquin man afu ipashanon.
 Ascacun unimacahuun.

Jesús icoinra huafo sao yafi shafa cuscara
Mr 9.50; Lc 14.34-35

13 Ascan manfin nan nuno mai anoa sao cus-
 caraquin. Nami saomua shara payocotiroma.
 Nanscarifiai yora chacafo muran ishon marifi
 man ato shinanmasharatiro chaca huanonfoma.
 Ascan nami saomuamakai shara itiro. Paisma-
 coin itiro. Ascafi afanan nami shara iyamain-
 oricai saori shara itiro. Afanancai ahuashta
 itiro. Nanscara non potatiro puamanonfo.
 Nanscarifiai afanan man ua tanasharayamain-
 ocai matohuunshon tsoan ato chaca shatutiroma
 isharashquin. Man ua tanasharayamashu man
 funocointiro.

14 Ascafi manfin nan manifoti ato chasha
 cuscaraquin. Machi cuya mamaquinoa pushurasi
 fasi chaicushon shafacafi ointirofo. Onucai
 atiroma. Nanscarifi aquin man ua tanasharaino
 mato oinquin matohuunshon ua icoinra
 huatirofo shafacafi iishcaquin. 15 Nanscarifi
 aquin tsoancai faquishiano oinpaifiaquin
 lamparina tapa camaqui otashon cutipan

fupomisima. Ascatamarocon otashon tapa camaqui huatiro shafacafi tsaocun pushu muran iguicaquin oinsharanonfo. ¹⁶ Ascacun nantifi yorafo shara huacoincahuun. Man ato shara huai cuscan oinquin shinantirofo isca huaquin, “Diospan yorafoan fasi noco shara huafafaincani. Apa Diosin ato yosisharamisi. Asca aton Upa Dios fasi sharacoinran,” ishon shinantirofo. Anori shinancaquin maton Upa Dios nai muran ica yoitirofo isca huaquin, “¡Aicho! Upa Diosin tsoa futsacai mia cuscara sharama. Min nantifi finoncoianran,” ishon yoishquicani. Afanan yoitiro isca huaquin, “Dioshuunshon noco shara huashomisifo. Ascan aton Dios sharacoinran,” ishon yoishquicani.

¹⁷ Isca huaquin man shinan raca, “Moisés Diosin yononi cuscan cunushoni yafi Diosin tsain yoimisi futsafoan cununi cuscari nanfo Jesús noco nicamapaima. Nanfo noco potamapairan,” ishon raca man shinan. Anori shinanyamacahuun. Uncai Moisés yafi Diosin tsain yoimisi futsafoan cununi cuscan potapaiquimarocon man cununifo cuscan un huamashquin un oa. ¹⁸ Un mato shafacafi yoi. Diospan tsain cunushoni cuscan nannorifi Diosin yonoi. Ato yonoquin cunushopaoni cuscan nan fustishtacai funopacunacama. Nai yafi maitio cuyoyamainon nanscasi apanaca ahuun tsainri inonpacoai cununshoni cuscan nantifi fustishtacai cuyopacunacama aqui tau huani cuscan.

¹⁹ Ascan tsoa Diosin yononi cuscan fustishta potashu non futsafori potamashu Dios icano aacai ahuama itiro. Asciaquin tsoan Diosin tsain

nicasharafafainquin futsafori Diosin tsain shafacafi yosicun nan Upa Diosin icano niaifo patashari itirofoquin. ²⁰ Ascano nan Fariseofo non Judiofo aton niaifofo futsafoanri, “Nonfin fasi shara imisiran,” ifianmisishacaquin Diosin yononi cuscan tanacoianfoma. Diosin yononi cuscan huacoinmisifoma. Mancai ato finoanshuma Diosin yononi cuscan man huashuma Upa Diosin icano man nocopacunacama.

–Sinayamacahuun, –ishon Jesús ato yosini

Lc 12.57-59

²¹ Moisés nocon shunifo yononi cuscan man nicamisi isca huaquin, “Tsoa rutuyamacahuun. Man futsa rutucun niaifofo ano mato iyotiro matoro copiquiri namatirofo,” ishon Moisés nocon shunifo yononi. ²² Cayacafi anori yonofianicun un mato tsain futsa cayacafiri yoinon. Oinfain. Tsoa futsaqui sinaiton a niaifo ari iyotiro a onaintimanon. Ascan tsoan futsaqui tsain chaca huaiton isca huaquin, “Mincai ahuama. Min ahua tapiamaran,” ishon yoiaiton niaifofo ari iyotiro a onaintimanonfo. Ascafia tsoan futsa chaca huai isca huaquin, “Minfin mapo chacaquin. Min nisoncoinran,” huaiton Diosin a omitsiscapanacafo muran nan chi muran potatiro anoashu capashononma.

²³⁻²⁴ Ascacufin man Dios cufiaitian nantianri man shinanquin isca huaquin, “¡Ohua! Un futsa chaca huaran,” ishon shinancun. Afanan Dios cufitamarocon iquisi nan futsa min chaca huaa ano catahuun. Aqui nocoshon yoisharahuu mia rauhuanon. Asca huano afanan min nasotiro Upa Dios cufishquin.

²⁵ Man futsa nifishon matoqui nocoaiton isca huaquin, “Min ua nifian cuscaai mian inanma. Natian un mia niaifo ano iyoiran,” ishon mia yoicun. Afu caquin niaifo ano nocoataima rufoto aroshararisca huahuun. Asca huaiyamaiton mato niaifo ano iyotiro. Nocoshon niaifoan ranushumua yotiro, “Na nocofunun futsa nifian cuscan inanma. Ascan cunu muran iquimatahuun,” huatiro. ²⁶ Un mato icon yoicoin. Mato iquimanano man cainritiroma nifian cuscan atifi inanshuma. Nanscarifi aqui man Dios chaca huamisiquin. Oataima arorisca huahuu mato omitsiscahuapanonma.

—Maton ahuinma oincaquin chotapaiyamacahuun, —Jesús ato huani

²⁷ Moisés nocon shunifo yononi cuscan man nicamisi isca huaquin, “Maton ahuinma chotayamacahuun. Ainfofoan maton funuma chotamayamacahuun,” ishon yononi. ²⁸ Aafin iconquin. Ascarifi un mato yoirifi huai. Tsoa ainfo ahuun ahuinma oinquin ahuun nomuran shinain, “Un nan ainfo chotapainonran,” ishon nannori shinanquin a chotacoin shinantsai. ²⁹ Ascan man oinquin man chaca huapaiquin maton furon ocuma futsa shara tsucashon potahuu afanan chacanonma. Man mumafiacun omitsiscapanacafo muran mia potacun nancai sharamafinquin. Ascaquimarocon man mumamafishu Dios icari nocoshon nanno afu ipashanon nan sharacoin. ³⁰ Nanscarifiai min mumiorishon min mucuman min ahuara min chaca huaiton, min mushtua shara icuana. Man mumafishu omitsiscapanacafo muran mia potacun

nancai sharamafinquin. Ascaquimarocon man mumamafishu Dios icari nocoshon nanno afu ipashanon nan sharacoin.

Nocofunu yafi ainfo ununantirofohuunoa Jesús ato yosini

Mt 19.9; Mr 10.11-12; Lc 16.18

³¹ Nocon shuni Moisés nocon shunifo yonoqui isca huani, “Tsoan ahuun ahuin unushquin iquisi cunushotiro isca huaquin, ‘Un afanan mia fipaima. Un natian mia unuiran,’ ishon cunushotiro.” ³² Nannori Moisés yonofianicun un mato tsain futsa yoinon. Ratoran futsan ahuun ahuin nocofunu futsa fu iyamafiaiton unuquin chaca huaino. Nan ainfoan nocofunu futsa fu fiananquin fasi chaca huai. Asca huaquin nan funu fu iqui shinantsai. Funumain afi unucun. Ascafia nan funun ahuin unua nan ainfo nocofunun fiuquin aarifi chaca huai. Asca huaquin nan ahuun ahuinma fu iqui shinantsa huai.

–Man yoitiani cuscan acahuun, –ishon Jesús ato yoini

³³ Nocon shuni Moisés afanan tsain futsa nocon shunifo yoini. Nanri man nicamisi isca huaquin, “Man Diosin yoitiani cuscan acahuun. Man Diosin yoitiani cuscan ayamashu nancai sharamafinquin,” ishon Moisés nocon shunifo yoini. ³⁴ Mato anori yoini. Un afanan mato yosinon nicacahuun. Yora futsafona yopaquin ato yoiquin, “Un mia yoia cuscan un acunma Upa Diosin ua onaintimatiroran,” ishon afanan anori yoiyamacahuun.

“Un mia yoia cuscan un acunma nantifi nai muranshon ua nicatiro Upa Diosin ua onaintimatiro-
ran,” ishon afanan anori yoiyamacahuun. Diosin
nai muran ica. Ascan anori yoiyamacahuun.

³⁵ “Un mia yoia cuscan un acunma nuno mai
anoa ua onaintimatiro-
ran,” ishon afanan anori
yoiyamacahuun. Nantishon mai Upa Diosinna.
Ascan anori yoiyama-
fain, “Un mia acunma nocon
pushurasi Jerusalén ano ua copitiroran,” ishon
afanan anori yoiyamacahuun. Nan pushurasi
Jerusalén nocon niaifocoin Diosina. ³⁶ “Uhuun
mapon un shinain cuscan un mia acunma ua
onaintimatiro-
ran,” ishon yoiyamacahuun. Ma-
ton shinanhuunshon maton fo fiso iyamarai osho
imatiroma. ³⁷ Ascan maton yora ahudara yoipai
ato yoihuu isca huaquin, “Un mia yoia cuscan
iconcoin,” iyamarai “Nan iconmaran,” ishon ato
yoicahuun. “Un mia acunma ahudara ua onain-
timatiro-
ran,” ishon anori yoiyamacahuun. Na
yoshin chaca Satanasfin chanimisicoquin. Ahu-
unshon yora anori yoitiro.

Tsoamain futsa copitiro Jesús ato tapimani

Lc 6.29-30

³⁸ Ascan nocon shuni Moisés afanan tsain futsa
nocon shunifo yononi cuscari man man nicamisi
yoiquin isca huanicun, “Futsa mia asca huaiton
niaifo ano min iyotiro mia copishonon. Min
furo ocuma futsa mia tsucacun copiquiri niaifoan
ahuun furo tsucamatiro. Ascan mia sutuquin
min shuta fusti tucucun niaifoan copiquiri ahuun
shuta fusti tucuntiroran,” ishon Moisés yononi.
³⁹ Nocon shunifo nannori yonofianicun un mato
tsain futsa yoiaiton ua nicacahuun. Tsoan mato

chaca huafia ato copiyamacahuun. Mato tapasaiton ato copitamarocon nanno nishohuun mia ocuma futsari afiaiton tunuhuu.

⁴⁰ Futsan mia niaifo ano iyocun min camisa mia fiainton min sahuuti cushtopari inanhuun.

⁴¹ Ascano ranushumuaton iyamarai futsan mato yonoquin isca huai, “Uhuun forusa kilometro fusti ua foshoicahuun,” ishon mato yonoaiton shinantaquima kilometro rafu foshohuun.

⁴² Tsoanran mato ahudara yocaiton ayashon ato inancahuun. Futsan mato yoiquin isca huai, “Ua inanyopun,” mato huaiton inanriscayocahuun. Fishcotama.

*—Mato noicasmafiaifoan atohuun noicahuun, —
ishon Jesús ato yoini
Lc 6.27-28, 32-36*

⁴³ “Ascashon naan maton yorafohuun noicoincahuun. Ascan a mato noicasmaifori copiquirifi ato noicasmacahuun,” ishon nocon shunifoan yoinifo cuscan man man nicamisi.

⁴⁴ Nannori yoifianifo un mato yoiquin isca huai, Naan mato noicasmafiaifoan atohuun noicoincahuun. Tsoan mato omitsisca huairi Dios cufishocahuun. ⁴⁵ Diosin fari onihuani yora sharafo yafi chacafori chashashonon. Nanscarifi huaquin Diosin oirifi onihuani nan yora sharafo yafi chacafori ato onihuashoni. Diosifin nan tanaifo yafi a chaca huaiforifi ato shara huamisi. Ascacun marifi nanscarifi huacahuun a mato shara huaifo yafi mato chaca huaifori shara huacahuun. Asca huaifin marifi man Diospan facucoinfoshon futsafori man ato ismatiro.

⁴⁶ A matohuun noiaifosi copiquirifi man atohuun noiaínocai aacai ahuama. Yora chacaforifi ascarifiaifoanno. Man ascainocai Dios mato yoima man shara huaran ishon. ⁴⁷ Maton yorafo fustisi man tsain shara yoiaino aacai ahuama. Yora Dios icoinra huaamafori nanscarifiaifoanno. Man ascainocai Diosin mato yoima “Man shara huaran,” ishon. ⁴⁸ Ascano maton Upa Diosin nai muranshon nantifi yorafo noia cuscan marifi nansca huacahuun. Upa Diosin shinansharamisi cuscan marifi shinansharacahuun.

6

*—Ahuuomafó atohuun ramapaiquin inanhuun,
—Jesús ato huani*

¹ Oinfain. Man futsafo shara huaino maton nomuran man shinain isca huaquin, “¡Aicho! Un ato shara huacun futsafo ua oincani uqui shinansharanonforan,” ishon anori man shinancai Upa Diosin matoqui unimaima. Mato ahua inainma. ²⁻⁴ Nan paramisifo cuscara iyamacahuun. Nanfoan atohuunoa yorafo shinansharamacani isca huaquin, “Nan yora fasi sharacoin. Futsafo shara huashoanran,” ishon nannori futsafo atohuunoa shinanmapai. Nantifi ato ointaifi yora shara huapai ato oinonfo. Ascara chaca. Upa Diosin atoqui unimaima. Futsafoan ato, “Min shararan,” huatirofaino Upa Diosincai atohuunoa tsain shara yoishquima. Atoqui unimaima. Ascan marifi ato cuscara iyamacahuun. Futsafo ato ointaifi ahuuoma inanpaicahuun mato oinonfo. Ascaquimarocon tsoa futsa oinyamaino man ahu-

uoma inanquin Upa Diosin oin matoqui unimai mato ashosharatiro.

Jesús afu rafuafo yosini ahuuscashomain Upa Dios cufitirofoquin

Lc 11.2-4

⁵ Man Upa Dios cufiaitian nan paramisifoan cufimisifo cuscan huayamacahuun. Nanfoanfin nishon yora ichananfo anoshon yafi ichananti pushu muranshonri ato ointaifi Upa Dios cufipaicani ato nicanonfo. Upa Dios shinancointamarocon nannoafo atohuunoa shinansharamapaicani. Ascaifoan oinquin futsafoan atohuunoa shinansharatirofia Diosincai atohuunoa shinansharatiroma. Ascashocai ato ahuashta inansharashquima.

⁶ Ascacun marifi ato cuscara iyamacahuun. Man Dios cufiaitian tsoa yamaino Upa cuficahuun. Ascafiacun Upa fustiton mato ointiro. Ascashu matoqui unimacoinquin man yopai cuscan mato inansharashquin. ⁷ Man cufiaitianri nan tsain fustisi yoiriamacahuun. Nan icoinra huamafoan cashmancoin cufimisifo cuscan. Ascashon yoimisifo. “Un nan tsain nannorisi yoiriaiton ua Upa Diosin nicatoran,” ishon shinanmisifo. Asca huafiainfoancai Diosin ascaran tsain nicapaima. ⁸ Ascacun marifi ato cuscara iyamacahuun. Man Upa Dios yocataima man yopai cuscan man tapiaquin.

⁹ Ascashon cufinquin isca huacahuun, “Nocon Upa nai murannoaton min fasi sharacoin. Nantiffain mihuunoa yoisharapainon.

¹⁰ Min apaiyai cuscan min ica

nai muranshon samamashta arisca
huamisifo.

Nanscarifi nuno manifoti anaoafoan huanonfo
cuscan

nanscacoindrifi nuno mai ano anonfo.

Manifotiton aton niaifo iishquin mia ifoan-
nonfo.

¹¹ Shafatifi nocon tushu non yopai cuscan noco
inanhuun.

¹² Nan noco chaca huaifoan
non ato rauhua cuscan huafain
nocon chacaforti noco rauhuashohuun, Upan.

¹³ Satanás yoshin chacapan noco chaca huama-
paifaiton

nocoqui cumatima huahuu.

Nansca huaquin,”

ishon cuficahuun ato huani.

¹⁴ Ascacun futsafoan mato chaca huafiacun ato
rahuacahuun. Ascacufin maton Upa Diosin nai
muranshon man aqui chaca huaa cuscari rau hu-
atiroquin. ¹⁵ Ascafia futsafoan mato chaca huaa
cuscan man ato rau huayamaiton manrifi chaca
huacun Uparicai mato rauhuashoima.

Piqui tunumisifohuunoa Jesús ato yosini

¹⁶ Ascano tsain futsari un mato yoi man tapinon.
Man piqui tunuaitian nan paramisifoan amisifo
cuscan huayamacahuun. Nanfoan aton fuso
chocayamafain puusimisifoma piqui tunucani.
Dioshuunoa shinantama atohuunarocon
yorafo shinanmapaicani. Yorafoan atohuunoa
shinanqui isca huanonfo, “¡Oincapon! Naton fuso
Dios shinanquin piqui tunui puusiquimaran,”
ishon. Ascashon atohuunoa shinansharafoanno
unimacani. Ascafiafoanno Dioscai atoqui

unimaqui ato ahuara inainma. Ascacun marifi ato cuscara iyamacahuun. ¹⁷⁻¹⁸ Ascatarocon man piqui tunuaitian fuchoquimucain foshti isharashon Dios shinancahuun. Man ascaitocai futsafoan mato oinfiaguin tsoan tapitiroma man piqui tunufiaiton. Ascafia Diosin fustichifin tapitiroquin. Ascashon nan icari man nocoaitian mato ahuara sharashta inanshquin.

–Upa Dios icanoa ahuara sharacoinfo mato mucushotiroran, –ishon Jesús ato yosini

Lc 12.33-34

¹⁹ Ascan nuno mai ano niyoshon mafo ichapa mucuyamacahuun. Nanfo chacanai futsuaino man funotiro. Yomutsori maton pushu muran iquishon nantifi maton mafo onuntiro. Ascaino marifi man funocoin. ²⁰ Ascatarocon Dios fu rafufafaincahuun mato amapaiyai cuscan ashquin. Man asca huaiton Dios nan icanoshon mato ahuara sharacoinfo mucushoni. Nanfocai chacanapacunacama. Tsitsa iquiyamacai yomutsoricai iquitiroma maton onunshquin. ²¹ Ascan man mafo fusti shinanfainquifin nan fusti man noicain. Ascan man Diosihuunoa fustisi shinanfainquin nanrifi man yonoshosharatiro ahuun noicoinquin. Ascashu man afu isharapacusharatiro.

Nocon furo nan lamparina cuscarahuunoa Jesús ato yosini

Lc 11.34-36

²² Afanan tsain futsa un mato yoi man tapinon. Nocon furo rafu nocon cayan lamparina cuscara. Nan rafu shara non oinsharatiro. Ascashon nocon

caya cushusharatiro non ahuuscanonma. Nanscarifiai mato nomuranshon man shinansharai man isharacointiro. ²³ Ascafia nocon furo chacanocai non oinsharatiroma. Faquishcoin itiro. Nanscarifiai nocon nomuranshon non shinanchacaicain non isharatiroma. Ascacun oinfain. Man Dios shinain isharafishu chipo Upa Diosin ahuun tsain man cachiquiri huashucaí afanan man isharacointiroma. Ascashu nan faquish muran ica shinantsain man funocointiro.

Dios yafi pui

Lc 16.13

²⁴ Ascan oinmatinincái ahuun ifo nanno rafu nantian yonoshotiroma. Futsa noifain futsa noicasmatiro iyamarai futsa nan yoia cuscacon huashotiroma. Ascashon futsa, “Nacai ahua-maran,” ishon shinantiro. Tapicai huatiroma ratocaimain nicasharaiquin. Nanscarifiai Dios yonoshopaiquicai man pui noitiro ma ton ifo inon.

*–Upa Diosin ahuun facufo cushushararan, –
ishon Jesús ato yoini*

Lc 12.22-31

²⁵ Afanan un mato yoisharanon. Isca huaqui shinanyamacahuun, “Non ahua pitama nonricai ahua ayaimaran,” ishon shinanchacayamacahuun. Ahuaricai non sahuuimaran iyamacahuun. Non ahua pifain non sahuuatocai noco imasharatiroma. ²⁶ Shinancapon. Nan puiyafoancai ahua fanayamafain ahua chintumisifoma ahuaricai fotsuyamafain ahua mafofiacun Diosin ato pimamisi. Nanscarifi aquin Diosin mato huun noiquin nan puiyafo aca finonmafain

mato cushushara. ²⁷ Ascacun shinanchacayamacahuun. Non shinanchacatocai shafa fusti noco nimayotiroma.

²⁸ Ascashon shinanquiri isca huayamacahuun, “¡Ohuashta! Raniamun un sahuuti fii nan sahuushqui,” ishon shinanyamacahuun. ¡Shinancapon! Charofocai yonoyamafain sahuuti icushumisifoma. ²⁹ Ascatama sharamishticoín foaícafo. Nicon shuni niaífo Salomón sahuuti sharashtacoin sahuufiapaonicai nan charo sharashtacoinfo cuscarama. ³⁰ Diosin charo sharashtacoinfo onihua. Foai sharafia supashon samamashta tsasicun coatirofo. Nanfo finonmafain mato noiquin mato camisa sahumashquin. Ascáfia mancai icoinra huasharacoinnama.

³¹ Ascacun shinanquin isca huayamacahuun, “¡Ohuashta! Unmun ahua piquin uhuun tushuyamaino. ¿Unmun ahua ayaícai? Unricai ahua sahuuimaran,” ishon shinanchacayamacahuun.

³² Ascan nannori nan icoinra huamafoan shinanchacamisifo. Ahuara pifain sahuupaiyaífo fustisi shinanmisifo. Ascan maton Upa Diosifin tapiaquin man yopai cuscan. Ascacun mato inanshquin. ³³ Ascacun Diosicairocon shinancahuun. Mato yonomapaiyai cuscan nan fusti shinanfafaícahuun. A cuscara shara ipaícahuun. Nancái shinanquin tau huafafaincahuun. Man ascaiton ahuara futsa man yopai cuscan Upa Diosin mato inanshquin. ³⁴ Ascacun shinanchacacuí isca huayamacahuun. “¡Ohuashta! Uncaí tapiama funamanri ahuara chaca finoainno raca un tunuima,” ishon anori shinantama shinanquirocon isca huafafaincahuun, “Upa Diosin

shafatifi ua cushusharamisi cuscan funamanriri ua cushusharairan,” ishon shinanfafaicahuun.

7

Futsafohuunoa shinanchacayamacahuun

Lc 6.37-38, 41-42

¹⁻² Futsafohuun shinanchacaqui yoiquin isca huayamacahuun. “Nanton chaca huai cuscan onaintimainonran,” ishon futsafohuunoa yoiyamacahuun. Man ascara yoiaiton Diosin mato onaintimai. ³¿Ascacun ahuuscai yora ahuaara pasnanshta fuostamua man futsupaiyain marifi sapa uhuapa fuostamufiashocai man muima? Nanscarifiai min chaca huairan futsa huafiaquin mancaifin fasi finacaiquin. ⁴⁻⁵ Ascashon man yoiqui isca huai, “Uhuun yorashtan, un min furo murannoa ahuaara pasnanshta un mia futsunon,” man huamisi. Ascafiashocai man tapiama man sapa fuostamufafainna. Man fuparamitsapaimisi. Ascacun sapa futsucumucahuun. Asca huashon oinsharafain marifi man futsa pasnanshta futsutiro. Nanscarifi aqui futsafoan ato chaca man shatumpaiquiaquin marifi man chaca huua. Man fasi paran. Ascacun iquisi maton chaca shatucahuun. Ascashon marifi man futsafo chaca shatumatiro.

⁶ Tsain futsari un mato yoi man tapinon. Pashna pofu iyamarai yahua pofu non tushu inansharatiroma. Non mucuman tushu inansharapafiaiton nan pitama nocorocon mocotiro. Nanscarifi aquin ratoranfoan man ato tsain shara Dioshuunoa yoipafiaiton nicacasmacaquin mato chaca huatirofo.

Ascacun ascarafo ato yoiyamacahuun. Man yoisharapaifaiton Diosin tsain potatirofoquin.

Dios yocafain funafain cunahuu

Lc 11.9-13

⁷ Afanan ahuara futsa un mato yoiai cuscan nicacahuun. Ahuara yopaquin Upa Dios yocacahuun mato ashonon. Man yocain cuscan funaquima manasharacahuun nan Diosin mato ashoaitian. Ascacun Upa Diosin cufifaincahuun man cufiai cuscan mato inanon. ⁸ Tsoan Upa Dios yocariai fiishquin. Ascan tsoan ahuara shara fasi fuchipaiyai cuscan Diosin ato fuchimatiro. Ascan tsoan Upa Dios cufiriaton ashoshquin. ⁹ ¿Ascan maton facun mato yoa yocaiton man toquiri inantromun? Ma. Mancai maton facu asca huatiroma. ¹⁰ ¿Maton facuri mato shiman yocaiton man rono inantromun? Ma. Mancai maton facu asca huatiroma. ¹¹ Ascacun tapicahuun. Man chaca huamisifiashon maton facufo man inansharamisi. Man ascaiton maton Upa Diosin nai murannoaton man yocai cuscan finacaia mato inansharashquin. ¹² Man futsafo matohuunoa shara huamapaiyai cuscan nanscarifi huaqui futsafori shara huashofafaincahuun. Moisés cununi cuscan yafi Diosin tsain yoimisifoanri nannori cununifo man shara huashofafainon.

Caincaiti atsoshta

Lc 13.24

¹³ Ascashon tsain futsari un mato yoinon. Nannofin fai rafuquin. Nan fai tohuaica uhuapaton yorahuanrasi ahuunsi fomisifo. Ascafia nan mau fai tanashu ahuun unutaqui omitsiscapanacafo muran iquishcani. Ascacun mau fai uhuapaton

catama fai atsoshta tanacahuun. ¹⁴ Nan fai tohuaica uhuapama atsoshtacoin. Ascan nanfin fustirasiton fuchitirofo. Nan atsoshta tanafainashu omitsiscatirofopia ahuun unutaqui Dios ari nocoshcani nipasharashcaquin.

Ihui ahuun fimihuunshon non onantiro

Lc 6.43-44

¹⁵ Oinfain. Paramisifo matoqui fucashon mato yoiqui isca huacani, “Nonfin Diosin tsain yoimisi-foquin,” ishon yoifiacani afoancai Diosin tsain yoimisifoma. Ascan nanfofin nan chashoan cuscarafoflashu ato nomuran nan masharo pofu cuscarafokin. Ascacun ato nicayamacahuun.

¹⁶ Un mato tapimaquin isca huai. Fanafoti ahuun fimifohuunshon non onantiro ahuu cuscarafomainquin. Ihui moshayafohuunca i uva foaicun non tuscutiroma. Nanhuafaquisihuunricai shopa foaicun non tuscutiroma. ¹⁷ Ascafia ihui sharano ahuun fimiri shara itiro. Ihui chacano ahuun fimiri chaca itiro. ¹⁸ Nanscarifiai ihui sharacai ahuun fimi chaca itiroma. Ihui chacanocai ahuun fimi shara itiroma. ¹⁹ Ascacun ihuin ahuun fimi sharamacun ifoan rurashon coatirofo. ²⁰ Ascacun fimi chaca iyamarai sharacun onantirofo ahuu cuscaramain ihuquin. Nanscarifiai nan tapimamisifoan amisifo cuscan man onantiro yora sharafo iyamaraimain chacafoquin.

Atificai Upa Dios icano iquitirofoma

Lc 13.25-27

²¹ Ascano atirifiton ua Ifo huafishuca i uhuun Upa Diosin ato amapaiyai cuscan amisifoma. Nan cuscarafu Upa icari nocotirofoma. Nan uhuun Upa nai ari icaton afi ato amapaiyai cuscan huamisifo nanfo fusti uhuun Upa ari nocotirofo

afu nipashcaquin. ²² Ascacun Upa Diosin nantifi icoindra huamafo onaintimaitian nantianri yora ichapaton ua yoiqui isca huashcani, “Ifoshta, shinanhuun. Non min anuhuunshon non yorafo mihuunoa tapimamisi. Min anuhuunshonri yoshin chacafo non futsafomaquinoa potamisi. Min anuhuunshonri tsoan atiroma cuscan non huapaoni. ¿Iconmamun, Ifon?” ishon yoishquicani. ²³ Ascaifoan un ato cayacafi cumaqui isca huashquin, “Mancai uhuun yorafo imisima. Manfin paramisifoquin. Chaca fustisi man huamisi. Ascacun umaquinoashu fotacahuun,” un ato huashquin.

Futsan pushu mutsisipa huaino futsan pushu mutsisipama huatiro

Mr 1.22; Lc 6.47-49

²⁴ Ascacun un mato tapimai un mato yoimisi cuscacoin aashucaí man funopacunacama. Nanscarafo nan pushu mutsisipa huamua cuscarafo. Pushu huaquin ahuun quishi mai tuiqui no-coa. ²⁵ Ascano fasi oi ichapa fucain faitahuan pushu naman foannaino fuhuanri nocofiaquicai pushu mutsisipa paon huaquima. Nanscarifiai nan uhuun tsain nicacoianfo nan un yoia cuscan acani. Ascashu ahuara ahuuscarafianocai umaqui itirofoma. ²⁶⁻²⁷ Ascafia pushu futsa mai puhuuqui fuquinishta huaa ahuun quishi mai tuiqui nocoama. Ascano fasi oi ichapa fucain faitahuan pushu naman foannaino fuuhuanquiri pushu mutsisipama paon huaqui chacana huatiro. Nanscarifi aqui tsoan uhuun tsain nicafiaquin un ato tapimana cuscacoin aima. Aatocai

shinansharama. Ascashu ahuun unutaqui arifi nantifi funoshqui omitsiscairan, —ishon Jesús ato yoini.

28-29 Jesús tsainqui anaitiano yorahuanrasi anoshon nicacanashu yoinannifo, —¡Aira! ¡Nicacapon! Ahuun tsain sharacoin. ¿Ahuuscashon anori noco yositiromun? Ahuun tsain shara iquina. Nocon tapimamisifoan Moisés cununi cuscan noco yosimisi cuscan aacai anori noco yositamarocon niaifo tapia cuscan noco yosiaran, —ishon yoinannifo.

8

Jesús nocofunu yoratisho rashquishi futsua caya huani

Mr 1.40-45; Lc 5.12-16

¹ Ascatan Jesús ato yoiquin anaititan machi tunanmanri tusuriqui cainaiton yorafoan mu-fainifo. ² Jesús caino nocofunun ahuun yoratis-hon ranimamishti rashquishi futsua Jesusqui nocoshon ratoconun maí chachipacufoan yoini isca huaquin, —Ifon, ua caya huapaiquifin mian cayahuatiroquin, —huaiton. ³ Jesús aqui mupis-hon yoini, —Icon un mia caya huai. Ascan natian-fin min cayaiquin, —huaino a rashquishi futsua cayariscatani. ⁴ Cayacun Jesús yoini isca huaquin, —Un mia caya huaa cuscan tsoa yoiyamahuu. Nocon caifohuunshon Dios cufimisi ismatahuun. Ascashon Moisés noco yononi cuscan chashoanun facu a inantahuun mía rutushonon. Min chaca soafain min caya cuscan ato ismashquin. Ascano tapitirofo Moisés noco yononi cuscacoin min aiton, —ishon Jesús yoini.

*Romano ranushumua niaifoan ahuun oinmati
Jesús caya huani*

Lc 7.1-10

⁵ Asca huafaini Capernaum ano cani. Ascaino nanno ranushumua niaifo noconi ahuunshon ahuun oinmati caya huamapai. ⁶ Aqui nocoshon yoiqiu isca huani, –Ifon, uhuun oinmati isininqui. Uhuun pushu ano furoiquima raca. Fasi omit-siscairan, –huaiton. ⁷ Jesús cumani, –Un canon-qui cayahuashquin, –ishon yoiaiton. ⁸ –Ifon, uncai ahuama. Min nocofunu tsoa cuscarama-coin. Uhuun pushu muran capaiyamaquin. Min tsainmansi uhuun oinmati ua cayahuashohuun. ⁹ Ascan uarifi uhuun niaifoan ua yonomisi. Ascacun urifi ranushumuafo un yonotiro. Ascan un futsa, “Catahuun,” huaino cariscatiro. Un futsa, “Ohuu,” huaino uqui oriscatiro. Uhuun oinmatiri, “Ua ashohuun,” un huaiton ua ashoriscatiro. Ascacun minfin ahuamamishti huatiroquin. Ascacun min tsainmansi yoihuu uhuun oinmati cayanon, –ishon yoini.

¹⁰ Ascaiton nicai Jesús afu foaifo yoini, –¡Aira! Nicacapon. Israelimafishon naton ua yoi ai cus-cacai tsoa futsan ua icoinra huacoinmisima. Is-raeli anoafoanricai ua icoinra huacoinmisifoma. ¹¹ Ascacun un mato shafacafi yoi. Mani futsafori anoshon nan Dios icoinra huafoti nocon shu-nifo Abraham yafi Isaac non Jacobori Dios icano nai murannoashu atofu ichananshcani Diosin yorafo iishcaquin. ¹² Ascafia atirifi nocon cai-fon Israelifo Diosin ahuun yorafo ato imapaifia-cai tsoan icoinra huafoma. Ascacanashucaí Dios icano nocotirofoma. Ascacun Diosin ato faquish muran potashquin. Nannoashu uaiqui omitsis-

capanacaforan, –ishon Jesús ato yoini.

¹³ Ascashon Jesús Romanon ranushumua niaifo yoini, –Min ua icoinra huaino min oinmati man caya. Ascan natian min pushu ano catahuun, –ishon yoini. Jesús yoiaitian ahuun oinmati cayariscatani.

Pedro ahuun raisi yoshafo Jesús caya huani

Mr 1.29-31; Lc 4.38-39

¹⁴ Asca huatan Jesús Pedro pushu ano cani. Nanno caquin oian Pedronun ahuun raisi yoshafo fasi yonacoin oshati camaqui raca ini. ¹⁵ Ascaiton Jesús yoshafoan ahuun mucuqui mupiaino ahuun yona matsiriscatanaino funinaca huan nan isinincama ointsacai Jesús pimashquin tushu huani.

Jesús yora ichapa caya huamani

Mr 1.32-34; Lc 4.40-41

¹⁶ Ascaino man fari caino isinincaino futsa fut-satapafo yorafo aqui ihuunifo ato cayahuama-pacunon. Atirifi yoshin chacafo atohuun nu-ufafaina Jesús ahuun tsainmansi atomaquinao potano caya sharanonfo. ¹⁷ Jesús nantifi ato caya huani cuscan nannori ahuunoa Diosin tsain yoimisi Isaías inon pacoi cuscan cunuqui isca huani, –Cristofin ahuara isin futsafoan noco isinimai cuscan noco caya huaquin. Nocon isinfori nocomaquinao potaran, –ishon Isaías cununi cuscan Jesús huani.

Jesús tanasharapaiyaifo

Lc 9.57-62

¹⁸ Ascashon Jesús oian yorahuanrasi aqui fuaifoan afu rafuafo yoini, –Non ian ocuma futsa fonon focahuun, –ato huaino. ¹⁹ Nantianri

Moisés yononi cuscan tapimamisi aqui cashon yoiquin isca huani, –Tapimamisiton, min raquira caino urifi un mifu cahuacacainon, –huaiton. ²⁰ Jesús cumaquin, –Marifi quiniyaquin. Puiyafari naayafofiano uncai pushu yama, –ishon yoini. ²¹ Ascaiton a tanamisi nocofunu futsan Jesús yoiquin isca huani, –Ifon, natian un mifu capafiai uhuun pushu ano un cayotanon ua nichiyopun. Nan uhuun upa naitian un mai huayotan un mia tanasharashquinon, –huaiton. ²² –Ascaquima ua tanahuun. Ua ifoamafofin nan yora naa cuscarafokin. Ascashon nanfoan ato yora naacun mai huatirofo. Ascan minfin natian ua tanaicain, –ishon Jesús cumani.

Jesús fuuhuan yafi ian fuchomanhuan nishma huani

Mr 4.35-41; Lc 8.22-25

²³ Asca huatan Jesús shasho naqui nanuano norifi afu rafuafo non afu nanucaini. ²⁴ Ascashu ianmanhuan non pocuaino fuuhuan nocoqui noconi. Nantian Jesús shasho murannoashu osha ini. Ascano ian fuchomanhuanquin shasho muran unu iquimani. ²⁵ Ascaiton non moinni. –Moihuu, Ifon, noco numashqui. Man non asai futsuicai, –ishon non yoini. ²⁶ Ascaino moinacahuan noco yoini –¿Ahuuscai man ratuain? Man ua icoinra huasharashucai man ratucuanama, –ishon noco yoini. Ascatan fuuhuan yafi ian fuchomanhuan yoiqui isca huani, –Fuun nishmahuu, –huafain, –Fuchomanhuan nishmahuu –huaino fuu yafi ian fuchoai nishmafaini. Ascatan ianmanhuan pusiquima racani. ²⁷ Ascaiton oin non yoinanni,

—Ahuu cuscara nocofunushonmun nocon Ifoan isca huaquin. Fuuhuan yafi ian nan yoiai cuscan man nishma huaquin, —icashu non yoinanni.

Gadara mai anoa nocofunu rafuhuun yoshin chaca nuua ini

Mr 5.1-20; Lc 8.26-39

²⁸ Ascatan ianmanhuan pocufaini Gadara mai ano non nocotan Jesús no fu caino nocofunu rafu yoshin chacafo atohuun nuumisi aqui funifo. Nan rafu fasi musucoin ini. Nantifi yorafo atoqui musumisifo. Ascan nan rafu icafoanno cai tsoan ato finontiro imisima. Ascacun atoqui turocomumisifo. Nan mahua quini muran naafo mai huamisifo ano nan rafu inifo. ²⁹ Jesús fuchicatan oi ashcafinin yoinifo, —Minfin Diospan facuquin. ¿Min noco ahusca huapai oamun? Min noco omitsisca huaitian icataiyamafiano min noco omitsisca huai oamun, —ishon Jesús yoinifo.

³⁰ Ascaino nantianri ato chaimashon yahua inafuan piinifo. ³¹ Ascashon yoshin chacafoan Jesús yoicaquin, —Min na nocofunu rafumaquinoa noco potaimancai yahuarasihuan noco nichipun, —huaifoan. ³² Ascaiton —Yahuafohuun fotacahuun, —Jesús ato huaino. Nan nocofunu rafumaquinoashu yoshin chacafo yahuafo muran fonifo. Ascaino yahuafricanasi ian muran maocofainni asai futsunifo. ³³ Ascaifoan oinfaincani yahua cushumisifo ichonifo pushufoti anoafu ato chani huai focani. Ascatan nococashon Jesús nocofunu rafumaquinoa yoshin chacafo potaiton oianfo cuscan futsafo yoifoanfainifo. ³⁴ Nicacani nantifi nan pushufoti ano icafo Jesusqui funifo.

Ascashon yoinifo, –Nuno noco mai anoashu catapun, –huanifo.

9

Jesús nocofunu funitiroma caya huani

Mr 2.1-12; Lc 5.17-26

¹ Ascatan Jesús shasho naqui nanucaini ian mahuan pocufaini ahuun pushurasi ano noconi.

² Asca caini pushu muran iquicun rafu non rafuri nocofunufaoan aton caifo isinincai afi raqui caiyamacai afiri ahua huatiroma Jesús shinanmaqui shuhua naratashon ihuunifo a cayahuamanon. Ascaiton Jesús oian nan nocofunu isinincaiton ahuun yorafoan fasi icoinra huaifoan oinquin isinincai yoiqui isca huani, –Uhuun yorashta, ratuyamahuu. Natian mun mia chaca soashona, –huaiton.

³ Nicacani Moisés cununi cuscan tapimamisi-foan aton nomuranshon shinanquin isca huanifo, –Ajaa. Natocai chaca soatiroma. Fasi Dios chaca huai. Diosin fustitofin chaca soatiroquin. Asca noco paraquin. “Un Diosiran,” noco huamapai, –ishon aton nomuranshon shinanchacanifo.

⁴ Ascaifoan onanshon Jesús ato yoiquin isca huani, –¿Ahuuscái maton nomuranshon man amaqiri shinanchacaimun? ⁵⁻⁶ Unfi Cristoquin yorafoan aton chaca un soashotiro. ¿Ascan ahuuscacaimun un huaicái? Un chaca soashoyamaraquin un cayahuai. Ascacun un mato ismai Upa Diosin ua catoan. Ahuunshofin un chaca soafain un yorafo caya huacointiroquin, –ishon ato yoini. Ascatan Jesús nan nocofunu afi raqui cayamacai afiri ahua huatiroma yoini,

—Min pushu ano min shuhua ya funicaitahuun, —ishon Jesús yoiaino. ⁷ Funinaca huatan ahuun pushu ano cani. ⁸ Ascaiton oincani nantifi mustaiaricatan yoinifo, —Ahuuscashomun Diosin isca huaiquin. Diosin fasi sharacoin tsoa cuscarama. Ahuun yonohuunshon na nocofunu isinincai Jesús ahuun tsainmansi caya huafain ahuun chacari soashonaran, —ishon yoinifo.

Jesús Mateo cunani

Mr 2.13-17; Lc 5.27-32

⁹ Nanscacaini caaquin Jesús ua oinni. Unfin noco niaifo pui fishofafainmisi iniquin. Ascan uhuun anufin Mateoquin. A muranshon aton pui fiанти pushun facu muran un tsoa ini. Ascaiton Jesús ua yoini, —Un fu cahuun ua tanamisi iishquin, —Jesús ua catonquin huani. Ua asca huaino un afu cani.

¹⁰ Ascashon Jesús uhuun pushu muranshon un pimani. Yoraforti no fu cani. Niaifo pui fishomisi futsafo non icoinra huamafo futsafoan atohuunoa shinanchacamisifo yafi non afu rafuaforti cani. Ascashon nanfoan no futan piinifo.

¹¹ Ascaiton oincaquin Fariseofoan Jesús fu rafumisifo yoini, —¿Ahuuscai maton tapimamisi Jesús nan niaifo pui fishomisifo non chaca futsafo futan piimun? —huanifo.

¹²⁻¹³ Ascaifoan nicaquin Jesús ato cumani, —A isinincaifoma cayahuamamitsamisi yopacanima. Ascan nan isinincaifoti fasi cayahuamamitsamisi yopacani. Ascarifi aquin, “Uncai ahua chaca huamisima. Un Numamisi yopaimaran,” icaifocai un aton chaca soashotiroma. Ascan tsoan yoiqui isca huai, “Un fasi chaca huamisi. Un

numamisi yopacoinran,” icaifoan un ato chaca soashotiro. Ascacun Diosin tsain cununi cuscan tapitacahuun. Cunuqui isca huani, “Ua man ina fushomisi un mato chaca soashonon. Nan fusticai un fuchipaima. Ascataमारोcon man futsafohuun ramapaiyai nancaifin un fasi fuchipaiquin,” ishon Diospan tsain cununi. —Jesús ato huani.

Piqui tunuaihuunoa

Mr 2.18-22; Lc 5.33-39

¹⁴ Ascashon ato yoiaino Juan fu rafumisifo aqui fucashon yocanifo. —¿Ahuuscai Fariseofo futan non piqui tunumisifiano mifu rafuafoan piqui tunumisimamun? —ishon Jesús yocai foan. ¹⁵ Ato cumani, —Nocofunu fu ainfo fianainnoricaí unimai fusicaquin tsoan piqui tunutiroma. Nanno funu anocai ahuun yorafoan piqui tunutirofoma. Ascafia funu amaqúi rutuafono shinancaquin piqui tunutirofo.

¹⁶ Sahuuti shunicoin fashnucun potó funapan icushumufia ustuuashu fasi chacanai finatiro. Tsoancai afanan ascara icushpaitiroma. Nanscarifiai un mato tsain funa shara yosia cuscan nicacoinshocai man apaoni cuscan afanan man huatiroma. Tsoan ua tanacoianshu ipaoni cuscan cachiquiri huacointiro. Ascashu funa cuscara shara iishquin.

¹⁷ Nanscarifiai tsoancai fichi tutso shuni muran vino funa nanutiroma. Fichi tutso toshacainaino vino funa chacanai cuyofotiro. Nanscarifiai maton shunicaifoan mato yosimisi cuscan yafi un mato yosiai cuscacai nan rafu ositirofoma. Un mato yosiain cuscacoin nannori Diosin tsain shara. Ascafia mato shunifoan mato yosimisifo

cuscaai anorima. Nan tanashocai Diosin mato amapaiyai cuscan man huatiroma. Nan rafu osishon nicapaiquicai man shinansharatiroma. Fichi tutso funa muran vino funa nanua sharacoin itiro. Nanscarifiai ratoranfoan apaoni cuscan unucatan un ato tsain funa shara yosiain nan fusti tanasharacun Diosin ato funa shara imai, –ishon Jesús yoini.

Jairo shotocofacu caya huafain ainfoan Jesús sahuuti muunni cayashquin

Mr 5.21-43; Lc 8.40-56

¹⁸ Ascashu Jesús tsaincai muran Israelifoan ichananti pushu anoa aton niaifo Jesusqui noconi. Nocoshon ratoconun mai chachishon yoiqui isca huani, –Uhuun shotocofacushta man naaquin. Un fu capun. Min mucupan uhuun facu mui caashquin cayatan ninon, –ishon niaifoan Jesús yoini. ¹⁹ Asca huaino Jesús niaifo fu caino non acho non afu cani.

²⁰ Nannori ainfon imi imitiani doce fari man aqui cafiano nusu yamacai. Jesús caiton nan ainfoan acachorishori ahuun sahuuti muunni.

²¹ Mun ataima ahuun nomuran shinanqui isca huani, –Un ahuun sahuuti muuanshu un cayatiroati, –ishon shinanni. ²² Ascashon muuaiton Jesús ifiacucahuatan ainfo fuchishon yoini –Achishtan, ratuyamahuu. Min ua icoinra huashufin min caya sharaquin, –ishon yoiaino ahuun imi nusuriscatani. Ascaiton mua man caya sharacoian ini.

²³ Asca huatan Jesús niaifoan pushu muran iquicaiquin nica yorafoan aton shainti manu-aifoanno futsafo shorarascacani. Fasi achacoin

uaicani. ²⁴ Ascaifoan Jesús ato yoini, —Chifi cain-tacahuun. Na facucaí naama. Oshafinquin, —ato huaiton osanifo. ²⁵ Ato caimatan shotocofacu mutsoinifoannaino samamashta funinaca huani. ²⁶ Ascano Jesús shotocofacu man naafiacun funia nicacani pushufoti chanifoanfainifo.

Jesús fusho rafu cayahuani

²⁷ Ascano Jesús niaifo pushu anoashu caiton fusho rafutan mufainifo. —Min nocon niaifo ipaoni nan David ahuun funa. Nocoahuun rama-paihuu, —oi ashcafinin cunarianifo. ²⁸ Asca huai-fono Jesús pushu futsan muran iquicun fusho rafuri afu iquinifo. Iquiafoan Jesús ato yocani, —¿Un mato caya huanon man icoinra huaimun? —huaiton. —Ai, Ifon, non mia icoinra huai, —huaifoan. ²⁹ Aton furo munquin yoini, —Ua icoinra huashufin man cayaquin, —ato huani. ³⁰ Asca huaino oinsharariscatani. Oinsharaifoan Jesús ato yoisharaquin —Ua nicacaquin. Un mato cayahua tsoa yoiyamacahuun, —ishon yoini. ³¹ Anori yoifiacun nan rafutan nantifi nanno icafo atoqui chaninifo.

Jesús nocofunun tsaintiroma caya huani

³² Nan rafu pushu murannoashu foaifono futsafoan nocofunu yoshin chaca ahuun nua ascacai tsaintiroma Jesusqui ihuunifo cayahuamanon. ³³ Jesús yoshin chaca amaquinoa potano nocofunu tsainon. Nanno icafo mustairitan yoinannifo, —¡Airá! ¡Oincapon! Nocon mai nan Israeli anoshon Jesús rama aca cuscan tsoa oinmisimaran, —icanashu yoinannifo.

34 Asca huafiainfoan Fariseofoan yoinifo, – Nanton yoshin chacafo aton niaifohuunshon yoshin chacafo potatiroran, –ishon yoinifo.

Jesús yorafohuun ramapai

35 Ascaiton Jesús pushurasifoti nanno Judiofo icano cahuacacaini. Judiofoan ichananti pushu muranshonfin Jesús ato Diosin tsain shara yoiquin isca huani, –Itisharacahuun. Diosin nuno maton niaifo ipairan, –ishon ato yoifoanfafaini. Pau futsa futsatapafo caya huani. 36 Yorahuanrasi aqui fuainfoan oin atohuun ramapaini. Aton nomuran omitsiscaifoan. Ascan Jesús shinanquin isca huani, –Chashohuan cushumisioma nanscarifiai na yorafo cushumisiomaforan, –ishon shinanniquin. 37-38 Ascashon non afu rafuafo noco yoini, –Yora ichapafoan uhuunoa nicayamafiano ichapamaton ua yonoshocani uhuunoa ato yoishcaquin nanfu nipashquin. Ascashon fasi Upa Dios cuficahuun ahuun yonoshomisifo catonquin uhuunoa ato yoinonforan, –ishon Jesús ato yoini.

10

Jesús doce nocofunifo catonni afu rafunonfo

Mr 3.13-19; Lc 6.12-16

1 Ascatan afu rafuafo noco cunani, –Uqui fucahuun, –noco huaino. Aqui fuaifoan noco yononi ahuuscashomain yorafo ahuunshon cayahuamafain yorafohuun yoshin chaca nuucun atomaquinoa potatiroquin. Ascashon pau isi futsa futsatapaforimain ahuuscashon

caya huatirofoquin. 2-4 Nonfin doce iniquin. Nocon anufo un mato yoi. Futsa Simonfiacun ahuun anu futsa Jesús tuqui huani Pedro. Nanton chipocu Andrés. Futsafoan aton anu Santiago non Juan. Nan rafu Zebedeopan facu. Futsafoan Felipe non Bartolomé un Mateo non Tomás non Santiago Alfeopan facu non Simón futsari nanton ahuun caifo futsafo futan Romanonfo potapai afanan Israelifo yonononfoma. Futsan ahuun anu Judas Santiago facu futsarifi Judas Iscariote nanton Jesús potashon ato achimani. Nocofosi Jesús noco catonni non ahuun rafumisi inon non ahuunshon tsain tapishquin.

Jesús afu rafuafo doce nichini Dios niaifo icain-omain ahuu cuscara iishquicain ishon ato tapi-manonfo

Mr 6.7-13; Lc 9.1-6

⁵ Noco catonshon Jesús noco yonoquin isca huani, –Nan noco caifomafoan aton mai ano foyamacain Samaritanon icafo anorifi foyamacahuun. ⁶ Ari fotamarocon nocon caifo Israelifo muransi fotacahuun. Nanfofin chashoan funoa cuscarafoquin. ⁷ Ascano focashon ato yoiqui isca huacahuun, “Nocon Ifo Dios samamashta nocoyoshquin noco niaifo iishqui,” ishon ato yoitacahuun. ⁸ Ascashon isinincaifori uhuun curushuunshon ato cayahuamafain man yora nafiacun funimafain yora nami rashquishi futsuafo ato cayahuamafain yoshin chacafo yorafohuun nuucun nanfori uhuunshon atomaquinoa potacahuun. Diosin mato cashman ahuun curush inan cusca huafain futsaforifi caya huasho ato ahua yocayamacahuun.

9-10 Ascashon focaquin mato ahua foyamacahuun. Pui foyamafain mato sahuuti yafi saporori foyamafain forusa yafi poquitiri foyamacahuun. Nan man nuta fustiya fotacahuun. Man uhuunshon uhuun tsain shara ato tapimanaiton arifi man yopai cuscan mato inantirofo.

11 Ascan nan man pushurasi ano nocoaitian nocofunun Dios tanasharacoian funacahuun nan fuchiashu ahuan pushu muran iyoshon ato yoifoanfaincahuun nan man caitian. 12 Ascatan ahuan pushu muran icaquin nan pushu ano icafo ato yoiquin isca huacahuun, “¡Aicho! Min pushu muran non oiran,” huacahuun. 13 Ascasho nan pushu ifo futan ahuan yorafoanari mato shara huano ato yoihuu isca huaqui, “Dios mato ointi shinanshara huamashquiran,” ishon. Asafia mato tanasharayamaifoancai Diosin aton ointi shinanshara huamashquima. Ascano Diosicai mato ointi shinanshara huamaqui unuima.

14 Ascan rato pushu futsa iyamarai pushurasi anofoanari mato nicacasmaifan atomaquinoashu focaquin maton sapato tatashacahuun. Ascaquifin man ato ismatiroquin mato nicacasmaifan Diosirifi nicacasmaifo cuscan. 15 Un mato icon yoi. Diosin nantifi nan chaca huamisifo ato yoipacuaitian nan Sodoma yafi Gomorra ano ipaonifori ato onaintimashqui. Ascashon nan mato nicacasmafori natian ato onaintimaquin finacoinshquin.

Diospan tsain ato yoiaifan nicacasmacaqui ato omitsisca huanifo

¹⁶ Chashoanfo masharonun pipaitiro. Nanscarifiai nan icoindra huamafoan mato chaca huapaitirofo. Ascafia nanfo muran un mato nichu. Ascacun nan rono onanya cuscara marifi icahuun. Ruhuincai ahua shinanchacamisima cuscan marifi nanscarifi isharacahuun.

¹⁷ Ascacun oinfain. Nan yora chacafo masharo pofu cuscarafu mato achimatirofo. Ascano achicashon aton niaifofu ano mato iyotirofo. Asca huashon aton ichananti pushu muranshon mato ihuin futsa coshamatirofo. ¹⁸ Ascashori niaifofu ano mato iyocani uhuunshon mato nansca huacani. Ascafia nanfo yafi caifo futsafori nan tsain shara uhuunoa man ato yoitiro. ¹⁹ Ascatan mato achifiafo shinanchacayamacahuun ahuuscashomain man ato cumasharaicai. Ascashon niaifofu ointaifi mato yocaifoanno nantianri Upa Diosin mato shinanmani man ato cumasharanon. ²⁰ Man ato yoiaitiancai mafi man ato yoima. Maton Upa Diosifin aficoi yoi cafisca huaiquin ahuan Yoshin Sharapan man ato yoipai cuscan mato huashoi.

²¹ Ascano nantianri nocofunufu ahuan yora afu nanuafu achimacani niaifofu ato rutumanon. Apafoanri aton facufu achimacani ato rutunonfo. Nanscarifi huaquin facufu aton apa yafi ahua nicacasmaquin ato achimani niaifofu ato rutunonfo. ²² Ascasho nantifi yorafoan man ua icoindra huacun uhuunshon mato noicasmacani. Ascan omitsiscafiquin man ua potama nan man naitian uhuun tsain tanasharashu Upa Dios fu man ipasharaiqui. ²³ Ascan pushurasi futsa anoshon mato omitsisca huaifoanno pushurasi futsa ano

ichotacahuun. Ascacun un mato cayacafi yoi. Ua nicasharacahuun. Israel pushurasifo atirifi ari man cataima un afanan matoqui nasoshquin.

²⁴⁻²⁵ Ascano ahunshon tapiafoancai ato tapimamisi finontiroma. Oinmatifoanricai ato ifo finontirofoma. Ascashu marifi man ua cuscara iishqui. Ua chaca huamisifo cuscan matorifi nansca huashcani. Nanfoan ua noicasmacaquin ua yoimisifo isca huaquin, “Minfin yoshin chacafoan ato niaifoquin,” ishon ua yoimisifo. Un mato ifofiacun ua asca huamisifo. Ascan matocaifin asca huaquin finacaicaniquin.

Tsoaquimain man ratutiroquin

Lc 12.2-7

²⁶ Ascacun mato omitsisca huafiaifoanno atoqui ratuyamacahuun. Nanfoan ahuarashta onupaiyamisi nantifi Diosin ato puashoshquin. Ahuarari fomanpaimisifo nanfori ato puashoshquin. ²⁷ Ahuara un mato fusti yoimisi nanfo nantifi yorafo cayacafi ato yoisharacahuun. ²⁸ Ascasho mato rutupaifiaifoanno ratuyamacahuun. Mato rutufiatirofocai maton yoshin tsoan ahuusca huatiroma. Ascacun atoqui ratucaquimaroon Dios fustiqui musucahuun. Nantofin noco rutufain nocon yoshin omitsiscapanacafo muran potatiroquin. ²⁹ Ascano tsitsipio rafu inanmitsashon toro fustishtaraca fitiro. Ascacia mato Upa Diosin asca huapayamaquicai fustishta namatiroma. ³⁰ Diosin nantifi tapicoian. Nocon fori tanan huani. ³¹ Ascashon Upa Diosin tsitsipiofo shinanmisi cuscan fasi mimacai mato shinanfafainiquin. Ascacun ratuyamacahuun.

Matocaifin tsitsipio aca finonmafain Diosin matohuun noiquin. Cushushon mima huaquin mato cushusharamisiquin.

*Yorafoan ointaifi, –Jesús uhuun Iforan, –huaa
Lc 12.8-9*

³² Ascano yorafoan ointaifi, “Jesús uhuun Iforan,” ishon ato yoiafin uhuun Upa Dios nai muran icanoshori ahuun ointaifi, “Naafin uhuun yoraquin,” ishon un yoishquin. ³³ Ascacia tsoan yorafoan ointaifi, “Jesús uhuun Ifomaran,” ishon yoia. Nantocai ua icoinra huamisima. Nanscarifi huaquin uhuun Upa Diosin nai muranshon ahuun ointaifiri “Nacai uhuun yoramaran,” ishon un yoishqui.

*Jeshuunoacai yorafoan anorisi shinanfoma
Lc 12.51-53; 14.26-27*

³⁴ Man shinanmun nantifi manifoti anoafo uhuunoashu unimanonfo un oni. Ma. Ascaramafiqui. Un mato yoiai cuscaai tsoan nannorifosi shinancanima. Asca nan ua icoinra huafoan sharafosi shinainfoanno nan ua icoinra huamafoan ahuara chaca futsafosi shinancani.

³⁵ Ascashon apa ua icoinra huaino furumun ua icoinra huashuma apaqui sinatiro. Ahuanri ua icoinra huaino ainfacun ua icoinra huashuma ahuaqui sinatiro. Ahuun yayan ua icoinra huaino ahuun raru ua icoinra huashuma ahuun yayaqui sinatiro. Un nai murannoashu matoqui oyamanicai tsoa ascacuanafoma. ³⁶ Nanscarifi aquicai tsoan nannorifosi uhuunoa shinancanima. Ascano tsoan ua icoinra huacun ahuun yoracoinfoan nan noicasmatirofo.

³⁷ Ascan tsoan ua finonmafain apa yafi ahua noiashucaí uhuun yora itiroma. Nanscarifiai tsoan furu yafi ainfacu ua finonmafain noiashucaí uhuun yora itiroma. ³⁸ Ascan unfin mato ihui coyan iquinanquin nashoshquicain. Ascafia tsoan yoiqúi isca huaima, “Natian un Jesús tana. Ascacun nai omitsiscafiaguicai un shinanchacaimaran,” ishon tsoan anori yoicasmaicai uhuun yora itiroma. ³⁹ Ascashon tsoan shinanqui isca huai, “Un Jesús tanaiton raca ua omitsisca huacanicati,” ishon shinanqui uhuun tsain cachiquiri huashu nanscara yorafo naashu omitsiscapanacafo. Asca tsoa uhuunoashu omitsiscafiagui ua potama nanscara yorafori naashu ufu isharapacunacafo.

Ahuara shara noco Diosin inain cuscan
Mr 9.41

⁴⁰ Ascano ratoranfoan mato nicafain mato shara huaifo. Nanfoanfin nan uacoin shara huai cafisca mato huacaniquin. Nanscarifi aquin tsoan nan un yoiái cuscan nicacoin yafi nan ua nichini uhuun Upa Dios nicacoin cafisca huaiquin. ⁴¹ Ascashon tsoanri Diosin tsain yoimisi ahuun tsain nicacoinfain shara huacun Diosin nanrifi nan ahuun tsain yoimisi inanshara cuscan huaquin nan shara huari inansharashquin. Ascashon nan Dios tanamisi yora shara futsan ahuun tsain nicasharafain shara huacun, Diosin nan a tanamisi inanshara cuscan huaqui nan shara huarifi inansharashqui. ⁴² Ascano tsoan ua rama icoinra huashon ua tanaiton futsan a shara huaqui unu matsi ayamacun. Ascacun Diosin arifi

a futsa shara huaa. Ahuara shara inanshquiain cuscacai funotiromaran, –ishon Jesús noco yoini.

11

Nan Juanpan ato unu muran iquimapacumision a tanamisifo Jesusqui nichini

Lc 7.18-35

¹ Ascatan non afu rafumisifo doce noco yoiqui anaititan pushurasi futsafo ano Jesús noco iyoni. Nannoafori ato yosifain ato tapimaicai ahuuscashumain non Dios fu ipatiroquin. ²⁻³ Ascano nantianri Juanpan nan unu muran ato iquimapa-cuni ranushumuafaoan cunu muran iquimanifo. Nan muranshon Jesús acai cuscan nicaquin ahu-unoa fasi tapisharapaiqui. Nan cunu muranshon a tanamisifo nichini Jesús yocanonfo. Ascano nan Juanpan ato yonoa cuscan focashon Jesús yocaquin isca huanifo, –¿Iconmun nan minmun nan non manamisi iyamarai futsa raca non man-ai? –ishon Jesús yocanifo.

⁴ Ascaiton Jesús ato cumaquin isca huani, –Nan man nica cuscan yafi man oian cuscari Juan tapimatacahuun. ⁵ Yora fushocoinfo un ato cayahua afanan oinsharanonfo. Nipaiqui ranainfori un ato cayahua nisharanonfo. Ato yoratiso coyo cuscara tocoi futsuafori un ato caya huaa afanan imisi cuscan ato nami shara inonfo. Pastocoinfori un ato cayahua nicasharanonfo. Man yora naacoinnafori un afanan ato funimana. Ascashon ahuuomafori tsain shara un ato yoifafainmisi ahuuscashumain Dios fu ipatirofoquin. ⁶ Ascan

tsoan ua icoinra huacoinshon ahuara futsa shinainma. Nan cuscara yorafofin unimacointiroquin. Nannori ua Juan yoishotacahuun, —ishon Jesús ato yoini.

⁷ Ascatan man foafono Juanhuunoa Jesús nanno niafo ato yoini, —¿Ahuuscai tsoa istaipama ano Juan oin focani fonifomun? Juancai nan faca tahua pui ninhuun focufocu acai cuscarama. Nanscarifiai man man tapia Juancai nocofunu ointi ranainyama. ⁸ ¿Ascacun ahuuscai Juan oinpai man fonimun? ¿Man shinanmun a nocofunun sahuuti sharacapa sahuucun oin foi man foni? Ma. Juanpacai sahuuti sharacapacoin sahumisima. Niaifofoanfin aton pushu muranshon sahuuti sharashtacoin sahuutirofoquin. ⁹ ¿Ascan ahuuscai oinpai man fonimun? Man shinanra Diosin tsain yoimisi Juan oincai man cani. Ascafia nan icon. Juanpan Diosin tsain yoimisifia nanton yoimisi cuscacai tsoa futsafoan anori yoimisima. ¹⁰ Ascacun nanhuunoa Diosin tsain cununi isca huaquin,

“Min nai ariashu mai ano fotoataima iquisi uhuun tsain yoimisi un nichiqui tau huai. Mihuunoa ato yoiano itisharashon mia nicanonfo,”

ishon cununi. ¹¹ Un mato icon yoi. Tsoash-tacai Juan finoanma. Ascashon Juanpan tsain yoimisi cuscaricai tsoan ascara yoiyomisima. Ascafia Dios niaifo icanoafoan yoisharatirofo cuscacai Juanpan nicayamafain nanfoan oianfo cuscaricai Juanpan oinyomisima. Ascashon nantifi Dios icanoafoan Juan finoanfo. ¹² Nan Juanpan ato unu muran iquimapacunitian natianri yorafo

Dios icano fasi iquipaicoincani. Ascashon shinanqui isca huafo, “Diosin niaifoan ahuun yora urifi un ipai afu nipashquin. Ascacuai ahuashtaton ua nitun huatiroma un ahuun yora icaiton,” ishon shinancani. ¹³ Diosin tsain yoishomisifo futan Moisés cununi cuscan yoiquin isca huanifo, “Nan nocon numamisi noco niaifo oshquiran,” ishon yoinifo. Ascan natian Juanrifi man matoqui nocoa ahuunoari mato yoishquin. ¹⁴ Nanfoan cununifo cuscan icoinra huashon man tapitiro Juan arifi Diosin tsain yoimisi nan Elías cuscara. Ascacun Diosin tsain yoimisifoan cunuqui isca huanifo, “Un matoqui Elías nichishquiran,” ishon Diosin yoini. Ascan nanfin Juanquin. ¹⁵ Manmain ua nicatiroquin ua nicacahuun. Uhuun tsain maton nomuran nanushcaquin.

¹⁶ Ascashon natian niyoafo ahuu cuscarafomainquin un mato yoi man tapinon. Nanfofin nan facu cashumisifo cuscarafokin. Facufo cashucaquin afu facu futsafo oi ashcafinin cunatirofo. Nanscarifiai nanfofin nanscarafokin. ¹⁷ Nan facu cashumisifoan yoitirofo isca huaquin, “Man non shainti manufiainocai monopaicanima. Fanainca omitsiscati cuscara non fanaifiainocai man uaipaimaran,” ishon nan facu cashumisifoan yoitirofo. ¹⁸⁻¹⁹ Nanscarifi aquin nanfoanri Juan yafi uqui tsain chipufafaini. Ascafia Juanpacai piqui tunufain fimi unu pau ayamisima. Ascacun ahuunoa yoiqui man isca huamisi, “Juan nisocoin. Yoshin chaca ahuun nuaran,” ishon yoimisifo. Asca unfin pii sharafain un aya sharamisiquin. Ascafia uhuunoari yoiqui isca huamisifo,

“¡Cuu! Jesús pitsicoin fasi ichapari ayatiroran huafain Roma anoa niaifo puifishomisifo yafi yora chacafo furi rafuiran,” ishon uhuunoa chaca yoimisifo. Ascafia nanfoanri yoiqui isca huamisifo, “Tsoamain shinansharafain icaquin non onantiro. Nan yorafin isharacoianquin shinansharamain huafin,” ishon nannori yoimisifo. Nannori yoifiaquicai uhuunoa ascara yoipaimisifoma. Ascatamarocon uqui tsain chaca fusti huamisiforan, —ishon Jesús ato yoini.

Pushurasi anoafu nicayosmashunifo

Lc 10.13-15

²⁰⁻²¹ Ascano ato yoiqui anaititan Jesús nan pushurasi anoafu ato yoiqui isca huani, —¡Ohua! Man Corazín anoafu yafi Betsaida anoafu man chipo fasi omitsiscai. Tsoan oinyomisima cuscara shara un mato ismafiano mancai chaca shatupaima. Ascan nan Tiro anoafu yafi Sidón anofori un mato isma cuscan un ato ismaiton nanfoan aton chaca shatucuanafu. Ascasho yoicuanafu isca huaqui “¡Ohua! Non fasi chaca huamisi. Ascacun natian Diosiqui nasoshon non nicashara-noncahuun,” ishon yoicuanafu. ²² Ascafia Diosin nantifi icoinra huamafu onaintimaitian nan Tiro anoafu yafi Sidón anofori onaintimafiaquicai mato onaintimaquin finai cuscan ato huaima.

²³ ¿Ascan man Capernaum anoafu man shinanmun man nai muran Dios ari foicai? Ma. Omitsiscapanacafu muranrocon mato potai. Tsoan oiyomisima cuscara shara un mato ismafiaitocai maton chaca man shatupaima. Ascan nan un mato isma cuscan Sodoma anoafu un ato ismaiton aton chaca shatu

cuanifo. Tsoaricai cuyocuanama. Nantianri aton pushurasi icuana. ²⁴ Un mato yoi. Diosin nantifi icoinra huamafo onaintimaitian nan Sodoma anoafori onaintimaifiaquicai mato onaintimaquin finai cuscan, –ishon Jesús noco yoini.

Uqui fucahuun. Un mato ointi fiananan huashonon man afanan shinanchacanonma

Lc 10.21-22

²⁵ Ascano ato yoiqui asca huatan Jesús apa cufini, –Upa Diosin, min fasi sharacoin. Nantifi nai murannoafo futan mai anoafoan aton Ifofin minquin. Ascano nan mapo sharayafo yafi cunu tapiafocai min tsain shara min ato tapimanama. Ascafia nan cunu tapiamafishon un ato isma cuscan un ato yoiai cuscan ua icoinra huafo. Nanfofin min ato tapimanaquin. ²⁶ Icon, Upan, minfin nanscara fuchipaiiqui, –ishon apa yoini.

²⁷ Ascashon Jesús afanan ato yoiquin isca huani, –Upa Diosin tapia cuscan uarifi nantifi tapimani. Unfin Diospan facuquin. Diosin fustitofin ua onancoianquin. Nanscarifi aqui urus fusti Upa Diosin un onancoian. Nanscarifi aqui urifi un futsafo Upa Diosihuunoa onanmanai cuscan nanfoanri Upa Diosin onantirofoquin.

²⁸⁻²⁹ Ascacun uqui fucahuun ua tapishashcaquin. Unmain ahuu cuscaraquin un mato tapimai. Unfin yorafohuun ramapaimisiquin. Uhuun nomuranricai un ahuashta shinanchacayamafain un isharacoin fustimisi. Ascashon un mato yonomapaiyai cuscacai curushma. Nanricai ahua ihuuma. Ascacun maton nomuran ihuucoin mui uqui fucahuun un

maton ointi fiananan huashonon man afanan shinanchacanonma. ³⁰ Ascano uqui oshon man mutiro un mato curush yonomaima. Ascatarocon ua tanasharacoinyashu mato ointi fiananan huashon man isharacointiroran, —ishon Jesús ato yoini.

12

Jesús fu rafumisifoan tunutitian trigo fimi mutusnifo

Mr 2.23-28; Lc 6.1-5

¹ Ascatan Israelifoan aton tunutitian Jesús yafi afu rafumisifo mau mamaqui focaquin trigo mutuscashon fonaincoinaquin piyaifoan.

² Oincaquin Fariseofoan Jesús yoinifo, — ¿Ahuuscai nocon shuni Moisés yononi cuscacai minhuunshon tapimisifoan nicapaicanimamun? Tunutitian trigo mutuscaniran, —huaifoan.

³ Jesús ato cumaquin isca huani, —¿Davidhuunoa cununi cuscan man man oinmisimun? ¿Fonainquin nocon shuni David ahuun yorafo futan ani cuscan man man nicamisimun? ⁴ Dios fu tsainti pushu muran iquicaishon amurannoa misifo ato piquini fasi fonicoinquin. Ano tushu futsa yamaino. A misifofin nan Diosin tsain yoimisinafosi iniquin. Tsoa futsacai a misi pitiro inima. Nannori yonofianifo fasi fonicoinquin David afu rafuafo futan pini.

⁵ ¿Ascashon Moisés cununi cuscari man man oinmisimun? Cunuqui isca huani, “Dios fu tsainti pushu muranshon tunutitian ahuun tsain yoimisifoan yonotirofo. Nanfoan yonofiaquicai

ahua chaca huacanimaran,” ishon Moisés cununi. ⁶ Ascatan un mato yoi. Dios fu tsainti pushu fasi sharashtafia uncaifin fasi shara finacaiquin. ⁷ Upa Diosin yoini cuscan cununi isca huaquin, “Man ua inafu rutushomisi un maton chaca soashonon. Nan sharafia man futsafohuun ramapaiquin man ato shara huai. Nancaifin fasi shara finacaiquin. Nan fusti un fasi fuchipairan,” ishon yoini. Ascacun nan tapicoishocai man ufu rafumisifohuunoa yoicuanama, “Nanfoan chaca huaforan,” ishon. Afoantsi ahua chaca huacun. ⁸ Uafin uhuun Upa Diosin catoniquin. Ascacufin urusu fusti un yoitiro ahua-main tunutitian man huatiroquin, —ishon Jesús ato yoini.

Nocofunu mucu musufiquia

Mr 3.1-6; Lc 6.6-11

⁹⁻¹⁰ Ascatan Jesús Israelifoa aton ichananti pushu muran iquini. Nanno iquishon ato yosiaino nantianri nocofunu musufiquiaton arifiniani. Ascano nan Fariseofoa Jesushuunoa ahua chaca yoipaicaquin nan yocanifo. —¿Nocon shuni Moisés yononi cuscamun tunutitian non yora caya huatiro iyamarai non caya huamatiromanmun? —ishon yocaifoa. ¹¹ Jesús ato cumani, —¿Man chashoan ayano tunutitian quini muran pacucun man ihuiriscatiromamun? Ma. Ascatama manrocon ihuiriscatiro. ¹² Nanscarifi huaquin fasi noicoinquin nocofunuhuunoa tunutitianfiacun non shinantiro. Moiséscai noco yononima tunutitian non yora cayahuanonma, —ishon ato cumani.

¹³ Ascashon nan nocofunu musufiquia yoiqui isca huani, —Mushahuun, —huaino. Mushatanaino nantian ahuun mucu muma sharacoin iriscatani. Nan ahuun mucu ocuma futsa cuscara shara ini. ¹⁴ Ascaiton oincanashu Fariseofo focashon shinannifo —¿Ahuuscashomun non Jesús achitiroquin rutushquin? —icashu yoinannifo.

Upa Diosin ahuun facucoin catonni ahuun oinmati cuscara inon

¹⁵ Jesús tapitan a rutupaiyaifoanno anoashu cani. Yorahuanrasiton mufainifo. Ratomain isinincái nanfo cayahuamani. ¹⁶ Ato cayahuatan ato yoini, —Uhuunoa tsoa yoiyamahuu, —ato huani. ¹⁷ Nannori ato yoi Isaías cununi cuscan icocoin inon. ¹⁸ Isaiasin Diosin tsain cununi isca huaquin, “¡Oincapon! Naquian uhuun oinmati cuscara un catonni. Un fasi ahuun noi. Un aqui unimacoin. Uhuun Yoshin Shara un afu rafumamisi. Nan manifoti uhuun tsain nicasharacun atorifi aton chaca yama huashotiro uhuun yora inonfo. ¹⁹ Acai yora futsa fu fochishmanantanainma. Tsain isininpaton yoishquima. ²⁰ Nan yora omitsiscái afanan tunutirofoma ato potaima ato cushusharai tunumashquin. Tsoan icoinra huapai ato yoisharashquin icoinra huacoinonfo. Ascan huaino afanan mai ano oaitian nantifi chacafoti unumashquin ahuunshon nantifi ishara fustisinonfo. ²¹ Nantifi manifoti ahuunoa nicaquin isca huacani

shinanshcaquin, ‘Nan fustiton noco numatiro non ahuunoashu Upa Dios fu nipanon,’ ishon yoishquicaniran,”

Isaías cununiquin.

–*Satanashuunshon Jesús yoshin chacafo potairan, –ishon yoinifo*

Mr 3.20-30; Lc 11.14-23; 12.10

²² Ascatan nocofunu fusho icain tsain-tiroma. Ahuun nuushon yoshin chacanun tsainmapaonima nan Jesusqui ihuunifo caya huanon. Ascacun Jesús nan nocofunu afanan oinmasharafain tsainmani. ²³ Ascaiton oincani mustaiaricatan afiranan yoinancaquin yoinifo, –Jesús ahuamamishti shara huatiro. Asca nan naraca David ahuun funa. Nan Upa Diosin catonni, –ishon yoinifo.

²⁴ Ascaifoa nicaquin Fariseofan yoinifo, –Ma. Atocai Upa Dioshuunshon yoshin chaca potama. Yoshin chacafoan aton niaifo Satanashuunshon yoshin chaca yorafohuunoa potatiroran, –ishon yoinifo. ²⁵ Ascano nan shinainfo cuscan onanshon Jesús ato yoini, –Mani futsafo afi ranan rutunain cuyotirofo. Nanscarifiai pushurasi anoa icafo iyamarai pushu fusti muran icafo afi ranan chaca huatananfaincani pashcanantirofo afanancai tsoa anosi itiroma. ²⁶ Nanscarifiai Satanás niaifoa afu yoshin chacafo potaquin ahuun yono chacana huatiro. Asca huaquin ahuun yono cuyocointiro afu yoshinfocai afanan afu itirofoma. ²⁷ Ascafia manfin yoimisiqui Satanás curushhuunshon yoshin chaca potaran ishon man yoimisiquin. ¿Un asca huaino tsohuunshon mato yorafoan

yoshin chacafo atomaquinoari potafomun? Ascacun nanfohuunshon man tapitiro man uhuunoa amaquiri shinanchacai cuscan. ²⁸ Un Diospan Yoshin Sharahuunshon yoshin chacafo atomaquinoa potaino maton Numamisi Diosin catonni cuscan matoqui nocoa.

²⁹ Afanan mato yoi nicasharacahuun. Ahuuscashomain yorafoan nocofunu mutsisipaton ahuun pushu cushu ano ahuun mafo onutiroma. Ascafiaino finoncaia aqui nocoshon achifain munushquin ahuun mafofo cuyonfiatocai ahuusca huatiroma.

³⁰ Tsoan unfu rafupaiquima ua nicacasmai. Tsoan uhuun tsain nicacasmaifin ua noicasmaiquin. ³¹ Ascano un mato icon yoiquin. Ratoran ahudara chaca huai Diosquiri Upa Diosin rau huashotiro. Ascanfia ratoranton yoia isca huaquin, "Nanton aca cuscan Satanashuunshon acaran," huafishu Diospan Yoshin Sharahuunshon aca. Nanton Diospan Yoshin Sharahuunshon tsain chaca huaa. Asca huacun Upa Diosin ahuun chaca rau huanacama. Ahuun chaca ahuun nuupacunaca. ³² Tsoan ua chaca huafin un ahuun chaca rau huashotiroquin. Ascan tsoan Upa Diospan Yoshin Sharaqui tsain chaca huacai Upa Diosin rauhuanacama. Ahuun chaca ahuun nuupacunaca. Natian naitianri ahuun chaca ahuun nuupacunaca.

*Fimi fana ahuun fimihuunshon non onantiro
Lc 6.43-45*

³³ Ascano shinancapon. Fimi fana naman non orosharaino fana foaisharatiro. Ascashu ahuun

fimirifi sharacoin itiro. Ascan non fana namano oroamacai fana foaisharatiroma. Ascashu ahuun fimiri chacacoin itiro. Fimi fana ahuun fimihuunshon non onantiro ahuu cusaramainquin. ³⁴⁻³⁵Nanscarifiai nocofunu sharapan ahuun nomuranshon ahuara sharafosi shinain cuscan ahuun tsainrifi sharacoin itiro. Nanscarifiai nocofunu chacapan ahuun nomuranshon ahuara chacafosi shinain cuscan ahuun tsainri chacacoin itiro. Ascano nocon ointi muranshon non shinain cuscan nannoricoin non yoitiro. Ascan manfin nan rono paupaton facu cuscarafokin. Ascacun ahuuscashotsi chacacoinfiashon man ahuara shara yoitiro.

³⁶ Ascacun un mato yoi. Ratoran shafatan Diosin nantifi yorafo ichanan huaitian ato yoipacushqui ratotonmain icoinra huamisi iyamarai icoinra huamisimaquin. Nantianri ahuashta shinantama yoimisifo cuscan ato puashoshquin. ³⁷Ascashon man niyoano nantifi man yoimisi cuscan Upa Diosin mato nicamashquin. Ascan mato tsainhuunshon man afu ipatiro iyamarai mato omitsiscapanacafo muran mato potairan, –ishon Jesús ato yoini.

–Tsoan atiroma cuscan noco ismahuu non mia icoinra huanon, –ishon yora chacafaan Jesús yoinifo

Mr 8.12; Lc 11.29-32

³⁸ Ascaiton Fariseofo futan Moisés cununi cuscan tapimamisifoan yoinifo, –Tapimamisiton, tsoan atiroma cuscan noco ismahuu min Dios ariashu oa non mia icoinra huanon, –ishon yoiaifoan.

³⁹ Jesús ato cumani, –Manfin chaca shinanfain Dios cachiquiri huamisiquin. Ascacun tsoan atiroma cuscan noco ismahuu ishon man ua yoia. Ascafia nan Diosin tsain yoimisi mato shuni Jonás ani cuscacoin un chipo mato ismaiton nan fusti man oinshquin. ⁴⁰ Jonás shimanoan shaqui muran osha rafu non fusti iyoní cuscan. Nanscarifiai un Diospan Facu mai muran osha rafu non fusti un iyoshqui. ⁴¹ Ratoran shafatan Diosin nantifi yorafo ichanan huaitian ato yoipacushquin ratotonmain icoinra huamisi iyamarai icoinra huamisimaquin. Ascaino nantianri Nínive ano ipaonifoan matohuunoa yoishcani isca huacaquin, “Jonás noco Diosin tsain yoini cuscan non nicacoinshon nocon chaca shatucoinshon non Dios icoinra huani. Asca man manfin Diospan furucoin nicafishocai maton chaca man shatumisimaran,” ishon mato yoishquin. Nan icon un Jonás finonfiacuai man ua nicapaimisima.

⁴² Nanscarifiai Diosin nantifi yorafo ichanan huaitian ato yoipacushquin ratofomain afu ipatiro iyamarai omitsiscapanacafo muran foshquicaniqui. Ascaino nantianri nan ainfo Sabafoan ato niaifo ipaoniton matohuunoa yoiquin isca huashquin, “Salomón tapicoian cuscacai tsoan futsan tapipaonima. Ascacun ahuun tsain nicapaicoin un aqui chaicunoashu cani. Ascan mancai nan Diospan Furun nicapaima. Ascatarocon man nicacasmaoniran,” ishon matohuunoa yoishquin. Nan icon Salomón tapicoian ipaonifia uncaifin fasi Salomón finoncoinfiacun mancai ua nicapaima.

Yoshin chaca afanan yoraqui nasotiro
Lc 11.24-26

⁴³⁻⁴⁴ Yoshin chaca nocofunumaquinoashu cai tsoan istaipama ano cani shara futsa funai cai anoshon tunushquin. Ascfia fuchiamacaiqui yoshin chacanun afanan shinanqui isca huani, “Unfin nan nocofunuun ipaoniquin. Ascacun un afanan aqui nasoiran,” ishon shinanni. Ascatan aqui nocoshon oian tsoa futsacai afu rafua inima. ⁴⁵ Ascacun nan yoshin chacanun afu yoshin chacafo siete ato ihuuni nan fasi chaca finacai fo. Ascashon ato yoiqui isca huani, “Nocofunu un mato ismai non ahuun nomuran iquitiroran,” ishon ato yoini. Ascatan aqui focanashu iquicainaifoanno nan nocofunu fasi mimacai chacacoin ini. Manmain aqui rananri focun. Nanscarifiai maton shunifoan chaca huafiapaonifo mancaifin fasi chaca huaquin finacoianquin, — ishon Jesús ato yoini.

Jesús ahua yafi ahuun ushtofu
Mr 3.31-35; Lc 8.19-21

⁴⁶ Ascatan Jesús yorahuanrasi yoi tsaincai muran ahua yafi chipocufu noconi. Ascano aqui iquishon ahua yoi paifiacaquin chifishon mananifo. ⁴⁷ Ascaiton futsan yoini, — Min uhua futan ushto rananun chifi nishon mia ahua yoi pai fuaforan, — ishon yoi aiton. ⁴⁸ Jesús cumani, — Un mato tapimai ratofomain uhuun uhuafo yafi uhuun ushtofuquin, — ishon yoini. ⁴⁹ A tanamisifo oinyacuquin ato yoini, — Nafofin uhuun uhua cuscarafu yafi uhuun ushto cuscarafuquin. ⁵⁰ Nan

uhuun Upa Dios nai ari icaton ato amapaiyai cuscan huaifo nanfofin uhuun ushtofu yafi uhuun chicofo non uhuun uhuafoquin, –ishon Jesús ato yoini.

13

Fimi ushu saacaihuunoa cuscara ato Jesús yosini tapinonfo

Mr 4.1-9; Lc 8.4-8

¹ Ascatan nan shafatari Jesús pushu murannoashu cai ian cusumun tsaoni. ² Ascaino aqui yorahuanrasi funifo ahuun tsain nicapai cani. Ascaino shasho muran nanuinacahuan ahuun cusha camaqui tsaoshon ato yoini. ³ Ascashon ahudara futsahuunoa cuscara ato yoini ato tapimashquin. Yoini isca huani, –Nocofunun ahuun noshati murannoa fimi ushu fishon ahuun mau mamaqui saani. ⁴ Saacano ushufo fai nushmancayan pacua puiyafoan piinifo. ⁵ Ascano ushu ranan toquiri camaqui pacua mai ichapamashta anoashu samamashta ushu foaica. ⁶ Fari tsacaqui yositimahuaino man naa. Ahuun taporicai chai foama ini. Ascashu fanafo nai cuyoa. ⁷ Ascaino ushu rananri tasha murannoashu foaifashucaí ushu futsa foaisharanima. ⁸ Ushu rananri mai shara ano saaca nan mai sharanoashu nantifi foaisharashu fimi ichapayacoin ini. Futsa cien fimiya icaino futsa sesenta aya icaino futsari treinta fimiya ini. ⁹ Ascán manmain ua nicatiroquin ua nicacahuun uhuun tsainri maton nomuran nanucoincahuun, –ato huani.

Ahuuscaquimun futsafo yoifiashon Jesús afu rafuafosi shafacafi ato tapimaniquin

Mr 4.10-12; Lc 8.9-10

¹⁰ Ascaino non afu rafua aqui fucashon yocanon, —¿Ahuuscai shafacafi ato yoitama ahuahuunoa cuscara min yorafo ato tapimashquinmun? —ishon non yocani. ¹¹ Jesús ato cumani, —Ahuuscashomain Upa Diosin ahuun yorafo iquiniquin mato fusti tapimai. Ascan nafocai ato tapimaima. ¹² Ascan tsoan Diosin tsain nicasharafain ahuun nomuran nanucoian naanfin Upa Diosin paratamari tapimashquin. Ascafia tsoan ichapama tapifiashon Diosin nicasharayamafain nan yoia cuscan aima nanfin funoshquiquin. ¹³ Ascacun nan yorafo un ahuara futsahuunoa cuscara un ato tapimashquin oinfiacashon tapinonfoma. Nicafiacquiri tapinonfoma. ¹⁴ Nannori Isaías nan Diosin tsain yoimisi ipaoniton atohuunoa inon pacoai yoiqui isca huani,

“Man nicafafaifiaquicai Diosin ato yoiai cuscan tapinacafoma. ¹⁵ Nan yorafoan aton ointi curushcoinyashu nicayosmashunifo. Diosin tsain man nicamisi-fishu nan nicama cuscarafo. Uhuun yonoshara oinfiacani nan futsoi cafiscafo. Ascashon un ato isma cuscan oianfoma. Ascayamacanashu uqui fucuanafu un ato chaca soashonon uhuun yora sharafo iishcaqui,”

ishon Diosin yoini cuscan Isaiasin cununi.

¹⁶ Ascafia nannori Isaías cunufiani mancai as-carama. Ascatarocon un mato oinmana cuscan man icoinra huafain un mato yoia cuscan

man nicacoinmisi. Ascashu maton nomuran man unimacoinna. ¹⁷ Un mato icon yoi. Man oian cuscaai uhuun Upa Diosin ahuun tsain yoimisifo futan a tanamisi futsafoanri fasi oinpaifiaquicai tsoan oinpaonima. Un mato yoimisi cuscan fasi nicapaifiaquain tsoan nicapaonima.

Fimi ushu saamisihuunoa yoiflashon shafacafi afu rafuafo tapimani

Mr 4.13-20; Lc 8.11-15

¹⁸ Nan fimi ushu saamisihuunoa un ato yoia cuscan natian shafacafi un mato tapimai. Ascacun ua nicasharacahuun tapisharashquin. ¹⁹ Ascan nan Dios ahuun yorafo iquinai cuscan nicaflashon tapiama. Nanfofin nan ushufo fai ano pacua cuscarafuquin. Diosin tsain ato nomuran man nanufiafo nan yoshin chaca Satanás atoqui oshon nicafo cuscan ato fiantiro afanan afohuunoa shinanonfoma. ²⁰⁻²¹ Ascano futsafoanri Diosin tsain nicaquin tau huai unimacoinyofiafashu samamashta ahuun tsain cachiquiri huua. Ascan nanfofin nan ushufo toquiri camaqui pacua cuscarafuquin. Nanfori nan ushufo toquiri camaquinoashu foaifia ahuun tapo chai foama. Samamashta nai cuyotiro. Nanscarifiai nanfoancai Diospan tsain aton nomuran nanu sharafoma. Ascashon ahuara chaca finonyamarai futsafoan ato omitsisca huaino samamashta Dios cachiquiri huatirofo. ²² Ascan ushu futsafo moshafomuran pacuashu foaisharatiroma. Nanscarifiai futsafoan Diospan tsain nicaflashon ahuara nan acai cuscan fustisi shinain. Ascashon pui ichapa yafi mafo ichapa noi afi paramuquicai afanan Dioshuunoa shinantiroma. Ascaquicai Diosin

ato amapaiyai cuscan futsafo shara huatiroma. ²³ Ascfaiaquin ushu futsa mai shara ano saacano foaiquin yosiashu fimi ya itiro. Nanscarifiai futsafo Diospan tsain nicafein tapicanashu nan yoia cuscan aafu. Ascashon nanfoanfin futsafori Diospan tsain yoiquin icoinra huamatirofoquin. Futsan treinta iyamarai sesenta iyamarai cien yorafo icoinra huamatiroran, –ishon Jesús ato yoini.

²⁴ Afanan Jesús ato tsain futsa yoini tapinonfo. Isca huaqui, –Diosin nantifi iquinano nanscarifi aquin nocofunun ushu sharafo fana. ²⁵ Fana sharafishu ahuun noicasmamisiton yamu ahuun mau ano caa. Mau ifo ahuun oinmatifo oshano noicasmamisiton tashafori mau ano fana. Fanatan mau anoashu caa. ²⁶ Chipofin nan ushu shara foaicaino tashafori foaini. ²⁷ Ascano aqui fucashon mau ifo ahuun oinmatifoan yoinifo, “¿Ifon, min ushu shara min mau ano fanamamun? ¿Ahuuscaimun natian tashafori foaicaquin?” ishon yocanifo.

²⁸ “Noco noicasmamisiton acaran,” huaiton. “¿Ascan nan tashafo non tsucái fotiromun?” huaifoan. ²⁹ “Ma. Man tasha tsucaino nan fana sharafori tsucapayamafiaquin man afori tsucatiro. ³⁰ Nanscanonquin. Chitunmisitian tashafo yafi fana sharafori foaitiro. Nantian un mau yonomisifo yoishquin isca huaquin, ‘Iquisi nan tashafo tsucacahuun. Nantifi nushasharahuu coashquinon. Asca huatanfin nan fanasharafori uhuun tapasi muran ua fushotacahuun,’ ” mau ifoan yoiaran, –ishon Jesús ato yoini.

Mostaza ushuhuunoa Jesús ato yoini

Mr 4.30-32; Lc 13.18-19

³¹⁻³² Ascasho Jesús mostaza ushuhuunoa ato yoini ahuara futsa ato tapimashquin. Ato yoiqui isca huani, —Nocofunun ahuun mau ano mostaza ushu fanani. Rato fimi ushu futsacai mostaza ahuun ushu uhuapamashtatioma. Ascafia foaica fasi cuya itiro. Rato pushu umainti fimi charo fanacai mostazatioma. Ihui noconan rafutiro. Ascatan yosiano puiyafo ahuun tushpahuu tsaotiro. Nanscarifiai Diosin ahuun yorafo iquisi fustirasi ifiashu chipo paratama caitioran, —ishon ato yoini.

Jesús misi farashatihuunoa ato yoini nanhuunshon Diosin nantifi yorafo iquinai cuscan tapinonfo

Lc 13.20-21

³³ Ascan Jesús ahuara futsa ato yoini Diosin nantifi yora iquinai cuscan tapinonfo. Afanan ato yoiqui isca huani, —Diosinmain ahuun yorafo ahusca huatiroquin un mato tapimai. Diosin ahuun yorafo nantifi ato iquifain ato yonotiro. Ainfoan farashati ichapamashta harinaya osishon camisconano farashinitiro. Nanscarifiai Diospan yorafoan nan icoinra huamafo muranshon nantifi ato shara huatiro, —ishon ato yoini.

Jesús ato yoiyai cuscan ahuara futsa tapinonfo

Mr 4.33-34

³⁴ Ascatan ahuarahuunoa yoiqui Jesús ato yoini tapinonfo. ³⁵ Nannori Diosin tsain yoimisiton nan Jesús yoinon pacoai cuscan cunuqui isca huani, “Un ato ahuara futsahuunoa ato yoi ato tapimashquin. Upa Diosin nantifi onihuani chain tsoan ascara

nicayomisima cuscarafu un ato
yoishquiran,”
ishon yoini cuscacoin man aa.

*Trigo yafi faasi foaitirohuunoa Jesús shafacafi
ato tapimani*

³⁶ Ascatan yorahuanrasi anoashu cai pushu muran iquini. Ascano non afu rafuafo aqui caashon non yocani, –Ifon, min trigo muran faasi foaitirohuunoa yoia cuscacai non tapiama. Shafacafi noco yoihuu non tapisharanon, –ishon non yocani.

³⁷ Ascaiton noco cumani, –Diosifi ua nichiniquin. Un nan ushu fanamisi shara cuscara inon. ³⁸ Nan maufin nantifi manifotihuunoaqui. Ascan nan ushu sharafofin Diospan yorafihuunoaquin. Ascan faasifin icoinra huamafona nan yoshin chaca ahuun yorafuquin. ³⁹ Ascan nan mau ifo noicasmamisi nanfin Satanasquin. Ascan nan fana fiaifotianhuunoaifi nan manifoti cuyotirohuunoaquin. Nan fana fimisfofin Diospan oinmatifo afu nai muran icafo.

⁴⁰ Nan faasi mushashon coafo cuscan huaquin. Nan manifoti cuyoaitian. ⁴¹ Uhuun oinmatifo ufu nai muran icafo un nichishquin nantifi futsa chaca huamamisifo yafi nan chaca huafafainaifo uhuun yorafomaqui ato pashcashcani. ⁴² Ascashon nan omitsiscapanacafo chi urumanhuan muran ato potano nannoashu fasi uaicani omitsiscacoinshcani. ⁴³ Ascaino nantianri Diospan yora shara icoinra huafoti aton Upa Dios

icanoashu fari chasha cuscarafu. Ascacun man-main ua nicatiroquin ua nicacahuun. Uhuun tsain maton nomuran nanucoincahuun.

Ahuara sharashta onuahuunoa cuscarafin ato yoini

⁴⁴ Nocofunu mai futsa ano caa. Nannoa ahuara sharashta paratama ahuun pui nuua fuchia. Ascacun fuchishon nannori afanan onua. Ascashu fasi unimacoinquin nan aya cuscati inanmitsashon nannoa mai fia nan ahuarashta paratama ahuun pui nuuari ahuuna inon. Nanscarifiai Diospan yorafo nantifi aya cuscan afiri inanmutiro Dios fu ipashcaquin.

Perla funoahuunoa Jesús ato ahuaro futsa tapimani

⁴⁵⁻⁴⁶ Diosin ahuun yorafo ahuu cuscaramainquin afanan un mato yoiqui isca huai. Mafo inanmitsamisi cahuancacaini macush cuscara perla oshopa sharashtafo funafoanfainni. Ascashon man futsa anoa fuchia ahuun pui paratama nuua fuchishon nan aya cuscati inanmitsashon ahuun rafanan nan perla fi ahuunacoin inon. Nanscarifiai Diospan yorafo nantifi aya cuscan afiri inanmutiro Dios fu ipashcaquin.

Nushutihuunoa Jesús ato yoini ahuara futsa ato tapimashquin

⁴⁷⁻⁴⁸ Ascano nushumisiton ahuun nushuti uhuapa pochishon shiman futsa futsatapafu fini. Ahuun nushutininhuan shiman fospiano unuhuan cusumun cashon nini funi. Ascashon nan shiman chacafo nushuti murannoa tsucashon potani. Ascanshon nan piti sharafosi shihuati muran nanuni. ⁴⁹ Nanscarifiai manifoti

cuyoaitian Diospan oinmatifo afu nai muran icafo nococashon nan chacafo yafi sharafo pashcanan huashcani. ⁵⁰ Ascashon nan chacafoti chi urumanhuan muran ato potashquin nannoashu uaiqui fasi omitsiscapashanonfo, –ishon Jesús ato yoini.

⁵¹ Ascatan afu rafuafonon Jesús noco yocaiton, –¿Un mato yoia cuscan nantifi man man tapiamun? –ishon noco yocaiton. –Ai. Min noco yoiai cuscan nantifi man non tapiaran, –non huaiton.

⁵² –Ratoran futsafoan Moisés yononi cuscan tapimamisifo nan Diosin ahuun yorafo iquimai cuscan tapiafo. Ascan nanfofin nan mafo inanmitsamisi cuscarafquin. Mafo inanmitsamiston yorafo nan yopaifo cuscan inantiro. Ahuara shunifo iyamarai funa ato inantiro. Nanscarifiai tsoan Moisés cununi cuscan yafi un mato rama Diospan yorafihuunoa tapimanai cuscan huafain marifi man futsafo tapimatiroran, –ishon noco yoini.

Jesús afanan Nazaret ano cani

Mr 6.1-6; Lc 4.16-30

⁵³⁻⁵⁴ Ascano noco yoia cuscan ahuara futsa tapinonfo anaititan Jesús nan pushconi pushurasi ano nasoni. Ascatan Israelifoan aton ichananti pushu muran iquishon ato yoiaiton ahuun tsain nicacani mustairicatan yoinifo, –¿Ahuuscai na nocofunun fasi tapi sharacoianmun? Tsoan atiroma cuscan huapaiquifin atiroquin. ¿Tsoanco Jesús ascara tapimanamun? ⁵⁵ Nanfin ihui sapa yonomiston ahuun facuquin. Ahuun ahuan Maria. Ahuun

ushtofori Santiago yafi José non Simón non Judas. ⁵⁶ Ahuun poifori no fu imisifo. Man nonfin Jesús onanquin. Aacai ahuama. ¿Ascan ahuuscashomun ahuamamishti huatiroquin? —icashu yoinannifo. ⁵⁷ Ascashon nannori ahuunoa shi-nanchacaquicai tsoan icoinra huapainima.

Ascaiton Jesús ato yoiqui isca huani, —Nantifi mai anoshon Diosin tsain yoimisiton yoiai cuscan nicapaitirofo. Ascafia nan cainni anoshon fusticai tsoan nicapaitiromaran, —ishon ato yoini.

⁵⁸ Ascano nannoshon icoinra huaiyamaifoon tsoan atiroma cuscan fustirasi huani.

14

Juanpan yorafo unu muran iquimapacutan nani cuscan

Mr 6.14-29; Lc 9.7-9

¹⁻² Ascano nantian Herodes nan Galilea mai anoa ato niaifoon Jesushuunoa nicaquin ahuun oinmatifo yoini isca huaquin, —Nanfin Juanqui. Un tushtumayamua afanan man funia. Ascashofin Diospan curushuunshon tsoan atiroma cuscan huafafainiquin, —ishon ato yoini.

³⁻⁴ Herodes Juan rutumanataima yoiqui isca huani, —Niaifo Herodes, min ushto Felipe ahuun ahuin min fia. Ascaquicai min shara huama. Noncon shuni Moisés Diosin tsain cunuqui isca huani, “Futsan ahuin min fitiromaran,” ishon Moisés cununiran, —ishon Juanpan Herodes yoini. Ascaiton nicai Herodes fasi sinacoinquin ahuun ranushumuafao yononi Juan achishon cunu muran iquimanonfo. ⁵ Ascashon Herodes Juan ruturiscapafiaquicai funa rutunima yorafoanmain

Juan fuchipaiyaifoanfin. Ascashon nanfoanri yoinifo, —Juanfin Diospan tsain yoimisiquin, —ishon ahuunoa yoinifo. Ascacun Herodes shinanquin isca huani, —Un Juan rutucun ua yorafoan asca huatiroran, —ishon shinanni. Yorafoqui ratuquin Herodes Juan cunu muran iquimafishocai funa rutunima.

⁶⁻⁷ Ascano Herodes cainnitian yorafo ichananni fuusishcaquin. Ascashu ichananfoanno Herodías ahuun facu shomaya arusu aton ointaifi mononi. Nan Herodías Herodes ahuun ushto ahuin ini. Ascashu shomaya monoaino Herodes fasi unimacoinquin yoini, —¡Aicho! Min monoai cuscan un fasi miqui unimai. Ahuarashta fipaiquin ua yoihuu un mia inanon. Diosin tapia un mia icon yoiaiton min fipaiyai cuscan un mia inantiroran, —ishon yoini.

⁸ Ascashon cashon shomayaton ahua yoini. Ascacun nan ahuan yoia cuscan nasocura niaifo Herodes yoini, —Juan nan yorafo unu muran iquimapacumisi tushtuhuu. Purato naratashon ahuun mapo ua inanhuun, —huaino. ⁹ Niaifon Herodes puusinima. Puusitama ahuun nomuran shinanqui isca huani, —¡Ohua! Un Juan tushtumapaima. Ascafia yorafoan un shomaya yoia cuscan man nicafo. Ascacun un asca huapaiyamafiaqui un aquicairan, —ishon shinanni.

¹⁰ Ascashon niaifon ahuun ranushumua yononi, —Juan tushtushon ahuun mapo ua fushotahuun, —huani. ¹¹ Ascaino cashon ranushumaton Juan tushtushon ahuun mapo purato naratashon funi. Fushon niaifo inancun nan niaifonri shomaya inanni. Ascano shomayaton arifi ahua inanni.

¹² Ascashon afu rafumisifoan Juan nicacani fofashon ahuun caya mai huanifo. Ascatan fofanashu Jesusqui chaninifo.

Jesús cinco mil nocofunufu pimani

Mr 6.30-44; Lc 9.10-17; Jn 6.1-14

¹³ Ascashon Herodes Juan tushtuma nicai Jesús shashon tsoa icama ano cani. Jesús caa nicacani pushufoti anoashu yorahuanrasiton naman mu-fainifo. ¹⁴ Ascashu nocoquin Jesús oian yorahuan-rasi oin atohuun ramapaini. Nannoshori isinincai futsafo ato cayahuapacuni.

¹⁵ Ascano man fari caino non afu rafuafo aqui cashon non yoini, –Yorafo nichihuun. Man fari caiquin. Fonaincaniquin. Pushurasi ano yafi a chaima icafoanno ato nichihuun anoshon tushu huanonfo, –ishon non yoini.

¹⁶ Ascaiton noco cumani, –Ma. Noncai ato nichima. Mafirocon ato piimacahuun, –noco huaiton. ¹⁷ –Nonfin nuno misi siete yafi shiman rafu ayaquin, –ishon non yoini. ¹⁸ Ascaiton, –Ua fishotacahuun, –noco huani. ¹⁹ Ascashon yorahuanrasi yoini, –Nanno faasi camaqui tsaocahuun, –ato huani. Ascatan shiman rafu yafi misi mucu fustiti tsoomashon nai ari foisinifoantan Apa Dios cufinquin, –¡Aicho! Upan, mihuunshon un ato pimani. Min fasi sharacoincun, –huatan. Misi torupacutan shiman rafu ya oshon noco inanni non ato pashcanan huapanon. ²⁰ Ascashon picani mayancoinnifo. A picaquin tushu huafo non afu rafumisifoan doce shihuati fospi huani. ²¹ Nan piaifo cinco mil nocofunufoosi ini. Ainfofo yafi

facufocai non tanan huanima. Asca nanfoanri ato futan piinifo.

Jesús unu fumancayan cani

Mr 6.45-52; Jn 6.16-21

²² Ascashon ato pimaquin anaititan Jesús noco yoiquin isca huani, —Shashon rufoko oquiri pocui focahuun. Un na yorafo ato nichiyonon, —ishon noco yoini. ²³ Ascashon man ato nichiqui anaititan arus fusti machi ano caashon Apa Dios fu tsainni. Man fari caino arus fusti ini. ²⁴ Ascatan afu rafuafo shasho caino ian nushmancayan nocoqui fuuhuan noconi. Ascashu ian fuchoquin noco catima huani.

²⁵ Ascashu man faquishiaino non oian Jesús ian fumancayan nocoqui ofiatocai non onannima. ²⁶ Onanshma ratucoin non fiisini. “Yoshiran,” icashu non fiisicaiton. ²⁷ —Unqui. Ratuyamacahuun, —ishon Jesús noco yoini.

²⁸ Ascaiton Pedronun yoini, —Ifon, minmainquin uarifi mia ano cunahuu. Urifi un ian fumancayan canon, —huaiton. ²⁹⁻³⁰ —Ohuu, —Jesús huaino Pedro shasho naquinoashu fotopacucahuan ian fumancayan Jesús ari caafiain oian fuunhuaquin ian fuchoaiton oin ratui iquipacucahuanqui yoini, —Ifon, ua ari mutsoinifoanhuun, —Pedronun huani. ³¹ Ascaiton Jesús samamashta mutsoinifoanquin yoini, —Miancai ua icoinra huacoinnama. Ahuuscaquimun mian icoinra huamaquin, —ishon Jesús yoini.

³² Ascantan nan rafu shasho muran nanuini-foanafono fuu nishmapacufoanni. ³³ Ascano non shasho murannofo fasi aqui unimacoinquin non

yoini, –Iconfinquin min Diospan Facu, –ishon non yoini.

Genesaret anoshon Jesús isinincaifo ato caya huapacuni

Mr 6.53-56

³⁴ Ascatan ian pocufaini Genesaret ano non noconi. ³⁵ Ascashu non nocoaiton nannoafoan samamashta Jesús onancashon a chaima icafori ato tapimanaino nicafuracani fucaquin aton yora isinincaifo Jesusqui ihuunifo. ³⁶ Ascano fucashon Jesús yoinifo, –Noco yora isinincaifo min sahuuti cupanan fusti ato muumahuu cayanonfo, –ishon yoinifo. Ascatan ahuu sahuuti muuncanashu cayapacunifo.

15

Nocofunun ahudara chaca huatiro cuscan

Mr 7.1-23

¹ Ascano Fariseofo yafi Moisés cununi cuscan tapimamisifori Jerusalén anoashu Jesusqui funifo. ² Fucashon yoinifo, –¿Ahuuscaimun nocon shunifoan piataifoma muchoquimupaonifo cuscacai mifu rafuafoan asca huapaicanimaran? –ishon yoiainifo. ³ Jesús arifi ato yocani, –Ascan ahuuscai marifi maton fuyamisi fustisi man tanapaiyain. Ascashofin Diosin yononi cuscan huatamarocon nan maton shunifoan amaquri yosimisifo cuscan marifi man nansca huamisiquin. ⁴ Ascacun Upa Diosin yonoqui isca huani, “Maton upa yafi uhua nicasharafain ato shara huacahuun. Ascan tsoan apa iyamarai ahuaqui tsain chaca huacun ato rutumacahuun,” ishon yononi. ⁵⁻⁶ Nannori yononifanicun manfin

noco yorafo yoiquin isca huamisiquin, “Maton upa iyamarai mato uhua man yoiqui isca huatiro, ‘Nantifi uhuun pui un aya cuscan mun Dios inan. Ascacun un mia ahua inanpaifiaquicai un mia inainmaran,’” ishon yoiquicai mato upa yafi uhua man afanan ahua inantiromaran, ishon man fasi ato amaquiri yoimisi. Anori yoiquicai Diosin yononi cuscacoin man aima. Ascaquifin nan mato fuyamisi fusti man tanaqui. ⁷ Ascashufin man paramitsamisifoquin. Nan Diosin tsain yoimisi Isaías inon pacoai cuscan icocoinquin matohuunoa yoiqui isca huani,

⁸ “Nan yorafoan uhuunoa yoisharamisi-fiashocai aton nomuranshon ua shinancoianfoma. ⁹ Ipaitsi ichananshu fanaincai ua cuficani. Yorafo tapimamisifo cuscaai Diosin tsaincoinma. Nanfoan aton nomuran shinainfo cuscan futsafori yosimisiforan,”

—ishon Isaías cununi.

¹⁰ Ascashon nannori Fariseofo yafi Moisés cununi cuscan tapimamisifo ato yoitan Jesús yorahuanrasi cunaquin isca huani, —Uqui fucahuun un mato yoinon. Ua nicafain un mato yoiai cuscan tapisharashcaquin. ¹¹ Ahuarafo non piatocai noco ointi chaca huatiroma. Nocofununfin ahuan nomuranshon nan shinain cuscan yafi nan yoia cuscan chaca huatiroquin, —ishon ato yoini.

¹² Ascaino non afu rafuafo aqui cashon non yocani; —¿Ifon, man min tapiamun nan rama min Fariseofo yoiai cuscan nicacani sinacani-ran? —ishon non yoini. ¹³ Ascaiton noco

yoiqui isca huani, —Mau ifoancai ahuara chacafo fanatiroma. Ascatafin foaicun tsucashon potatiro. Nanscarifi aqui uhuun Upa Dios nai muran icatocai nan Fariseofo yonoama futsafo ahuun tsain tapimanon. Ascacun nanfo chipo omitsiscapanacafo muran ato potashquin. ¹⁴ Ascacun nanfo shinanyamacahuun. Fushocai afu fusho raqui iyotiroma. Iyopai afu shato muran pacutiromo. Nanscarifiai Fariseofoancai Diosin tsain tapishoma futsafo yositiroma atofu funotiromo. Ascashu Dios ari tsoa nocopacunacafomaran, —ishon ato yoini.

¹⁵ Ascaiton Pedronun yoini, —Min ato yoia cuscan shafacafi noco tapimahuun, —ishon yoini.

¹⁶ Ascaiton Jesús noco yoiqui isca huani, —¿Ascan marifimun man nicasharama? ¹⁷ ¿Man tapiamamun ahuara man piacai mato shaqui muran nituima? Ascatafin manrocon aya poitiro. Ascan nantocai mato chaca huamatiroma. ¹⁸ Ascashon mato nomuran man shinanchacai cuscan huafain yoiashuri man chacacoin itiro. ¹⁹ Ascano aton nomuranshon ahuara chaca shinanfo cuscan nanscacoïn huatiromo. Shinanchacafain rutumitsamisi icain aton ahuinma fu nocofunufu icaifoanno ainfori nanscarifiaifoanno. Ascashon ahuarari onufain futsahuunoa ahuara chaca yoiqui parafain roanmitsamisi itirofo. ²⁰ Nan chacafoanfin yorafo chaca imatiromo. Ascan nan noco shunifoan apaonifo cuscan muchoquimushoma non piatocai nocon nomuran noco shinanchacamatiromaran, —ishon Jesús noco yoini.

*Ainfoan patasharinoaton Cananea anoaton
Jesús icoinra huani*

Mr 7.24-30

²¹ Ascacaini Jesús nocofu anoashu cai nan pushurasi Tiro ano yafi Sidón ano cani.

²² Nannoashu Cananea anoa ainfo Jesusqui noconi. Nocoshon yoini, –Ifon, minfin David ahuun funaquin. Uhuun ramapaihuu. Uhuun facu ainfoshta fasi omitsisca. Yoshin chaca ahuun nuushon omitsisca huamisi. Uhuun facu ua caya huashopun, –ishon yoiriani. ²³ Ascaiton nicaflaiguicai Jesús cumanima. Ascaiton non afu rafuafoan yoini, –Ifon, na ainfoan mia yocariaquin noco fucash huaiquin nichihuun, –ishon non yoini. ²⁴ Ascashon Jesús ainfo yoini, –Uhuun Upa Diosin ua Israel ano fusti nichini. Nanfomain nan chashoanun facu funoa cuscarafocun. Ascan uacai caifo futsa ano nichinima, –huaiton.

²⁵ Nicaiyainfo Jesús naman ratoconun mai chachipacufoan yoini, –Ifon, uhuun facushta ua cayahuashopun, –huani. ²⁶ Ascaiton Jesús afanan cumani, –Apacai ahuun facufoan tushu pashnafo inantiroma. Ascaracai sharama. Nanscarifi aqui Upa Diosin ua yonoa cuscan un Israelifo fusti un shara huashonon. Ascacucacai un caifo futsa ano catiroma ato shara huashoshquin. Un asca huaino nan Israelifo funotiro, –ishon yoiaiton. ²⁷ Ainfoanri yoini. –Icon, Ifon. Ascafia ahuara piqui tushu huafo sapa camaquinoashu potomishti pacuaiton pashnafoan pitirofo. Nanscarifi aquin Upa Diosin mia Israelifo ano nichini min ato shara huashonon. Ascafia mani futsafori miqumi nocoainfoan nanfori min ato caya

huatiro. Ascashon min ato shara huashoainocai Israelifori funotiomaran, –ishon yoiaiton. ²⁸ – Min ua fasi icoinra huacoinna. Ascacun min ua yoca cuscan un mia ashoiran, –ishon Jesús nan ainfo yoini. Asca huatanaino ainfo ahuun facu cayariscatani.

Jesús yora ichapa isinincaifo ato caya huapacuni

²⁹ Asca huatan anoashu Jesús no fu cai Galilean cusumunri cani. Nannoashu cai machi ano inashu tsaoni. ³⁰ Ascano yorahuanrasi aquí funifo. Fucaquin isinincaifo ihuunifo Jesús ato caya huanon. Isinincai futsa futsatapafo. Futsafo nipaiqui ranainfo ihuufain fushofo ihuufain ahuun caya mumamafo ihuufain tsaintiromafo ihuufain isinincai futsafori Jesusqui ihuunifo. Ascacun nantifi Jesús ato cayapacuni. ³¹ Ascashon ato caya huaa oincani mustairicatan yorafo afi ranan yoinancaquin yoinifo, –Noncai iscara oinyomisima. Tsaintiromafo natian tsaincani. Ahuun caya mumamafori natian man niisharafo. Nipaiqui ranainfori natian niisharatirofo. Jesusfin ahumamishti huatiroquin. Israelifohan nocon Dios fasi sharacoinran, –ishon yoinifo.

Jesús cuatro mil nocofunufu pimani

Mr 8.1-10

³² Ascatan non afu rafuafo noco cunashon Jesús noco yoiqui isca huani, –Un na yorafohuun ramapai. Ufu rafu non fusti oshatan icafo. Afanan tsoa tushu ayama. Ahuashtacai picanima. Ascacun uncai ato tushuoma nichipaima. Fasi fonaincani shaca fuatiroforan, –ishon noco

yoini. ³³ Ascaiton non cumani, –Nuno tsoa icamanocai non tushu fuchitiroma na yorahuanrasi pimashquin, –ishon non yoiaiton. ³⁴ Noco yocani, –¿Ahuuti misi man ayamun? –noco huaiton. –Siete non shiman ranananri non ayaran, –ishon non yoini.

³⁵ Ascaiton Jesús yorafo yoiqui isca huani, –Nanno tsaocahuun, –ato huani. ³⁶ Ascatan ato yoia cuscan tsoafoanno Jesús misi siete non shiman rananri finifoantan Apa Dios cufini, –¡Aicho! Upan, mihuunshon un ato pimai. Min fasi sharacoinquin, –huatan. Misi yafi shiman torupacutan non afu rafuafo noco inanni. Ascacun yorahuanrasi norifi non ato pashcashopacuni. ³⁷ Ascashon nantifiton picani mayancoinnifo. Ascano man piqui tushu huafo siete shihuati non fospi huani. ³⁸ Ascán nan piaifo cuatro mil nocofunufosi ini. Ainfofo yafi facufocai non tanan huanima. Ascafia nanfoanri ato futan piinifo. ³⁹ Ascatan Jesús nantifi yorahuanrasi nichitan. Noco nanuquifaini cai mai futsa ahuun anu Magadán ano no caní.

16

Fariseofo futan Saduceofoan Jesús yocanifo, –Tsoan atiroma cuscan noco ismahuu, –huanifo

Mr 8.11-13; Lc 12.54-56

¹ Ascashu Magadán ano man non nocoano Fariseofo yafi Saduceofori Jesusqui funifo. Ascano fucashon yocanifo. –Minmain Diospan facucoinquin nan Diosin nai aria icahuunshon tsoa atiroma cuscan noco ismahuu non mia icoinra huanon, –ishon yoinifo. Ahuunoa ahudara chaca ato niaiffo yoipaicaquin. ² Ascaifoan Jesús

ato cumani, –Manfin yoiquin isca huamisiquin, “Man fari caino imi poshnan. Ascan funaman-rifi nai shara itiroquin,” ishon man yoimisi. ³ Ascashon shafaino nai choshtacun man yoimisi, “Nai choshtapan fupoa. Ascan natian oi fuiran,” man huamisi. Ascashon nai foisquin man tapitiro oi fuyamaraimain ahuuscaiquin. Ascan ahuus-caquitsi Diosin mato yoiai cuscan man icoinra huapaima. Natian ahuaara ahuuscarai cuscacai man tapiama. ⁴ Man ua icoinra huayamafain chacafashon man ua yocai. Ascafia tsoan atiroma cuscan un Diosihuunshon huatirofiacai un mato ismaima. Man oinpaifiaiton. Nan Diosin Jonás ani cuscan nan fusti man chipo oinshquiran, –ishon Jesús ato yoini. Ascatan atomaquinoashu cani.

Fariseofoan yositirofo cuscahuunoa

Mr 8.14-21

⁵ Ascano man ian pocufaini cashon non shinnanni, –Non tushu ointiaquimacuranaran, –ishon non yoini. ⁶ Non ascaiton onanshon Jesús noco yoini, –Oinfain. Fariseofo futan Saduceofoan aton misi farashati cuscara fiyamacahuun, –ishon noco yoiaiton. ⁷ Nicaí nofi ranan non yoinanni, –¿Ahuuscaimun Jesús noco yoiqui isca huaiquin, “Fariseofo futan Saduceofoan aton misi farashati fiyamacahuun,” noco huai? Non tushu fucuma racan noco isca huaiquin, –icashu non yoinanni.

⁸ Ascano nan non yoiai cuscan onanshon Jesús noco yoini, –¿Ahuuscaquimun tushuhuunoasi man yoicai? Mancai ua icoinra huaa sharacoiantaima.

⁹ Ascashon mancai tapisharataima. ¿Un mucu

fustiti misihuunshon cinco mil nocofunufu un pimaita nan man shinainmamun? ¿Ahuuti shihuati fospia tushuita man ointiaquimamun? ¹⁰ ¿Nan siete misihuunshori un cuatro mil yorafo pimaita nanri man man ointiaquimanamun? ¿Ahuuti shihuati fospia tushuitamun man ointiaquimamun? ¹¹ ¿Ascan ahuuscai un mato tushucoihuunoa yoyamafaiton man tapimamun? Unfi tushuhuunoa yoi cafisca huaquin nan Fariseofo futan Saduceofoan yosiaifo cuscahuunoa un mato yoiqui, —ishon noco yoini. ¹² Ascashon Jesús noco yoiyai cuscan nicaquin non tapini tushucoihuunoa yoitama naan Fariseofo futan Saduceofoan noco amaquiri tapimapaiyai cuscan Jesús noco yoini.

*Pedronun, —Jesús Diospan facuran, —huani
Mr 8.27-30; Lc 9.18-21*

¹³ Ascatan Jesús no fu mai futsari cani. Nan mai ahuun anu Cesarea Filipino. Nanno nocoshon Jesús noco yoini, —Unfin Diospan Facufiashu un nocofunucoinquin, —ishon yoitan afanan noco yocani, —¿Yorafoan shinanmun un tsoaquin? —ishon noco yocaiton. ¹⁴ Non cumaquin isca huani, —Futsafoan yoi afin min Juanquin. Nan yorafo unu muran iquimapacumisi, ishon yoi aifoanno futsafoanri yoi quifin min Eliasquin. Ascano futsafoanri yoi afo minfin Jeremiasqui. Ascan futsafoanri yoi afo minfin nocon shunicaifo Diosin tsain yoimisi futsa afanan funiaquin, —ishon noco yoi aiton. ¹⁵ Afanan noco yocani, —¿Asca marifi man shinanmun un tsoaquin? —noco huaiton.

¹⁶ Ascaiton Pedronun cumani, —Minfin Cristoquin. Nan Diosin nipanacaton mia catonni min ahuun facuran, —ishon yoaiton. ¹⁷ Ascaiton Jesús cumani, —Simón, minfin Jonás ahuun facuquin. Diosin mia noiquin mia shara huaa. Rato nocofununci mia tapimanama un Diospan facu. Uhuun Upa Diosin nan nai muran icaton mia tapimana.

¹⁸ Un mia afanan yoi. Minfin Pedroquin, —ishon Jesús yoini. Ascan Pedrofin Israeli tsainman toquirininhuan. Tsoan putsiquitiroma. Ascasho Jesús afanan yoiqui isca huani, —Min yoia cuscahuunshon futsafoan aarifi icoinra huashquicani. Ascaifoan uhuun yorafo un ato imashquin. Yoshin chacafoan aaton curush huahuunshon ato namapaifiaquicai ato shatuyamafain aato finontiroma. ¹⁹ Tsoan shafi ya fupoti fuputiro yorafo pushu muran iquimashquin. Nanscarifi aquin un mia yonoi uhuunshon min yorafo uhuunoa yoitiro uhuun yorafo inonfo. Ascashu uhuun Upa icano iquitirofo. Min yorafo yosiai cuscan tsoa nicacasmai uhuun yora itiroma Upa Dios fu ipashcaquin. Nannori Diosin yoini. Ascan min yorafo yosiai cuscan tsoa icoinra huai uhuun yora itiro Upa Dios fu ipashquin. Nannori Upa Diosin yoini. Ascacun un mia yonoi min futsafo tapimatiro Upa Dios icano iquinonfo. Un mia shafi inain cafisca huai min ato fupushotiro iquiashu afu ipanonfo. Ascashon tsoan min yoiiai cuscan icoinra huayamashocai iquitiroma afu ipashquin. Ascan tsoan min yoiiai cuscan icoinra huacoinnashu afu ipashquin, —ishon Jesús Pedro

yoini. ²⁰ Ascatan non afu rafuafo futsafori noco yoiqui isca huani, —Unfin Cristoquin tsoa yoiyamacahuun, —noco huani.

—Unfin chipo naashquicai, —ishon Jesús ato yoini

Mr 8.31-9.1; Lc 9.22-27

²¹ Ascatan nantian yafi nan achiaifotian Jesús noco shafacafi yoiqui isca huayofafainpaoni, —Un Jerusalén ano cai. Nannoshon nocon niaiffoan ua omitsisca huafain ua ato rutumafiafo osha rafu non fustitan un afanan funishquiran, —ishon noco yoini. ²² Ascaiton Pedronun Jesús mutsofaitan yoini, —Ifon, ascayamahuu. Miacai tsoan rutupacunacama, —huaiton.

²³ Jesús ifiacucahuan Pedro yoini, —Satanás catahuun. Min ua amaquiri shinanchacamapai. Upa Diosin shinain cuscaai shinantama nan no-cofunufoan shinainfo cuscan min shinanran, —ishon Jesús yoini.

²⁴ Ascatan non afu rafua futsafori noco yoiqui isca huani, —Tsoan ua tanapaisharaquicai afi apaiyai cuscan huatiroma. Ascataka nan un yoiyai cuscacoin huatiro. Ascashon shinanqui isca huatiro, “Ua omitsisca huafiaifoanno un-cai uhuun Ifo potapacunacama. Ahuunshon ua rutufiaifoanno un tanaqui unupacunacamaran,” ishon man shinantiro. ²⁵ Ascan tsoan shinanqui isca huai, “¡Ohua! Un Jesús tanaiton raca ua omitsisca huacanicati,” ishon shinanquin uhuun tsain cachiquiri huaa. Nanscara yorafo naashu omitsiscapanacafo. Ascan tsoa uhu-unoashu omitsiscacai naa. Nanscara yorafin

nacanashu ufu isharapacunacafoquin. ²⁶ Ascan ratoran futsa nantifi manifoti anoafo ahua fia ahuunacoin ifiashu amaqui naino nantifi ahuunafo funotiro. Ascashu nantifi ahuuna iyopaonifia omitsiscapanacafo muran cainocai afanan ahuashta itiro. Ahuaracai Dios inantiro ma afu ipashqui.

²⁷ Ascatan un chipo nai murannoashu mai ano fotoaino nan uhuun Upa cuscaracoin iishqui. Ascashu un chasha curanaino uhuun oinmatifo ufu nai muran icafo ufu fotoshcani. Nantianri un nantifi yorafoan aton niaifocoin iishquin. Ascashu nan yorafoan acafo cuscan un ato inapacushquin. Nan shara huamisifo un ato inansharafain un ato unimamashquin. Ascan nan chaca huamisiforicai un ato ahua inansharashquima. ²⁸ Ascacun icon un mato yoi. Man futsa nuno ufu niaton naataishoma un maton niaifo Upa Dios cuscaracoin un icaiton man oinshquiran, —ishon Jesús noco yoini.

17

Jesús fianananriscatani

Mr 9.2-13; Lc 9.28-36

¹ Ascano man seis osha finontan Jesús Pedro non Juan non Santiagori machi cuya pochinshon ato iyoni. ² Ascan nannoashu aton ointaifi Jesús ahuun yora mumacoin fianananriscatanaino ahuun fusori fasi chashacointani. Nan fari chashai ointsa. Ahuun sahuutiri oshopacoin nan yoa rama furoa ointsa ini. ³ Ascaino nantianri Moisés yafi Elías aqui niriscatanifo. Ascashu nan rafu Jesús fu tsaincaiton oinnifo. ⁴ Ascaiton

Pedronun yoini, –Ifon, nuno non icashara itiro. Man ascapaiyaiton un mato tapasi rafu non fusti huashotiro. Mina futsa non Moisésna futsa non Eliasna futsa un mato ashotiroran, –ishon yoini.

⁵ Ascashu Jesús fu tsaincaino coin osho shara-coin atoqui cuyopacuni. Ascaino coin muran-noa oi nicanifo yoiqui isca huaiton, –Nanfin uhuun Facuquin. Un fasi ahuun noi. Nanfin un catoanquin. Un aqui unimacoin. Ascacun a nicacoincahuun, –ishon Upa Diosin yoini.

⁶ Ascaiton nicacani fasi ratucoincani fuopacufoannifo. ⁷ Ascaifoan Jesús ato pumanqui yoini, –Funicahuun. Ratucaquima, –ishon ato yoini.

⁸ Ascaiton foisinifoanquin oianfo Jesús fusti nia ini.

⁹ Ascatan machi pochininnoashu fotoshon Jesús ato yoiqui isca huani, –Nan man rama oian cuscan tsoashta yoiyoyamacahuun. Nan un naashu afanan funiano man rama oian cuscan man yorafo yoitiroran, –ishon ato yoini.

¹⁰ Ascaiton nicacaquin afu rafuafo yocanifo, –¿Ascan ahuuscaquimun Moisés cununi cuscan tapimamisifoan noco yoimisifo isca huaquin, “Nocon Numamisi Cristo nan Diosin catoan nocoqui oataima rufofo Elías oshquiran,” ishon noco yoimisiforan? –huaifoan. ¹¹ Jesús ato yoini, –Icon. Elías rucun oitautiro. Oshon nantifi ato imasharapai aton chaca shatunonfo. ¹² Ascan man ofiacucai tsoan onannima. Nan chaca huapaiyaifo cuscan fusti nan chaca huanifo. Nanscarifi aquin ua omitsisca huashcaniran, –ishon Jesús ato yoini. ¹³ Ascaiton nicacani afu rafuafoan shinantani nan Juan yorafo unu muran

iquimapacumisihuunoa ato yoiiai cuscan tapinifo.

Jesús furonanfacuhuunoa yoshin chaca nuua caya huani

Mr 9.14-29; Lc 9.37-43

¹⁴ Ascatan machi anoashu fotocuranaino yorahuanrasi aquí noconifo. Ascaino nannoshon nocofunun ratoconun mai chachipacufoan Jesús yoini, ¹⁵ —Ifon, uhuun facuhuun ramapaihuu. Yoshin chaca ahuun nuushon fasi omitsiscamai. Chii muran potafain unu muranri potatiro.

¹⁶ Uhuun facu mifu rafuafo ano un iyofiacai tsoan caya huama, —ishon yoiaiton. ¹⁷ Ascaiton Jesús non afu rafuafo noco yoini, —¡Ohua! Mancai ua icoinra huacoinnama. Man fasi amaquiri shinanmisi. ¿Ahuutia un matofu icamun man ua nicayamacaiyai? —ishon noco yoini. Ascatan facun ahuun apa yoini, —Min facu ua ihuushonhuun, —huani. ¹⁸ Ascaiton furun ihuushocun Jesús yoini, —Minfin yoshin fasi chacacoinquin. Na facumaquinoashu catahuun, —ishon Jesús curushcain yoiaino cayariscatani.

¹⁹ Ascatan non afu rafuafoasi Jesús fu tsaintan non yocani, —¿Ahuuscaimun norifi non yoshin chaca facumaquinoa potamaquin? —ishon non yocaiton. ²⁰ Noco afanan yoini. —Manfin ichapama ua icoinra huaaquin. Ascacun un mato icon yoinon. Nan mostaza ushu uhuapamashtacoinfia foaicashu yosia uhuapacoin itiro. Nan-scarifiai man ua ichapama icoinra huaquin tau huatiro. Ascan chipo uhuun tsain maton nomuran nanucoinshon man ua fasi icoinra huaqui finacointiro. Ascashon man machi yoitiro shucucaitahuun man huaino shucucaini futsa ano

catío. Ascaino ua icoinra huacoinshon nan man apaiyai cuscacoin man huatiroquin. ²¹ Ascán man Upa Dios cufiyanan piqui tunuyamashocai nan na cuscara yoshin chaca man potatiromaran, –ishon Jesús noco yoini.

Jesús nashquiai cuscan afanan yoi futsani
Mr 9.30-32; Lc 9.43-45

²²⁻²³ Ascatan Galilea ano nocofu caquin afanan Jesús noco yoiquin isca huani, –Un mato yoimisi cuscan afanan un mato yoi. Futsan ua ato achimashquin ua rutunonfo. Ascáfia osha rafu non fustitan un afanan mai murannoashu fushiquiran, –ishon Jesús noco yoini. Ascaiton nicaquin non fasi shinancoinni nocon nomuran noconi.

Israelifoaan pui inantiro cuscan Dios fu tsainti pushu cushusharanonfo

²⁴ Ascatan nannoashu non cai Capernaum pushurasi ano non noconi. Nanno non nococun nan Dios fu tsainti pushu murannoa pui fimisifoaan Pedro yocanifo. –Man min tapia nocon caifoaan faritifi pui inanfo Dios fu tsainti pushu muran yonoafoan nan yopaifo cuscan ahuun finonfo. ¿Ascán mato Ifo Jesús arifi man inanmisimun? –ishon Pedro yocaifoan.

²⁵ Pedronun ato cumani, –Aifain. Naanfin inanmisiquin, –ishon ato yoini. Ascashu Jesús man pushu muran iquiano Pedro arifi iquini. Ascaiton Jesús Pedro yoini. –¿Maifoti anoa niaifoaanmun ahuun caifocoin pui fiapai iyamarai mai futsa

ariafo yocaiqui? ¿Pedro, asca min raquiri shinainmun? —ishon Jesús Pedro yocaiton. ²⁶ — Mai futsa ariafo fiantiroran, —ishon Pedronun cumani. ²⁷ Ascaiton yoini, —Min ua cuma cuscan iconfia non na pui fimisifo nocoqui shinanchacamapaima. Ascacun ian ano catahuun shuamaquin shiman fiishquin. Ascashon ahuun shaqui murannoa toro fuchishon min fitiro uhuuna yafi mina nan Dios fu tsainti pushu murannoa pui fimisifo nocohuunshon ato inanshquin, —ishon Jesús yoini.

18

Ratotocaimun Dios icari fasi finoncoianquin

Mr 9.33-37; Lc 9.46-48

¹ Ascaiton non Jesús yocani. —¿Ifon, ratotocaimun Dios icari fasi finoncoianquin? —ishon non yocaiton.

² Jesús facu cunani, —Facushta, nuri ohuu, —huaino ocon ato nastui nimani. ³ Ascashon ato yoini, —Un mato icon yoi. Man shinan futsayamashu nan facu cuscara man iqui. Man ascayamacai Dios icari man noconacama. ⁴ Ascacun na facu apa yafi ahua nicafain icoinra huatiro cuscan ratoran futsan ua icoinra huacoinnashu nanfin uhuun Upa Dios icariashu fasi finoncoian iishquiquin. ⁵ Asca ratoran futsan uhuunshon facufo shara huafin nan uari shara huai cafisca huai.

Futsafoan noco chaca huaquinaino fasi musucoin

Mr 9.42-48; Lc 17.1-2

⁶ Ascafia ratoranfoan ua icoinra huafuna futsan chaca huamai nancaifin fasi onaintimaquin finacoinquin. Chaca huamataima toquiriya tunushushon unu noacoin muran potafin shara icuanaquin. ⁷ Ascano nan icoinra huamafoan futsafo chaca huamamisi. Ascafia nanfocaijin fasi omitsiscacoinshcaniquin. Ascashon mato chaca huamapaifafaincani. Ascafia nan futsa chaca huamafocaijin fasi omitsiscacai finacoinshcaniquin. ⁸ Ascano mato mucuman man chaca huacun mushatumushon potacahuun afanan chaca huashquima. Man raqira caquin chaca huashon mato tau shatuhuu potashquin afanan chaca huashquima. Man mumamafishu Dios icano caafin sharacaiqui. Mumafishu man omitsiscapanacafo muran cacuana. Nanno chii urumanhuan matsinacama. ⁹ Nanscarifiai ahuara oinquin chaca huashon mato furo tsucahuu potashcaquin afanan chaca huashquima. Niyoashu furo fustiya man Dios icano caafin sharacaiqui. Ascan niyoashu furo rafuya man omitsiscapanacafo muran cacai sharama. Nanno chii urumanhuan matsinacama.

Chashoan fusti funoahuunoa Jesús ato ahuara futsa tapimani

Lc 15.3-7

¹⁰ Facufohuunoa isca huaqui shinanyamacahuun, “Na facucai ahuamaran,” ishon atohuunoa shinanyamacahuun. Un mato cayacafi yoi Upa Diosin ahuun oinmatifoan facufo cushusharafafainmisifo. Nan oinmatifori Upa Dios fu ifafaincani. ¹¹ Ascacun nantifi yora funoafu numayoifin un oaquin. Ascashon un aton chaca soashona isharapacushanonfo un oni.

¹² Ascano un mato yoinon. Ratoran futsa cien chashoan ayafiano fustishta amaqui funoano atirifi nan noventa y nueve faasi fununun potayofaintio a fusti funoa funayoicaquin nan fuchiaitian. ¿Ascan man ahuu cuscara shinantiromun? ¹³ Ascashu noventa y nueve ahuun chashoanfoqui unimafiaicai nan funoa fusti fuchiaquicaifin fasi unimai finacoinquin. ¹⁴ Nanscarifiai maton Upa Dios nan nai muran icatocai nan ua rama icoinra huafo fustishta funopaima.

—*Ahuuscashumain Diospan yora rafu raunantirofoquin, —ishon Jesús ato yoini*

Lc 17.3

¹⁵ Ascacun tsain futsari un mato yoi. Ua icoinra huaa futsan mia chaca huacun aqui cashon mia chaca huaa cuscan nan fusti yoihuu. Min yoiai cuscan nicashquin yoinon, “Ai. Mian yoia cuscan icon. Un mia chaca huaa. Ascacun ua rau huapun,” ishon yoitiro. Ascaquifin mihuunoashu afanan Diosqui nasoaquin afanan mifu rafushquin. ¹⁶ Asca min yoiai cuscan mia nicacasmaiton icoinra huaa fusti iyamarai rafu iyohuu nan nocofunun yoiai cuscan nicaquin arifi icoinra huanonfo. ¹⁷ Ascafia nan rafuri nicapaiyamaiton icoinra huafo ichanainfotian nannoshon nantifi tapimahuu. Asca nan ichananfori nicacasmaiton nanfoan yoitirofo, “Aacai afanan Diospan yoracoin cuscaraman,” ishon.

¹⁸ Ascacun un mato icon yoi. Ahuara man nunoshon yoia cuscan arifi Dios nan icanoshon nannori yoi. Nanscarifiai man ahuara nunoshon yoiyamaino arifi Dios nan icarishon yoitiroma.

¹⁹ Afanan un mato yoi. Man rafu nuno mai ano

ichananshon nannori rafu shinanqui man ahua
yocaiton nan uhuun Upa Dios nai muran icaton
mato ashoshqui. ²⁰ Ascashu rafu iyamarai rafu
non fusti yora ua icoinra huashu ichanainfoanno
urifi un atofu ichanainran, –ishon Jesús noco
yoini.

²¹ Ascaiton Pedronun yocani –¿Ifon, futsan ua
chaca huafafainaitomun un rau huaquin ahuuti
huatiroquin? ¿Siete un rau huaquin huatiromun?
–huaiton. ²² Jesús cumani, –Ma. Siete huaquima.
Nan mia chaca huafafainaiti min rau huatiroan,
–ishon yoini.

*Oinmatinin futsa rau huapainimahuunshon ato
yoini*

²³ –Ascacun un mato yoiai cuscan nanfohu-
unshon man tapitiro ahuu cuscaramain Diosin
ahuun yorafo iquifain ato yonotiroquin. Isca
huaquin mato tapimai. Niaifoan ahuun oinmatifo
cunani nan nifiafo cuscan inanonfo. ²⁴ Ascano
nan oinmati futsan ahuun niaifo fasi ichapacoin
millones nificun aqui ihuunifo. ²⁵ Nan nifian
cuscaai ahua inantiro inima. Ascacun ahuun
niaifoan yoiqui isca huani, “Min ua ahua inan-
tiroma. Ascacun un mia niaifo futsa inain min
ahuun yonomati inon. Nanton mihuun rafanan
ua pui inanon. Ascacun un mia inanfain min
ahuin yafi min facufo non min mafofori nantifi
min aya cuscan un inanmitsai ahuun rafanan
min ua nifian cuscan fishquin,” ishon niaifoan
yoiaiton. ²⁶ Nicaquin oinmatinin ahuun rato-
conun mai chachishon yoiqui isca huani, “Ifon,
uhuun ramapaihuu. Funayamapun. Un mia
nifian cuscafin un mia chipo nantifi inainqui,”

ishon yoini. ²⁷ Asca huaiton nicaia niaifo ahuun ramapaiquin yoini, “Afanan ratuyamahuu. Nantian min ua nifian cuscan un afanan shinainma. Min ua inanyamafaiton nantifi un soai min ua afanan nifinonma. Ascacun casharatahuun,” huani.

²⁸⁻²⁹ Ascano niaifoan ahuun pushu murannoashu caqui afu oinmati futsa fuchini. Nantori nan ichapamashta nifian ini. Shafa fusti yonona nifian ini. Ascafiacun aqui nocoshon tumosfain achishon yoini. “Mian nifian cuscan ua inanriscahuu,” huaiton ratoconun mai chachishon yoini, “Funayamapun. Un mia inanon,” huani. ³⁰ Asca huafaiatocai futsa manapainima. Ascataka futsanrocon cunu muran iquimani nan nifian cuscan inaintian amuran iyonon. ³¹ Ascaiton oincani oinmati futsafo fasi ahuun ramapaicoinnifo. Ascano focashon nan acaiton oian cuscan niaifoqui chaninifo. ³² Ascano focashon yoiaifoan nicaquin niaifoan ahuun oinmati cunashon yoini, “Minfin fasi chacacoinquin. Mian fasi ichapacoin nififishon min yoiqui isca huua, ‘Ifon, manayopun. Un mia nifian cuscan un mia inanon,’ ishon mian yoiaiton un mia nantifi soashona. ³³ Ascacun un mihuun ramapaia cuscan nanscarifi aqui mifu oinmati futsa min ahuun ramapaia shara icuana. Ascatamarocon min ahuun ramapaiamaran,” ishon niaifoan yoini. ³⁴ Ascashu fasi sinacoinquin niaifoan oinmati cunu muran iquimafain fasi onaintimashqui. Ascashon ahuun oinmatifo yononqui isca huani, “Nan ua nifian cuscan nantifi ua inanyamaiton cunu muranshon cainmayamacahuun,” ishon nan yora omitsisca huamisifo ato

huani.

³⁵ Nanscarifi huaquin ratoran futsan mato chaca huafiacun man ato rau huayamaino niaifoan ahuun oinmati chaca onaintimana cuscan huafain nanscarifi aquin nan uhuun Upa Diosin nai muran icaton matori onaintimashquiran, –ishon Jesús noco yoini.

19

Nocofunu yafi ainfo ununantirofohuunoa Jesús ato yosini

Mr 10.1-12; Lc 16.18

¹ Ascano tsainqui anaititan Jesús nocofu Galilea anoashu Judea mai unu Jordán ocuma futsa cani. ² Ascaiton yorahuanrasiton mufaincun nan-noshon nan isinincaifoti ato caya huani.

³ Ascaino Fariseofo Jesusqui funifo. Amaquiri cumamapai fucani. Ascacun yocanifo, –¿Moisés cununi cuscan nocofunun ahuin unupaiquin unutiromun? ¿Nocofunun ahuin ahuuscarashta aiton unutiromun? –ishon yocaifoan.

⁴ Jesús ato cumani, –¿Man Moisés cununi cuscan oinmisimamun? Diosin nantifi onihuani. Tau huaquin nocofunu yafi ainfo onihuani. ⁵⁻⁶ Ascano Diosin yoiqui isca huani, “Ascacun nocofunun ainfo fiaino apa yafi ahuamaqui pashcashu ahuin fu itiro. Ascashu nan fusti shinantsa ashcaquin,” ishon cununiquin. Ascacun Diosin ato fianan huaa cuscan afanan tsoa pashcanantiromaran, –ishon ato yoiaiton.

⁷ Yocanifo, –¿Nan iconfiacun asca ahuuscaquimun Moisés yonoquin isca huaniquin? “Tsoan ahuin unupaiquin iquisi cunushoquin

isca huatiro, ‘Un afanan mia fipaima. Mun mia unuiran,’ ” ishon Moisés cununiran, —huaifoan. ⁸ Afanan ato cumani, —Manfin nan maton shunifo cuscaraquin. Nanfoanri Dios nicacasmaonifo. Nanscarifi huaqui marifi man nicacasmai. Ascacun rama man yoia cuscan nannori Moisés cununi. Ascafiacai Diosin tau huaqui anori yononima. ⁹ Ascacun un mato cayacafi yoi. Ratoran futsan ahuun ahuin nocofunu futsa fu iyamafiacun ahuin unui futsa fiishquin. Asca huaquifin nanton chaca huaiquin. Nan ahuun ahuinma fu iquin cafiscairan, —ishon Jesús ato yoini. ¹⁰ Ascaiton nicaquin non afu rafuafoan yoini, —Nanscaracun nocofunu yafi ahuin fiananfoma shara icuanaran, —non huaiton.

¹¹ Jesús noco cumani, —Un yoiai cuscaai atirifi yorafoan tapitirofoma. Nan Diosin ato shinanmanafaansifin tapitirofoquin. ¹² Ascano atirifi nocofunufocaiyainfo fu fianantirofoma. Atirifi nan cainni cuscan ainfo fu itiroma. Ascan futsafoan atirifi chaca huatiro ainfo fu inonfoma. Ascaino atirificaiyainfo fu fiananfoma Dios yonosharashoshaquin. Ascacun tsoa ahuionma itiromainquin nan un mato yoiai cuscan nicacahuun, —ishon Jesús ato yoini.

*Jesús apa Dioshuunshon facufo shara huani
Mr 10.13-16; Lc 18.15-17*

¹³ Ascaino yorafoan aton facumishti Jesusqui ihuunifo ato manmanpacuquin Apa Dios cufishonon. Asca huafiaifoan non afu rafuafoan ato yoini, —Maton facufo ihuutan nocon Ifo fucash huayamacahuun, —ishon non ato yoiaiton.

¹⁴ Jesús noco yoini, —Ato nitun huayamacahuun uqui funonofu. Uhuun Upa Dios niaifo icariafofin nan facumishti cuscaraforiquin, —ishon yoini.

¹⁵ Ascashon facufo manmanpacutan Jesús cani.

Pushcohuai mafo ichapaya Jesús fu tsainni

Mr 10.17-31; Lc 18.18-30

¹⁶ Ascano pushcohuai Jesusqui caashon yocani, —Tapimamisiton minfin sharacoinquin, ¿Unmun ahua shara huatiroquin Dios fu ipashashquin? —ishon yocaiton. ¹⁷ Jesús cumani, —¿Ahuuscaquimun mian yocaiquin ahua shara huanoa? Nannofin fustiquin shara. Naanfin Diosiquin. Ascan min Dios fu ipapaiquin nan noco yononi cuscan nica-

coinfain nan yoia cuscacoin min huatiroran, —huaiton. ¹⁸ —¿Rato noco yononicaimun un nica-

coinfain nan yoia cuscan un huaiiqui? —ishon yocaiton. Jesús yoini, —Futsa rutuyamahuu. Min ahuinma fu iyamahuu. Ahuara onuyamahuu. Chaniri yoiyamahuu. ¹⁹ Upa yafi uhua nicas-

harafain ato shara huahuu. Nan mifiri min noiai cuscan futsafohuunri noihuu, —ishon yoaiton. ²⁰ —Nantifi min ua yoiai cuscan mun nanscaco-

huua. ¿Ascan ahua futsamun un ahuusca huatiro-

quin ahuunoashu isharashquin? —huaiton.

²¹ Afanan yoini, —Min Dios cuscara shara ipaiqui nantifi min aya cuscan inanmitsashon ahun rafanan pui fihuu ahuuomafo ato inanshquin. Min ascaitofin Upa Diosin

nai muranshon mia ahua shara shara mucushoniquin. Asca huatan ua tanasharahuu, —ishon Jesús yoini.

²² Asca huaiton nicai nan pushcohuai puusin-ima. Mafo ichapayashu ahuun mafofo inan-mitsacasmai. Ascatan Jesusmaquinoashu cani. ²³ Ascashu man caano Jesús noco yoiqui isca huani, —Un mato icon yoi. Yora mafo ichapaya fustirasi uhuun Upa Dios niaifo ari nocopaifiacani nocotirofoma. Nanfoan aton mafo ichapa shinanquicai tsoan Dios shinantiroma. ²⁴ Ascacun afanan un mato yoi. Nan ina camellocai acoya shoi muran finontiroma. Mimacaifi nocofunu mafo ichapaya Diosin niaifo ari nocotiromaquin, —ishon noco yoini.

²⁵ Ascaiton nicacaquin non afu rafuafo mustairitan non yoini. —¿Ascan tsoa Dios fu nipatiro-mun? —ishon non yocaiton. ²⁶ Jesús nocoqui fusoacucahuan noco cumani, —Nocofunucai afiri numatiroma. Diosin fustitofin yorafo numatiro-quin. Nantofin ahuamamishti huatiroquin. Noco-funufoan atiroma cuscan nan Diosin huatiroran, —ishon noco yoaiton. ²⁷ Pedronun yoini, —Ifon, nonfin nocon ahua-rafo nantifi yafi nocon yorafo non pota furani mifu oaquin. ¿Ascan Diosimun noco ahua inainquin? —ishon yocaiton.

²⁸ Afanan Jesús noco yoiqui isca huani, — Un mato icon yoi. Un chipo nantifi manifoti iquinaitian nantifiton ua oinshquicani uhuun Upa Dios cuscara sharacoin icaiton. Nantianri marifi nan ua tanamisi nocon caifo doce shoco Israelifo marifi man ato iquishquin. ²⁹ Ascadari tsoan uhuunshon ahuun pushu yafi ahuun yorafo potafain apa potafain ahuari potafain ahuun facufo yafi ahuun mairi potashon ua tanapaisharai. Nanscara yorafin uqui nocoaitian

fasi paratama fiishquiquin. Ascashu ufu ipanaca.
³⁰ Ascafia yora ichaparasi niyoashu nan niaifo cuscarafo. Ascan naashucaí afanan tsoa ahua ishquima. Nanscarifiai atirifi niyoashu nan ahuama shinantsafo. Ascafia naashu u futan futsafori iquishcani.

20

Mau yonomisifohuunoa ahudara futsa Jesús ato tapimani

¹ Ascano ahuu cuscaramain Upa Diosin ahuun yorafo iquinai cuscaraquin afanan un mato tapimai isca huai. Mau ifoan funamanrishta nocofunufu funai caní ahuun mau uhuapa ano yonoi fononfo. ² Ascano ato fuchishon yoiqui isca huani, “Uhuun mau ano yonoi focahuun. Nan man shafa fusti yonoo cuscan un mato inain. ¿Ascan sharamun?” ato huaiton. “Ai. Sharafinquin,” huanifo. Ascashon ahuun mau ari ato nichini.

³ Ascatan man fari cuyainano mau ifoan caaquin oian plaza ano nocofunufu nia ini tsoa yonoima. ⁴ Ascaiton mau ifoan ato yoini, “Uhuun mau ano yonotacahuun un mato ahuun rafan inansharanon,” ato huaiton. Nicacani fonifo yonoi focani. ⁵ Ascano mau ifo afanan fari masafinin racano caaquin oian atirifi nocofunufoan ahuushta huatama niafo oinquin. Ato yoini, “Uhuun mau ari fotacahuun,” ato huaino man foafono. Afanan man fari cushca cainnaino macushcamuano atirifi fuchishon nanscarifi huaquin ato nichini. ⁶ Ascatan man yatai fari nii manaon caano mau ifoan afanan caaquin atirifi fuchini yonocanima niafoan.

Ascaiton ato yocani, “¿Ahuuscaimun nan shafatisho yonotama man niaquin?” ishon ato yocaiton. ⁷ Cumanifo, “Tsoan ahuashta noco yonoamaran,” huaifoan. “Ascacun marifi uhuun mau ari ua yonoshotacahuun,” ato huani.

⁸ Ascashon man yamuaino mau ifoan yonona niaifo patashari yononi, “Ua yonoshonaifo cunahuu nan yonoafo rafanan ato inanshquin. Ascashu ato inanqui tau huahuu nan ahuun unutaqui foafo yafi nan foi tauafo,” ishon yononi.

⁹ Ascaino man fari nii manaon caano foafo. Nanfo ato inanni naan shafa fusti yonoa shinantsa huaquin. ¹⁰ Ascano nan funamanrishta yonoi tauafoan oincaquin yoinifo, “Mau ifoan ato inanshara. Ascan nonfin paratama yonoaquin. Ascacun noco fasi paratamacoin inainran,” ishon shinannifo. Ascfia nan chipo iquiafo ato inan cuscari ato inanqui huani. ¹¹ Ascashon ato yonohuunshon ato inainton ficani mau ifoqui tsain chaca huacani afi ranan yoinancaquin yoinifo.

¹² “Ascan nonfin nan shafatishon yonoaquin. Fari isicoin muran. Ascan man fari caino chipo fuafo min ato inan cuscan huaquin nocorifi min inainran,” ishon yoiaifoan. ¹³ Mau ifoan futsa cumaqui isca huani, “Uhuun yorashta. Uncai mia inanqui chaca huama. ¿Ascan manmun u futan shara huama man shafa fusti yonoaihuunoo? Man manfin ‘Shararan’ huaquin. ¹⁴ Ascan naquian min pui fihuu min pushu ano catashquin. Ascan nan fari man nii manaon caano yonoafo nan un mia inain cuscan nanfori un ato inansharapai. ¹⁵ Nan un ato inanpaiyai cuscan un ato inantiro. Nanmain uhuun puicufin. ¿Ascan ahuuscaquin

nan faricaino yonoafo yafi man uqui shinain chacaimun? Unfin futsafori shara huapaiquin,” ishon mau ifoan ato yoini.

¹⁶ Ascan nanscarifiai Upa Diosin nan icoinra huaqui tau huafo ato shara huaa cuscan huaquin nan chipo icoinra huafori nanscarifi ato shara huairan, —ishon Jesús ato yoini.

Naashquiai cuscahuunoa afanan Jesús yoi futsani

Mr 10.32-34; Lc 18.31-34

¹⁷ Ascashu Jesús Jerusalén ano caquin doce non afu rafuafo noco fusti futsano iyoní nannonshon noco yoiquin isca huani, ¹⁸ —Non Jerusalén ano canon. Nannoshon futsan ua ato achi-mai nan nocon niaiffo futan Moisés tsain tapimamisifoanri ua chaca huacaquin yoicani isca huacaquin, “Jesús rutucahun,” ishon yoifocani.

¹⁹ Ascashon caifo futsafori ua inancani nanfoan ua cashu mutsama huafain fichi cunoqui tuchiaton ua coshacani. Ascatan ihui coyan iquinanqui ua mastacani un nanon. Ua asca huafiafo osha rafu non fustitan Upa Diosin afanan ua funimairan, —ishon noco yoini.

Juan futan Santiago ahuan yocani cuscan

Mr 10.35-45

²⁰ Ascano Zebedeo ahuan facu rafu Juan yafi Santiago ahuan ato Jesusqui iyoní. Ascatan aqui nocoshon ahuan Jesús ratoconun mai chachishoni. Ahuara futsa yocapaiquin. ²¹ Ascaiton Jesús yocani, —¿Min ahua yoipaimun un mia ashonon? —huaiton. —Ifon, Upa Dios icari nantifain min aton niaifo icaitian uhuun facu rafu mifu niaifo patashari ato imahuu. Ascatan niaifoan ahuan

tsaoti ano min tsaositian uhuun facu rafutan mia naqui huashu tsaononfo, —ishon yoiaiton. ²² — Man ua yocai cuscacai man tapiama. ¿Un omitsiscashquiain cuscan man ufu omitsiscatiromun? —ishon Jesús ato yocaiton. Cumanifo, —Ai. Non mifu itiroran, —huaifoan. ²³ Ato cumani, —Icon marifi man omitsiscai. Ascafia uncai yoitroma tsoanmain ua naqui huashu tsaocai. Uhuun Upa Diosin fustitofin tapiaquin. Nan catoanfosi ufu nanno tsaotiroran, —ishon ato yoini.

²⁴ Ascaiton nicai non afu rafuafo atirifi mucu rafuti nan nanu rafuqui non fasi sinacoinni Jesús naqui huashu tsaopaiyaifoan nicai. ²⁵ Non ascaiton tapishon Jesús noco cunashon yoiqui isca huani, —Uqui fucahuun un mato yoinon. Nan icoinra huafoma niaifofoan ato curushcain yonofafainmisifo. Aton niaifo patasharifoanri ato yoiqui isca huamisifo, “Nonfin mato ifoquin. Ascacun non mato yoia cuscan man noco ashorisca huatiroran,” ishon curushcai ato yoimisifo. ²⁶ Ascafiaifoanno ato cuscara iyamacahuun. Man ratoran futsan niaifo ipaiqui maton oinmati man shara huafafainmisi itiro. ²⁷ Ascatan man futsan futsafori finonpaiyaino ahuun yonomati man itiro. ²⁸ Nanscarifiai futsa ua ashononcai un oama. Ascatarocon un futsafo ashoyoi ua oa. Ascatari un atohuunoashu naashquin un oni afanan Satanás ato ifon inonma, —ishon noco yoini.

Jesús fusho rafu caya huani

Mr 10.46-52; Lc 18.35-43

²⁹ Ascatan non Jericó anoashu caiton yorahunrasifain noco mufainifo. ³⁰ Ascaino

nannori fai cusumun fusho rafu tsaofafo ini. Jesús fain caiton nicaquin nan rafutan cunanifo isca huaquin, –Ifon, minfin David ahuun funaquin. Nocoahuun ramapaipun, –ishon cunanifo. ³¹ Ascaifoan yorahuanrasifain ato asca huanifo afanan tsainonfoma. Ato asca huafiainfoanno oi ashcafinin afanan cunanifo, –Ifon, minfin David ahuun funaquin. Nocoahuun ramapaipun, –huariaifoanno. ³² Jesús nituacucahuan ato cunashon yocani, –¿Un mato ahua ahuusca huashotromun? –ishon ato yocaiton. ³³ –Ifon, non fasi oinpaicoin, –huaifoan. ³⁴ Jesús atohuun ramapaiquin aton furo muainno cayariscatan oinsharanifo. Ascashon nan rafutari Jesús mufainifo.

21

Jesús Jerusalén ano cani

Mr 11.1-11; Lc 19.28-40; Jn 12.12-19

¹ Ascatan non Jesús fu cai Jerusalén chaima non noconi. Nan chaimari pushurasi futsa ahuun anu Betfagé machi Olivo tunanman ini. Nanno nocoti chaima Jesús afu rafuafo rafu pushurasi Betfagé ano ato nichini. ² Ato nichiataima ato yoiqui isca huani, –Nan pushurasi ano fotacahuun. Nanno nocoshon man oian burro facuya nushua man fuchicai. Nan tupushon nuri ua ihuushotacahuun. ³ Futsan mato yocaiton ato yoicahuun, “Nocon Ifo yopaiton non iyoshoni cai. Ascafia non mato natorisca huairan,” ishon ato yoitacahuun, –Jesús ato huani.

⁴ Jesús acai cuscan huaquin nannori ahuunoa Diosin tsain yoimisiton cununi. ⁵ Ascano cunuquin isca huani,

“Jerusalén anoafo yoihuu isca huaquin, ‘Oincapon. Mato niaifocoin matoqui oi. Nan burropan facu camaqui tsaoshu matoqui oi. Nancái nocofunu ahua-ton curafiapaitama shara fustisi oitsii huafain fusti yoitiroran,’ ”

ishon Diosin tsain yoimisiton ahuunoa cununi.

⁶ Ascatan nan rafutan Jesús ato yoia cusca-coin huashonifo. ⁷ Ascashon burro yafi ahuun facu Jesús iyoshonifo. Iyoshocata burropan facu camaqui ato camisa fucashonafoanno acamaqui Jesús tsaoinacahuani. ⁸ Ascatan caiton yorahuan-rasifoan fai naman cayan afufori aton camisafo fucashonifo. Ascaino atirifiton shupa shatushon nan caifufori nichinifo. ⁹ Ascano nan yorahuan-rasi afufori foaifo futan acachori foaifoan nantifi-fain oi ashcafinin yoinifo.

¡Aicho! David nocon niaifo ipaoniton ahuun funa nocoqui oi. Nanfin Dioshuunoashu nocoqui oiquin.

Ascacun Upa Diosin nan shara huahuu,

ishon yoinifo.

¹⁰ Ascashu Jesús Jerusalén ano caiton nicacani nantifi yorafo mustairicatan afi ranan yocanonannifo, —¿Tsoamun naaquin? —icashu.

¹¹ Ascaifoan nan Jesús fu foafoan yoinifo, —Nanfin Jesusquin. Diosin tsain yoimisi. Nanrifi pushurasi Nazaret nan Galilea anoaquin, —ishon yoinifo.

*Jesús Dios fu tsainti pushu muranshon ahuara
chacafopotani*

Mr 11.15-19; Lc 19.45-48; Jn 2.13-22

¹² Asca huatan Jesús Israelifohan Dios fu tsainti pushu muran iquitoshiquin oian amurannoashu ahuara inanmitsashon pui flaifoan oinqui nan sapa acamaquishon pui flaifo finifohan arasaquin futsani. Ascashon nan ruhui inanmitsaifohan aton tsaotiri finifohan potaquin futsani. ¹³ Ascashon Jesús ato yoini, –Diospan tsain cunuquin isca huani, “U fu tsainti pushu muranshon man ua fusti cufitiroran,” ishon cunufiani nan yomutsofoan ichananti cuscara man huapairan, –ishon ato yoini.

¹⁴ Ascaino fushofo yafi nipaiqui ranainfo Dios fu tsainti pushu muran Jesusqui funifo. Ascacun ato caya huani. ¹⁵ Ascaiton nan Dios fu tsainti pushu muranshon unimacaquin facufoan oi ashcafinin yoinifo, –¡Aicho! Nan David ahuun funa Jesús fasi shara. Ascacun nan shara huahuun, Upa Diosin, –ishon yoinifo. Tsoan atiroma cuscan huaquin Jesús ato shara huashomisi ascaifohan nicai Israeli-foan niaifoho yafi Moisés tsain tapimamisifo sinacoinnifo. ¹⁶ Ascashon nanfoan Jesús yoinifo, –¿Nan facufoan yoiaifo cuscan min nicaimamun? –ishon yocaifoan ato cumani, –Aifain. Munfin nicaiquin. ¿Ascan marifi nan Diosin tsain cununi cuscan man man nicamisimun? Cunuqui isca huani,

“Mihuunshon facufoan mihuunoa tsain shara yoicaniran,”

–ishon cununi.

¹⁷ Anori ato yoitan atomaquinoashu no fu cai pushurasi ahuun anu Betania ano cani. Nanno osha fustiyoni.

Fana higuera fimiymacaiyaiton Jesús ahuun tsainmansi namani

Mr 11.12-14, 20-26

¹⁸ Iyoconaino Jesús Jerusalén ano cai fonaincoinni. ¹⁹ Ascashu caquin oian fai cusumunri fana higuera fuchini. Ahuun fimi pipaifia ahuun puifosi ini. Ascacun nan fana Jesús yoiqui isca huani, —Afanancai min fiminacamaran, —ishon yoini. Yoiquin asca huaino fana tsasisiriscatani.

²⁰ Ascaiton oin non afu rafuafo non mustairini. Ascashon non yoini, —¿Ahuuscashumun nan fana tsasiriscaquin? —ishon non Jesús yocaiton.

²¹ Noco yoini, —Un mato icon yoinon. “Un icoinra huai iyamarai un icoinra huaimaran,” ishon shinantama man icoinra huacoinshon un fana tsasi huaa cuscan marifi man nanscarifi huatiro. Ascashon machiri man yoitiro, “Tsucucai. Unuhuan muran pacuhuu,” man huaino unuhuan muran pacuriscatiro. ²² Ascacun man icoinra huacoinshon ahuarashta man Upa Dios yocaiton mato ashotiroran, —ishon Jesús noco yoini.

Jesús noco yonotiro

Mr 11.27-33; Lc 20.1-8

²³ Asca huatan Jesús Israelifoan aton Dios fu tsainti pushu muran iquishon ato yoiaino Israelifoan aton niaiffofo aqui funifo. Aqui fucashon yocanifo, —¿Min acai cuscan tsoan mia yonoamun? —ishon yocaifoan. ²⁴⁻²⁵ Jesús ato cumani, —Urifi un mato yocai. ¿Juanpan

yorafo unu muran iquimapacuni tsoan yonoa asca huanimun? ¿Diosin iyamarai nocofunufaan yononifomun? Man ua cumasharaiton urifi un mato cumatiroran, —ishon ato yoiaiton. Nicacani afiranan yoinannifo —Diosin Juan nichiniran non huaiton Jesús noco yoitiro, “¿Ascan ahuuscaquin man Juan icoinra huamamun?” noco huatiro. ²⁶ Ascan Juan nocofunufaan nichiniran non huaino yorafo nocoqui sinatirofo. Nantifi yorafoanmain yoimisifo “Juanpan Diosin tsain yoimisiran,” ishon. Ascacun noco asca huatiroforan, —icashu niaiffofo yoinannifo atoqui musucani. ²⁷ Ascashon Jesús yoinifo, —Noncai tapiama tsoanmain Juan yonoaquin, —ishon yoiainfoan. Jesús afiri ato yoini, —Urificai un mato yoima tsoanmain ua yonoa un ahuarrafo huaiquin, —ishon Jesús ato yoini.

Pushco rafuhuunoo ahuara futsa ato yoini

²⁸ Asca huatan ato yocani, —¿Man raquiri shinainmun? Nocofunu facu pushcohuai rafuya ini. Ascashon furu iyoa apan yoini, “Upashta, nocon mau ano yonotahuun,” huaiton. ²⁹⁻³⁰ Furumun cumani, “Ma, upa, un yonoicaimara,” huafishu chipo shinan futsashu cani. Ascashon furu chipocuri yoini, “Upashtan, nocon mau ano yonotahuun,” huaiton. “Ai, upa. Mun yonoicairan,” huafishuca canima. ³¹ ¿Ascan rato ahun facu rafu nan apa yoia cuscacoin animun? —ishon Jesús ato yocaiton. —Nan iyoaran, —ishon cumaifoan. Afanan ato yoini, —Un mato icon yoi. Nan yora chacafo niaifo pui fishomisifo yafi ainfo furomafoanri ua icoinra huacanashu

nanfo Diosin nantifi iquinai ano iqui tautirofo. Ascan mancai ari iquitiroma. ³² Juanpan mato yoisharapaoni isca huaquin, “Man chaca huamisi cuscan shatufain natian Dios shinancahuun,” ishon mato yoipaoni. Ascafiacai man icoinra huanima. Nan niaifo pui fishomisifo futan ainfo furomafoanri icoinra huaifoa oinfiacquicai maton chaca shatuyamafain man icoinra huamisi-maran, –ishon Jesús ato yoini.

Mau yonomisi chacafohuunoa ahuara futsa ato yoini

Mr 12.1-12; Lc 20.9-19

³³ –Nicacahuun un afanan ahuara futsahuunoa un mato yoi mato tapimashquin. Mau ifoan ahuun mau ano fimi ahuun anu uva fanani. Ascashon ahuun fimi ica cuscan toquiri cunuacuni ahuun fimi fana ahuaton chaca huanonma. Asca huatan mai quini huashon amuran uva huashon ahuun tau puama puama anifo ahuun fimi unu fiishcaquin. Ascashon toquiri cuyacoin masoni anoshon ahuun yonomatinin cushushonon. Asca huaquin anaitishon futsafo yoini ahuun mau cushushononfo. Asca huafaini mau ifo mai futsa ano cayoni. ³⁴ Ascashu man fimi ano mau ifoan ahuun oinmati futsafo mau ano nichini ahuun fimi fishononfo. ³⁵ Ascano nocofoan fimi cushumisifoan ato achicashon futsa sutufain futsa rutucoinfain futsari toquirinin tsacaqui futsanifo. ³⁶ Ascano mau ifoan ahuun oinmati ichapama nichiqui tau huani. Ascashon afanan acachori fasi paratama nichini. Ascacia nanfori ato chaca huanifo. ³⁷ Ascashon mau ifoan shinanni, “Uhuun facucoin un nichicuraca nicatorofoati,” ishon ahuun unutaqui furucoin

nichini. ³⁸ Ascashon apa nichian caiton oincani nan fimi cushumisifo ahuun yoinancaquin yoinifo, “¡Oincapon! Mau ifoan ahuun facu oi. Na maufin apanaquin. Ascfia apa chipo ahuun facu inanshquin. Ascacun non rutunoncahuun nocona mau inon,” icashu yoinannifo. ³⁹ Ascatan furu iquicuranaiton achicashon mau tsumun sharafoshon rutunifo.

⁴⁰ ¿Ascun mau ifo oshon nan fimi cushumisifo ato ahuusca huashquimun? —ishon ato yocaiton.

⁴¹ Cumanifo, —Nan yora chacafo rutui atohuun ramapaitama nanonfo. Ascashon ahuun mau futsafo cushumani cushusharashononfo. Nanfoan man fimicun cashcu futsa mau ifo inanonfo, —ishon yoiaifoan.

⁴² Jesús afanan ato yoiqui isca huani, —¿Diosin tsain cununi cuscan man man oinmisimamun? Isca huaquin cununi,

“Pushu yonomisifoan pushu quishi shara potanifo. ‘Nan sharamaran’ ishon potafiafo pushu ifoan afanan fini nanhuunoashu pushu mutsisipa inon.” Nanscarifiai niaiffoan Diospan facuhuunoa isca huaqui yoishquicani, “Nacai ahuama. Sharamaran,” ishon yoiqui potashcani. Ascfia Upa Diosin ahuun facu catoan ahuunoashu nantifi ahuun yorafo nipanonfo. Ascacun non yoitiro “Diosin Furunhuunshon aca cuscan fasi shararan,” ishon cununi.

⁴³ Ascacun Diosin maton niaifocoin ipai ahuun yorafo ato iquifai ato iquipacushquin. Ascfia man Dios nicacasmaiton futsafo catonshquin a

fu ipanonfo. ⁴⁴ Unfin nan pushu quishi cuscarahui. Futsafoan uhuunoa cayacafi tapimana cuscan icoinra huayamashu funocoinshceni. Un atoqui sinaqui omitsiscapanacafo muran un ato potashquin, —ishon Jesús ato yoini.

⁴⁵ Ascaiton nicacani Israelifoan aton niaifofu futan Fariseofoan tapinifo atohuunoa Jesús yoiaton. Nanfoan icoinra huafoahuunoa ato yoini. ⁴⁶ Ascano ahuun yoinannifo, —¿Ahuuscashomain non Jesús ato achimanan ranushumatun rutunon? —ishon shafatifi shinannifo. Ascafiaifoanno yorafoan yoinifo Jesús Diospan tsain yoimisiran ishon ahuunoa yoinifo. Ascacun na yorafoan yoiainfo cuscan tapinifo niaifofu yafi Fariseofoan yorafoqui musucaquin Jesús achimatai inifoma.

22

Nocofunu yafi ainfo fianantirohuunoa ahuara futsa ato yoini

Lc 14.15-24

¹⁻² Afanan Jesús ato yoiqui ahuara futsa ato tapimanon isca huani, —Upa Diosin niaifoan ahuun yorafo iquinainmain ahuu cuscarahun un mato yoinon. Ua nicacahuun. Niaifoan ahuun facu ainfo fiaino ato chanihuani ichananshon ato futan pifain atofu fasi unimashquin. ³ Ascano man itisharashon ahuun oinmatifo nichini nan ato chani huaifo ato ihuitanonfo. Ascafiaicai tsoan opainima. Fucasmarocon anifo. ⁴ Ascatan afanan oinmati futsafori nichiqui yoini, “Ato yoitacahuun. ‘Uhuun facu ainfo fiaino mun tushu itishara huaaquin. Moi rafu rutufain yoina shoa

sharari un rutuaqui pii funonfo.’ Nannori ato yoitacahuun,” ato huani.

⁵ Ascano focashon ato yoifiafo afanan fucasmanifo. Atirifi aton mau ari fonifo, pashaifocani. Atirifiri ato inanmitsati ari fonifo. ⁶ Ascan atiri nanno nituafoan niaifoan ahuun oinmatifo achicashon ato sutufain atirifi ato rutucoinnifo. ⁷ Ascano ahuun oinmatifohuunoa nicai niaifo fasi sinacoinquin ahuun ranushumuafu nichini a rutumitsamisifo ato rutuqui cuyofain aton pushufo coanonfo.

⁸ Asca huatan niaifoan ahuun oinmati futsafo yoini, “Uhuun facu ainfo fiaino un tushu ichapa itishara huaa ato futan piishquin. Ascafia futamarocon fasi chaca huafo. Asca huashucaifafanan futirofoma. ⁹ Ascacun nan fai uhuapafu nanno nan yora ichapa fotirofo ano fotacahuun. Ratoran futsafo fuchicashon ato yoicahuun Funonfo,” ishon yoini. ¹⁰ Ato asca huaino focashon nan fai uhuapafu ano ratoran futsafo fuchicashon ato ihuunifo. Yora sharafo ihuufain yora chacafori ihuunifo. Ascano nan niaifoan ahuun facun ainfo fiaino pushu muran yorahuan-rasi fospicoinnifo.

¹¹ Ascatan niaifo pushu muran iquini nantifi fuafo ato oinpai. Ascashon oian nantiffain sahuuti shara sahuuafu ini. Niaifoan ahuun facu ainfo fiaino sahuuti funa sharacoin ato sahumani. Ascafiaquin oian nocofunu futsan sahuuti shuni sahuua niaifoan fuchini. ¹² Fuchishon yoiqui isca huani, “Ahuuscaif sahuuti sharacoin un ato sahumana cuscan min sahuuamamun. ¿Ahuuscaif ascara min iquiamun?” ishon yocafiafainocai nan nocofunu pusinima. ¹³ Ascaiton

niaifoan ahuun oinmatifo yononi, “Nan noco-funu munushfain onushushon faquish muran potacahuun. Nannoashu uaicaifoanno omitsis-capashanon,” ishon ato yoini.

¹⁴ Nanscarifiai Upa Diosin yora ichapa cuna a icano funonfo. Nan ahuun facu noiaifosi afu ipanacafo. Ascfafia Upa Diosin fustirasi ato catoin nan icoinra huafoasi afu ipashanonfo, –ishon Jesús ato yoini.

*Niaifofoan aton caifofo pui yocamisifohuunoa
Mr 12.13-17; Lc 20.20-26*

¹⁵ Ascatan Jesús ato yoiai cuscan nicacani Fariseofo Dios fu tsainti pushu murannoashu chifi focanashu yoinannifo, –Non Jesús ahuara yocanon. Noco amaquri cumaquin chaca hwaiton non cunu muran iquimanon, –icashu ahuun yoinannifo. ¹⁶ Ascashon Herodes ahuun tanamisifo yafi atohuunshon tapimisifori Jesusqui nichinifo cucun huaquin yocatanonfo. Ascano focashon yocaqui isca huanifo, –Tapimamisiton, man non tapian min icocoin fusti noco yoifafainmisi. Upa Diosin noco amapaiyai cuscan nannoricoin min noco cayacafi yoimisi. Mincai ahuara yoipai ranomisimari. Nan min noco yoiai cuscan cayacafi min yoimisi. Ahuaricai min fomamisima. Yora ahuaton cunama min yoimisi cuscan huaquin niaifofori min yoitiro. ¹⁷ Ascacufin min shinain cuscari noco tapimahuu. ¿Nan Romanonfoan aton niaifo Cesari pui inanfo cuscan norifi non inantiromun? –huaifoan. ¹⁸ Nan fuparamitsamisifoan cucun huaquin yoiaifo cuscan onanshon Jesús ato yoini,

–Fuparamitsamisifoan manfin ua amaquri cumamapaiquin ranushumuafoan ua achicashon ua cunu muran iquimanonfo, –ishon ato yoitan. ¹⁹ –Toro ua ismacahuun. Nan man ahunshon niaifo inanmisi, –ato huaiton. Toro fushonifo. ²⁰ Ascashon Jesús ato yocani, –¿Tsoa ointsa torohuun nuamun? ¿Tsoan ahun anuri nuamun? –ishon ato yocaiton. ²¹ –Niaifo Cesarinnaran, –huaifoan. –Ascan Cesarinacun nan inancahuun. Ascan Diosinacun Diosiri inancahuun, –ishon ato yoiaiton.

²² Nicacani fasi mustairicatan yoinifo, –Jesús yoiai cuscaai tsoan tafitiromaran, –icashu afi ranan yoinannifo. Ascatan amaquinoashu pashcafaini fonifo.

*Yora naashu afanan funitirofohuunoa yocanifo
Mr 12.18-27; Lc 20.27-40*

²³ Ascano nan shafatari Saducefofo Jesusqui funifo. Nanfoan shinanquin isca huamisifo, –Yora naashucaai afanan funinacamaran, –ishon yoinifo. ²⁴ Ascan nanfo Jesusqui fucashon yocanifo, –Tapimamisiton, noco shuni Moisés noco cunushoqui isca huani,

“Nan ratoran futsa ahuin futan facu acashma naano afu nanua futsan ahun facahua fitiro a futan facu aashqui,”

ishon cununi. ²⁵ Un mia yoinon. Siete nanupacuafokuunoa. Nanfo nocofu iyopaonifo. Aton iyoacoin ahuin yain tauni. Ascashiashon a futan facu acashma nani. Ascano chipocuton ahun facahua fiini. ²⁶ Ascashu arifi a futan facu acashma nani. Ascano chipocu futsari fiini.

Arifi a futan facu acashma naani. Nanscasiai. Ascapacutan amaqui nai cuyonifo. Aqui facu ayamacaicani. ²⁷ Ascatan ahuun unutani ainfori naani. Facu nanuyamacai. ²⁸ ¿Ascan ratotocaimun nai muranshon nan yorafo naashu funiaifotian fiishquiquin nan fusti fipashquin amaqui nai cuyoafo? –ishon yocaifoan.

²⁹ Jesús ato cumani, –Man man funoa. Mancai Diosin tsain tapiamafain ahuun yonoricai man tapiama. Ascashofin amaquiri man ua yoiiquin. ³⁰ Naacanashu funiafocai Dios icari nocotan afanan fianannacafoma. Nantifi Diospan oinmatifo afu nai muran icafo cuscara iishquicani. ³¹ ¿Ascacun yora naashu funishquiaifohuunoa Diosicoinin mato cunushoni cuscan man man oinmisimun? ³² Isca huaquin Diosin yoini, “Unfin Abraham non Isaac non Jacob afoan aton Diosiquin,” ishon yoini. ¿Yora naashu afanan funiyamaino ahuuscashumun Dios fu itiroquin? Ascafia ascarama. Yora man naafianishaquin afanan nia nanfofin Dios fu itirofoquin. Ascacun Upa Diosifin aton Diosiquin, –ishon Jesús ato yoini.

³³ Jesús Saduceofo yoiai cuscan nicacani mustairicatan yoinifo, –¿Ahuuscashomun iscara tsain noco yoiquin? Tsain sharacoin iquinaran, –ishon yoinifo.

Diosin yononi cuscan nantifi sharafishu nan fusti shara finacaia

Mr 12.28-34

³⁴ Ascano Jesús Saduceofo tsain shatumana nicacani Fariseofo afanan aqui funifo yocai fucani. ³⁵ Ascacun Moisés yononi cuscan tapicoian

futsan Jesús amaquri cumamapaiquin yocani,
³⁶ —¿Tapimamisiton, Moisés Diosin yonoa cuscan
 cununi. Ascan nan ratocaimun fasi shara finaca-
 iaquin? —ishon yocaifoan. ³⁷ Jesús cumaqui isca
 huani,

“Nocon Ifo Dios noiQUI fasi mato ointi
 muranshon noifain fasi mato nomu-
 ranshori noifain mato shinanfo yashon
 fasi noiHUU,”

ishon Moisés cununi. ³⁸ —Nan yononicaifi fasi
 shara finacaiquin. ³⁹ Futsari nanscaracuana
 yonoqui isca huani,

“Nan mifiri min musu huamuai cuscarifi
 aquin mia chaima icaforti noiHUU.”

⁴⁰ Nantifi Moisés yononi cuscan yafi Diosin
 tsain yoimisifoan yosipaonifo nan Diosin
 yononi rafuhuunoa cununifo. Dios yafi futsafo
 noicoinquifin nantifi Diosin yononi cuscacoin
 man aiquin, —ishon Jesús ato yoini.

Tsoancaimun Cristo ahuun shuni ipaoniquin
Mr 12.35-37; Lc 20.41-44

⁴¹ Ascashu Fariseofo afu ichananfoan Jesús
 ato yocani, ⁴² —¿Nan Diosin catonni Cristohu-
 unoa ahuu cuscara man shinanmun? ¿Tsoan fu-
 nacaimun? —ishon ato yocaiton. —David ahuun
 funaran, —huaifoan. ⁴³ Ato yoini —¿Asca ahuuscai
 David Diospan Yoshin Sharahuunshon nan Diosin
 catonni yoiQUI isca huanimun?

⁴⁴ “Upa Diosin uhuun Ifo Cristo yoini
 isca huaquin, ‘Minfin ufu niaifocoin-
 quin. Mia noicasmaifoan min ato fi-
 noncoian. Un ato shatumashquin mia

afanan ahuusca huatiroma. Min ato iquiniran,'”
 ishon Diosin yoini cuscan David cununi. ⁴⁵ ¿Criston David Ifono ahuuscashucon ahuun funa itiro-mun? —ishon Jesús ato yoiaiton. ⁴⁶ Nicaquicai tsoan ahuashta cumatiro inima. Ascashu nantifi puusinifoma. Ascan anantiancai tsoan afanan Jesús ahuashta yocanima. Ato cayacafi cumaiton nicacانشu aqui ranonifo.

23

Fariseofo futan Moisés cununi cuscan tapimamisifoan chaca huamisifo cuscan Jesús yoini

Mr 12.38-40; Lc 11.37-54; 20.45-47

¹ Asca huatan Jesús afu rafuafo yafi nanno ni-afo yoini, ² —Moisés cununi cuscan tapimamisifo futan Fariseofoan Moisés yononi cuscan mato tapimacani. ³ Ascan mato tapimanaifo cuscan huacahuun. Ascafiashon nanfoan acai cuscan huayamacahuun. Nanfoan Moisés cununi cuscan mato tapimafiaquicai Moisés yononi cusca-coin acanima. ⁴ Mato ahwara ihuucuin papi-maflashocai aton mucuman ahuashta mupaican-ima. Nanscarifiai Moisés yononi cuscan nantifi huacahuun. “Fustishta finonmayamacahuun,” ishon mato yonoafo. Moisés yononi cuscan fasi finonmafain mato huamacani. Ascano marifi apaifiaquicai man atiroma. Ascashu maton no-muran man omitsiscafiatocai matohuun rama-paicanima. Mato yonomisifo cuscaai aafi acan-ima. ⁵ Ascashon nanfoan acaifo cuscan futsafoan yoiqúi isca huacani, “Nanfofin sharaqin,” ato

huamapaicani. Diosin tsain fichiqui cunushon fumananqui nutafain ato sahuuti poyan ocuma rafu nutafain sahuuti chainipari sahuuafo. ⁶ Ascatan picani ichananshu nan niaifoan ahuun tsaoti ano tsaofafo nantififain ato oinonfo. Nanscarifiai aton ichananti pushu anori shafacafi tsaotiofo. ⁷ Ascashu nan yora ichaparasi anori fopaicani atohuunoa yoisharanonfo. Nanscafin apaicaniqui. “Tapimamisiton,” ato huaifoan nicapaicani.

⁸ Ascacun “Tapimamisiton,” ato huayamacahuun. Nocon tapimamisifin fustiquin. Naan nocon Ifo Dios. Ascashufin man nantifi yorahuantananquin. ⁹ Ascashori tsoa nuno mai anoa Upa huayamacahuun. Nan nocon Upacoinfi nai ari icaquin. Nan fusti non upa huatiro. ¹⁰ Ascatan “Iforan” ato huayamacahuun. Nocon ifofin fustiquin. Nan nocon Upa Dios. Nan man Iforan huatiro. ¹¹ Ascadari nan man ratoran futsa niaifo ipaiyaifi nantifiton ato oinmati itiroquin ¹² Tsoan nantifi finonpaifafaini naanfin Diosin ismashquiquin aacai ahuama. Ascan tsoa futsafoan aton oinmati cuscarashon ato shara huafafainai nanfin Upa Diosin chipo niaifocoin imashquiquin, –ishon Jesús ato yoini.

¹³ Ato asca huatan Jesús Moisés cununi cuscan tapimamisifo yafi Fariseofori yoiqui isca huani, –¡Ohua! Moisés cununi cuscan tapimamisifo futan Fariseofoan ua nicasharacahuun. Manfin fuparamitamisicoinfoquin. Upa Dios icano man yorafo iquimapaifiaquicai man ato iquimatiroma. Ascashu marificai man iquitiroma. Iquipaifiaifoan man ato catima huaa. Ascacun Diosin mato fasi onaintimaquin

finacoinshquin. ¹⁴ Ascashon man futsafo matohuunoo shinansharamapafiai man fasi chacacoinfo. Ainfo tatuomafori parashon man pushu ato fian. Ascatan fasi chaicoinri man cufiriatiro matohuunoo shinansharanonfo. Ascafia manfin fasi fuparamitsamisicoinfoquin.

¹⁵ Ascashu man foanfafaitsia man shinain cuscan yorafori shinanmashquin. Ascaqui fusti fuchishon man icoinra huua cuscan nanrifi man icoinra huama mato cuscara inon. Ascashon man futsa mato cuscara imano fasi chaca finaciaia iiquin. Manfin fasi chacacoinfoquin. ¡Ohuashta! Nanrifi matofu omitsiscapanacafo muran cai.

¹⁶ ¡Ohua! Ascacun Diosin mato fasi onaintimai. Manfin nan fusho cuscarafoliashon man futsafo tapimapaiqui ahuuscashomain Dios tanatirofoquin. Ascan ato tapimapaifiaquicai marifi man tapiama. Ascashon futsafo man yoiqui isca huamisi, “Tsoan yoiqui isca huai, ‘Dios fu tsainti pushu ahuun anuhuunshon un mia yoia cuscan un mia ashonon,’ huafiashon chipo man shinan futsashon man yoi ‘Nanscanonquin,’ ishon. Ascafia nan Dios fu tsainti pushu murannoo oro-huunshon un mia ashoiran futsa huashon. Nansacoin huashohuun. Ascan nan non yoia cuscan huashoyamaino ahua chaca finontiroran,” ishon man yoimisi. ¹⁷ Asca nan icon. Manfin nan fushon futsa iyopaiyai cuscarafuquin. Maton mapo curushcoin. Mancai ahua tapiama. ¿Ascan rato shara finaciamun Dios fu tsainti pushu murannoo oro iyamarai Dios fu tsainti pushucoin? Nan Dios fu tsainti pushuanofin Dios itiroquin. Ascan nancaifin shara finaciaiaquin.

¹⁸ Ascashon marifi man yoiqui isca huamisi, “Tsoan yoiqui isca huai, ‘Nan cufiti camaqui ahuara coamisifohuunshon un mia yoia cuscan un mia ashonon,’ huaflashon chipo man shinan futsashon man yoi nanscanonquin ishon. Ascafia, ‘Nan cufiti camaqui un Dios ahuara inanhuunshon un mia yoia cuscan un mia ashoiran,’ futsa huashon nanscacoïn huashocahuun. Ascacun nan min yoia cuscan huashoyamaino ahuara chaca finontiroran,” ishon man yoimisi. ¹⁹ Manfin nan fusho cuscarafquin. Mancai cayacafi shinantiro. ¿Ascacun ratocaimun shara finacaiquin? Nan cufiti camaqui ahuara man inan iyamarai nan cufiticoïn. Man cufiahuunshon ina man coashonaino Diosin matoqui unimatiro. Ascafia nan cufiticaïfin fasi shara finacaiquin. ²⁰ Ascashon Dios fu tsainti pushu murannoa cufitihuunshon futsa man yoiquïfin nan cufiti camaqui ahuara man inan nancoïn yoi cafisca man huaiquin. ²¹ Nanscarafi aqui tsoan Dios fu tsainti pushuhuushon futsa ahuara yoiquïfin nan Diosicoïn yoi cafisca huaiquin. Nan muranmain Diosicun. ²² Nanscarifi aqui tsoan Dios ica muranhuunshon futsa ahuara yoiquïfin nan Diospan tsaotihuunshon yafi nan Dioscoïnhuunshon man yoi cafisca huaiquin.

²³ ¡Ohua! Moisés yononi cuscan tapimamisifo futan Fariseofoan manfin fuparamitsamiscoïnfoquin. Ascacun Upa Diosin mato fasi onaintimashqui. Moisés yononi cuscan nantifi mato fanafu atirifi man Dios inanmisi. Man asca huafiaquicai ahuara shara finacai man huamisima. Ascashucai man

futsafohuun ramapaiyamacain atori man shara huacoianmisima. Mato yorafoan ahuaara chaca finonfiacun man ato shara huatamarocon man ato potamisi. Ascan man futsafohuun ramapaicai ato shara huafain ahuaara ahuuscarafiaino man ato potayamaino Diosin matoqui unimatiro. Ahuaara futsafo Moisés yononi cuscan man huamisi cuscan man shara. Ascafia ahuaara shara finacaiarocon huacahuun. ²⁴ Ascafia manfin nan fusho cuscarafoguin. Fushocai oinsharatiroma yora iyoshqui. Nanscarifiai marificai man cayacafi shinantiroma yorafo tapimashquin. Motsa muran napun pacucun man nushfitiro aya shuashquima. Ascafia man nan ina uhuapa camello shuai cafisca huai. Asca huaquifin ahuaarafoan yora imasharatiroma man shinanfafainiquin. Ascafiafashon yorafo ahuaara yopacoiainfo cuscacai man ato ashomisima.

²⁵ ¡Ohua! Ascashufin man fuparamit-samisicoinfoquin. Maton cucho yafi purato fumancayan choca sharafiaquicai ocumuran man chocamisima fasi choshtacoin. Nanscarifiai man yorafo shinanmapai yorasharaforan mato huanonfo. Ascafia maton nomuranshocai man shinansharamisima. Man shinanchaca fustimisi. Ahuaara fipaiqui futsa chaca huashon man fianmisi. Futsafo yopai cuscan atohuunoa shinantamarocon mafi man fipaiyai cuscan fusti man shinanfafaini. ²⁶ Fariseofoan mancai cayacafi shinansharamisima. Ascacun iquisi mato nomuran cayacafi shinansharacahuun isharashcaquin. Man ascaiton nantifiton ointirofo man yora sharacun.

²⁷ ¡Ohuashta! Ascashufin man fuparamit-

samisicoinfoquin. Mahua quini muran yorafo nacun mai huamisifo. Amuran yorafoan shao suyacoinfo. Nan ahuun fupoti toquirininhuan raishamisifo oshopa sharashta inon. ²⁸ Nanscarifiai futsafoan mato oinqui shinantirofo man yora shara ointsa man sharayamafiacun. Manfin fuparamitsamisicoinfoquin. Mato nomuranshon ahuara chacacoinfo man shinanmisi. ²⁹ ¡Ohua! Moisés yononi cuscan tapimamisifo futan Fariseofoan. Manfin fasi fuparamitsamisicoinfoquin. Ascacufin Diosin mato onaintimaquin finacoinquin. Ascashon manfin mato shuni Dios tsain yoimisifo mai huanifo ano man ahuara toquiri onihuamisiqui ato shinanshquin. Ascashori maiafo manaon man charofo huamisi. ³⁰ Ascashon man yoimisi isca huaquin, “Nocon shunifoan Diosin tsain yoimisifo rutunifo cuscan nantian norifi niyoshocai non ato rutu cuanimaran,” ishon man yoimisi. ³¹ Ascan nan man yoia cuscan icon. Maton shunifo rutumistsamisifoan. Marifi man ato cuscaracoin. ³² Nanfoan ato chaca huafafainqui ato rutunifo. Ascan marifi man ato cuscaracoin na Diosin matoqui nichiarifi man rutushquiquin.

³³ Ascashu manfin rono cuscarafuquin. Rono paupaton facu cuscarafu. Diosin yoini cuscan nan omitsiscapanacafo muran marifi man iquishceni. Tsoancai mato nitun huatiroma. Marifi nanno man catio. ³⁴ Ascacun un afanan Diosin tsain yoimisifo yafi Diosin tsainhuunshon cayacafi shinansharamisifo non ahuun tsain tapimamisifori un matoqui nichishqui. Nanforifi man ato rutushquin. Futsan ihui coyan iquinan-

qui man mastashquin nanon. Ascashon atirifi maton ichananti pushu muranshon man fichi cunoqui tuchiaton man coshashquin. Ascaquin man ato omitsisca huai nan pushufoti cafoquin man ato omitsisca huafoicaiquin. ³⁵ Ascashofin nantifi Dios icoinra huafo rutunifoqui. Nan Abel shara rutuqui tau huafain ahuun unutaqui nan Zacarías Berequiaspan facu rutunifo. Nanfin Dios fu tsainti pushu muranshon. Anoshon cufiti chaimashon man rutunifo. Ascan manfin nantifi nan rutunifo cuscan marifi man rutui cafisca huaiquin. Ascacun Diosin atohuunshon mato omitsisca huaqui finacoin. ³⁶ Ascacun un mato icon yoi. Nantifi Diospan yorafo chaca hupaonifo cuscan natian man niyoano atohuunshon mato omitsisca huaqui finacoin.

*Jerusalén anoashu Jesús yorafohuunoashu uaini
Lc 13.34-35*

³⁷ ¡Ohua! Jerusalén ano icafoan. Manfin Diosin tsain yoimisifo rutufain nan Diosin matoqui nichian futsafori man toquirinin ato tsacaqui nanonfo. ¡Ohua! Tacaranun ahuun facufo ahuun pui naman onutiro cuscan huaquin un mato yorafoya cushupaifia mancafin ua nicacasmamisiquin. Manricai uqui fumisima un mato cushunon. ³⁸ Ascan natiancai tsoan mato cushuima. Diosiricai afanan mato cushuima. ³⁹ Ascacuai man ua afanan oinnacama nan Diosin matoqui nichian un nai murannoashu oaitian. Man yoiqui isca huaino, “Dios nocoqui nichian fasi shara finacaia. Upa Diosin a shara huapanacaran,” ishon man uhuunoa yoishquin, —ishon Jesús ato yoini ahuunoa.

24

Jesús yoini Dios fu tsainti pushu paoinshquiran ishon

Mr 13.1-2; Lc 21.5-6

¹ Ascatan Jesús Dios fu tsainti pushu muranoashu caiton non afu rafuafoan yoini, —Ifon, oinpon. Nocon Dios fu tsainti pushu fasi sharash-tacoinran, —non huaiton. ² Noco cumani, —Ai. Nan icon. Natian Dios fu tsainti pushu toquiri putsamushquima, putsamushquima. Ascafiashu nan man oiain chipo paoincanocai afanan rato toquirishta tushushquima, putsamushquima. Nantifi paoinquin cuyocoinshquiran, —ishon Jesús noco yoini.

Nan cuyoaítian ahuarafu iishquiai cuscan

Mr 13.3-23; Lc 21.7-24; 17.22-24

³ Ascatan machi Olivo ano mapufaintan Jesús tsaoni tsoa futsa anomano non afu rafuafoan yocaqui isca huani, —¿Nan min yoiai cuscan ahuaítian ishquimun? ¿Ahuuscashomun non tapitiroquin nantifi cuyoaítian min afanan oshquiai? Noco yoihuu, —non huaiton.

⁴ Jesús noco cumani, —Oinfain mato paranonfoma. ⁵ Yora ichapafoan “Un Cristoran,” ishon mato parapaishcani. Ascashon yora ichapafori parashcani. ⁶ Ascaino mani futsafo ya futsafo rutunainfoan man nicashquin. Ascara nicacani ratuyamacahuun. Un mato yoimisi cuscan nanscacoín aiqin. Ascafia nantifi cuyoaítian icataima. ⁷ Mai futsa ariafo fu futsafo ya rutunainfoanno mani futsafori mani futsafo ya rutunanshquicani. Ascaino mai futsafoanri yora

tushuomafo icaifoanno. Mai futsafo ari fasi mai nayanaiyaishquin. ⁸ Nanscaifin omitsiscai taushcaniquin. Ascafia chipo fasi finacai omitsiscashcani.

⁹ Ascano mato achicashon omitsisca huaquin mato rutushcani. Uhuunshon manifotiton mato noicasmashcani. ¹⁰ Ascaino nantianri atirifi yorafoan ua cachiquiri huashquicani afanancai tsoan ua icoinra huashquicanima. Nanfo afiranan achinantananshcani noincasmatanancani. ¹¹ Ascaino nan fuparamitsamisifoan yoiqui isca huashcani, “Unfin Diospan tsain yoimisiquin,” ishon mato yoishcani. Afocai Diosin tsain yoimisiyamafishon yora ichapafo ato icoinra huamashcani. ¹² Ascaifoanno fasi yora chaca huaquin finacoinshcani. Ascashocai afanan atirifi yorafoan Diosi noishcanima. ¹³ Ascafia nan omitsisca huafiaifoan tsoan ua cachiquiri huatama tunufain uhuun tsain tanasharacun un cushusharatiro Uhuun Upa Diosin icano afu ipasharanon. ¹⁴ Ascano nan tsain shara Diosin nantifi yorafo iquinai cuscan manifoti uhuun tsain yoimisifoan yoiaitian un afanan oshquin.

¹⁵⁻¹⁶ Ascacun Daniel nan Diosin tsain yoimisiton inon pacoai cuscan cunuqui isca huani,

“Dios fu tsainti pushu muran ahuara fasi chacacoinfo futsafoan huanonpacoinran,”

ishon cununi. Ascacun nan tapicahuun. Daniel cununi cuscacoin aiton oin nan Judea ano icafoan machi ari ichoriscatacahuun. ¹⁷ Ascan tsoa pushu fomancayan niashucaí afanan ahuun pushu muran iquitiroa ahuara fiishquin. Ascatama icho-

riscatahuun. ¹⁸ Nanscarifiai tsoacai mau ano yonofiai afanan ahuun pushu ano nasotiroa ahuun sahuuti fiishquin. ¹⁹ Ascacun ohua ainfo nan facu nanuafo yafi aton facu yomumishti chocho acaifo omitsiscaashcani. ²⁰ Ascacun Upa Dios cuficahuun nan omitsiscaitian oipacutian yafi tunutitianri ascanonma. Ascan nantian ascayamaino man ichoima. ²¹ Nan omitsiscaitiancai tsoan ascara oinyomisima cuscara fasi yorafo omitsiscai finacoinshecani. Diosin yora onihuaquin tau huani chaincai tsoa omitsiscai ascayomisima. Ascashucaí tsoari afanan omitsiscai ascanacama. ²² Ascashu nan omitsiscaifotian nantifi yorafo cuyocushquin. Diosin ahuun yorafo nan catoanfo atohuun ramapaiqui omitsiscaifotian ato shatumariscashquin. ²³⁻²⁵ Ascacun ua nicasharacahuun. Omitsiscaifotiancai icataima iquisi un mato yoiyoi. Nan omitsiscaifotianri nan fuparamitsamisifo fucani. Fucashon yoiqui isca huacani, “Un Cristoran,” ishon yoi yamarai “Un Diospan tsain yoimisiran,” ishon nanfoan yoishcani. Ascashon nanfoanri Satanashuunshon tsoan atiroma cuscara mato ismaquin mato parapaishcani. Ascan Diosin nan catoanfo ato cushuyamaino nanfoanri nan fuparamitsamisifo icoinra huaacuana. Ascaino nantian mato yoishcani, “¡Oincapon! Nanfin nocon Cristoqui,” ishon yoi iyamarai, “Nanno chaimashta Cristo nocoqui oaran,” ishon yoiaifoan ato icoinra huayamacahuun.

²⁶ Ascashon nanfoanri yoicani, “Cristo tsoan istaipama ano nocoaran,” ishon mato yoiaifoanno ari foyamacahuun. Nanscarifi aquin mato

yoishcani, “Criston nan pushu cunu muran iquiaran,” ishon mato yoiaifoan ato icoinra huayamacahuun. ²⁷ Uficoin un oaiton man ua shafacafi oinshquin. Canan facaicaiton shafacafi nantio non oinriscatatiro. Nanscarifiai unfin Diospan Facuquin un afanan oaiton nantifi yorafoan ua shafacafi oinshcani. ²⁸ Ahuara naa nanno cotocotofo nocoriscatiro. Nanscarifiai un nocoaitian ua tanamisifo uqui furiscashcani.

Diospan facu nasoaitian
Mr 13.24-37; Lc 21.25-28

²⁹ Ascashu nan omitsiscaifo cuscan anaitiano fari afanan chashayamafain oshuricai afanan chashashquima faquishicoin iishquin. Ascaino fishifori nai ariashu pacui futsushquin. Nantifi nai murannoafori nayanaiyaishquin. ³⁰ Ascashon ahuafo nai arishon un ismai cuscacoin aiton tapitirofo un afanan mai ano nasoai cuscan nantifi yorafoan tapinonfo. Un Diospan facushon un nantifi iquinau cuscan. Un nai murannoashu coin camaqui fotoaiton oincani manifoti nan icoinra huamafo fasi ratucani uaishcani. Uhuun curushuunoashu un fotoaiton oincani. ³¹ Ascaino nantianri uhuun oinmatifo ufu nai muran icafo un nichishquin aton manuti fasi curushcai chaan chaan acaino uhuun yorafo manifoti anofo yafi nai murannoafori uqui fushcani.

³² Ascacun un mato fana huiguerahuunoa ahuafo futsa yoinon. Ua nicasharacahuun. Huiguera pui risquisi futsuaition man tapitiro faritian itiro cuscan. ³³ Nanscarifiai nan un mato yoiai cuscacoin aiton tapicahuun mun oti chaima nanscacoin aiquin. ³⁴ Ascacun un

mato icon yoi. Ahuarafo un mato yoiai cuscacoin aiton nataishoma oinyocani. ³⁵ Ascaino nai yafi mai cuyoshquin. Uhuun tsain cayacafi iconcain fiananancai apanacama. Un mato yoiai cuscacoin aashquin.

³⁶ Ascafia ahuutiaran un nai ariashu afanan fotoainocai tsoan tapiama. Diosin oinmati afu icafoanricai tapiafoma. Urifi uhuun Upa Diosin facufiashocai un tapiama. Nan uhuun Upa Diosin fustitofin tapiaquin. ³⁷ Noco shuni Noé niyoano inifo cuscacoinrifiai afanan un oaitian nanscarifi ashcani. ³⁸ Ascano nantian tsoan Dios shinantama pii sharafain ayafain fianansharacainaifoanno. Fai tahuan noconi. Nanscasi ari-aifoanno Noé ahuun shashohuan muran iquini. ³⁹ Ascashu iquifiaitocai tsoan tapinima fai tahuan nocoai. Ascashu nantifi yorafo asai futsunifo. Nanscacoindrifi aashcani un afanan oaitian. Ua shinantama afi apaiyaifo cuscasi huariaifoanno. ⁴⁰ Ascaino nantianri nocofunu rafu mau ano yonocani futsa uari cai yamariscatanaino. Futsa nitushquin omitsiscapanacafo muran caashquin. ⁴¹ Nanscarifiayainfon rafu nanincani. Futsa uari cai yamariscatanaino futsa nitushquin omitsiscapashquin.

⁴² Ascacun itisharacahuun. Un maton ifofiacucai marifi man tapiama ahuutiamain un afanan matoqui oshquicain. Un mato yoimisi cuscan nanscacoindrifi acahuun. ⁴³ Ua nicasharacahuun tapishcaquin. Pushu ifoan iquisi itisharashon yomutso yamu ahuuscaraino ahuun pushu muran iquiai tapishocai iquimatiroma. ⁴⁴ Nanscarifiiai marifi

itisharacahuun. “Iscaino nocon Ifo oimaran,”
ishon shinanyamacahuun. Ahuscara atanaino
un matoqui nocoriscaiquin.

*Oinmati rafu futsa ifoan yonoai cuscacoin aino
futsa nan yonoai cuscacoin aima*

Lc 12.41-48

⁴⁵ Man tapinon un mato yoi ahuu cuscaramain
oinmati shara itiroquin. Niaifocoin mai futsa ari
caquin niaifo patashari yoitiro isca huaquin,
“Uhuun oinmati futsafo ato tushu shafatifi
inanhun. Nanticoin rafu ato pashcananshara
huahuun. Ascashon ua ato cushusharashohun,”
huafaini catiro. ⁴⁶ Ascatan niaifocoin afanan
nocoshon oian ahun niaifo patashari nan
yoia cuscacoin aano fasi aqui unimacointiro.
Ascashon naan shara huatiro. ⁴⁷ Ascacun un
mato icon yoi. Nan niaifoan ahun oinmati
yoi, “¡Aicho! Natian nantifi uhuunafo mian
cushusharashotiroran,” ishon yoitiro. ⁴⁸ Ascfia
niaifo patashari chacapan ahun nomuran
shinanquin isca huatiro, “Uhuun ifo funa
nasoimaran,” ishon shinanquin. ⁴⁹ Oinmati
futsafo nantifi sutuqui futsatiro. Ascashon
shafatifi nan paunmisifo ya pauncain monocai.
⁵⁰ Ascashon shinantiro isca huaquin, “Natiancai
uhun niaifo oimaran,” ifiaino samamashta
nocoriscatiro. ⁵¹ Ascashon niaifoan nan
niaifo patashari fasi onaintimai. Asca huatan
ahun oinmati futsafo yonoqui isca huai, “Nan
omitsiscapanacafo muran fuparamitsamisifo
ano nan chaca potacahuun,” ishon ato yoishquin.
Ascan nannoashu uaiqui omitsiscapanaca.

25

Diez shomayafohuunoa Jesús ato yoini ahuara futsa ato tapimashquin

¹ Ascatan diez shomayafohuunoa un mato yoi un oaitian ahuu cuscaramainquin un mato tapimashquin. Ascatan nan diez nan nocofunun rama ainfo fiái manafo atofu fuusishcaquin. Ascafia nan nocofunun ahuun ahuin fiicashu nasoataimacai tsoa afi ranan fuusi tauafoma. Nan diez shomayafoan iquisi lamparina foafo. Nocofunu manai focani. ² Nan mucu fustiti shomayafain tsoancai cayacafi shinansharayamafain itisharafoma. Asca nan mucu fustiti futsafoan shinansharafain iquisi itisharafo. ³ Nan shinansharaimafoancai aton lamparina fofiaquin tsoan kerosene foama. ⁴ Ascafia nan shinansharafain itisharafoan aton lamparina fofain iquisi keroseneri foafo. ⁵ Ascafia nan nocofunun ahuun ahuin fiaicai funa nocoyamaino nan shomayafoan manariacani fasi oshapaicoincani oshafo. ⁶ Ascashu oshafoanno futsan yamu nacucahuanaino oi ashcafinin ato cuna, “Nan ainfo ficaitan man oiquin. Moinifoancahuun. Non ihui sharanon,” ato huaa. ⁷ Ascaino shomayafo moinifoan aton lamparinafo otaqui futsafo. ⁸ Ascashon nan mucu fustiti shinansharaimafoan nan itisharafo yocani “Maton kerosene ichapamashta noco inancahuun. Man nocon lamparina nocaiquin,” ishon ato yocaifoan. ⁹ Nan itisharafoan ato cumani, “Ma. Noconariraca itiroma. Ascan kerosene inanmitsafo ari fotacahuun fiishcaquin,” ato huanifo. ¹⁰ Ascaino kerosene fi

focani foaifoanno nan ahuun ahuin fiafai nocotan iquicainaino nan shomaya itisharafo afu pushu muran iquiafo fuusishcaquin. Ascashon caincaiti fupoafu.

¹¹ Ascaino chipo shomaya futsafo nococashon yoiifo, “Ifon. Noco fupushohuun non iquinon,” huaifoan. ¹² “Un mato fupushotiroma. Icon un mato yoi. Uncai mato oinmisima,” ishon ato yoini. ¹³ Nanscarifiai ahuitiaran un afanan matoqui os-hquicain tsoan tapiama. Ascacun itisharacahuun.

Puihuunoa yoiqui Jesús ahuaara futsa ato tapi-mani

Lc 19.11-27

¹⁴ Afanan un mato ahuaara futsahuunoa yoi. Noco-funu ahuun pushu anoashu chai caquin ahuun oinmatifo cunashon yoiquin isca huani, “Uhuun pui ua cushusharashocahuun,” ato huafaini cani. ¹⁵ Ascashon ahuun oinmati rafu non fusti ato pui inanni. Futsa cinco mil pui inanfain futsa dos mil pui inanfain futsari mil inanni. Nan tapiafo cus-can ato inanpacua. Ascan ato inantan mai futsari cani. ¹⁶ Niaifoan caquin nan cinco mil inan cusc-ahuunshon samamashta ahuaarafo fiashu afanan inanmitsashon ahuun rafanan cinco mil fia. Asca huaquin diez mil man fia. ¹⁷ Nanscarifi aqui nan pui dos mil fiaton afanan dos mil fia. ¹⁸ Ascan nan oinmati mil pui fusti fiaton funocasmaquin mai poquishon amuran ahuun niaifo pui huashoan.

¹⁹ Ascashu fari ranan finontan afanan niaifo ahuun pushu ano nasoni. Nasoshon nan rafu non fusti ahuun oinmati ato cuna ahuitimain fishoafuquin ato yocashquin. ²⁰ Ascano nan cinco mil pui inanniton yoiqui isca huani, “Niaifon,

mian cinco mil pui inanni. Ascafia mun mia natian afanan cinco mil fishoan. Ascan oinpon. Naquian,” ishon inanni. ²¹ Ascaiton ahuun niaifoan yoini, “¡Aicho! Mian fasi shara huaa. Un mia yoia cuscacoin min huaa. Un mia ichapama inanfia ahuunshon min yonocoin shara. Ascacun nan un aya cuscan mian cushusharashotiro. Un unimai cuscan mirifi nanscarifiai min ufu unimatiro. Ascacun iquiyohuu,” ishon yoini.

²² Ascano nan dos mil pui inanniton arifi yoiqui isca huani, “Niaifon, Mian dos mil pui inanni. Ascafia mun mia natian afanan dos mil fishoan. Ascacun oinpon. Naquian,” ishon inanni. ²³ Ascaiton nanrifi ahuun niaifoan yoini, “¡Aicho! Mian fasi shara huaa. Un mia yoia cuscacoin min huaa. Un mia ichapama inanfia ahuunshon min yonocoin shara. Ascacun nan un aya cuscan mian cushusharashotiro. Un unimai cuscan mirifi nanscarifiai min ufu unimatiro. Ascacun iquiyohuu,” ishon yoini.

²⁴ Ascan nan mil pui inanniton arifi yoiqui isca huani, “Niaifo, mun tapian mincai tsoa shinainma. Minricai nocohuun ramapaima. Non mia yonoshofiaitocai min noco ahua inantiroma. Mina fusti itiroran. ²⁵ Ascacun un ratuqui min ua inan cuscahuunshon ahuarafu fipaifiai un funotiroracati, ishon un shinan. Ascacun nan mian inan cuscan un mai muran onua. Ascan natian mun mia fishoan. Oinpon. Naquian,” huaiton.

²⁶ Ahuun niaifoan cumani, “Min fasi chacacoin. Minfin oinmati shanishuniquin. ¿Min shinanmun un futsafo shinainmaquin? ¿Uaraca futsafoan

yonoshonaiton un ato ahua inanma? ²⁷ ¿Ascan nannori shinanflaquin ahuuscaquin mai muran min pui huamun? Asca huatamarocon nan pui huamisifoanno min huacun un nocoshon parata-mari un fiicuanaran,” ishon niaifoan yoini.

²⁸ Ascashon ahuun niaifo patashari yononi, “Nan oinmati shanishuni ahuun pui fianhuun futsa nan cinco mil aya inanshquin. ²⁹ Ascano nan ua icoinra huacoinnafin un fasi paratamacoin in-ainquin. Ascan nan ua icoinra huama ichapama aya cuscan futsan fiain. ³⁰ Ascacun nan oinmati ahua tapiama chaca faquish muran potacahuun. Nannoashu fasi omitsiscai fasi uainon,” ishon niaifoan yoini.

Cuyoaitian Jesús yoishquin ratofomain afu ipatiro iyamarai omitsiscapanacafo muran focaniquin

³¹ Ascacun un mato afanan yoi. Unfi Dios ari-ashu mai ano fotoniquin. Ascashu un afanan oaitian nantififain aton niaifocoin un iishqui. Un Diospan Facucoincun nantififain ua oinsh-cani. Uhuun oinmatifo ufu nai muran icafoya un oaiton. Nantianri un ato yoishquin rato-fomain Diospan yorafo iyamarai ahuun yorafo-maquin. ³² Ascashu nantifi manifotifi uqui fush-cani. Chashoan cushumisiton ahuun chashoanfo yafi nan chashoan ointsafon aton anu cabra aton ichanan huai. Nan chashoanfosí tiri futsa huafain nan cabrafori tiri futsa huai. ³³ Ascashon ahuun mumihuuri chashoanfo huafain ahuun mushqui-huuri cabrafo huai. Nanscarifiai ua tanamisifo un tiri futsa huafain nan ua icoinra huamafo un

tiri futsa huai. Ua tanamisifo uhuun mumihuuri huafain uhuun mushquihuuri nan ua icoinra huamafo ato huashquin.

³⁴ Ascatan un Niaifoshon nan ua tanamisifo un yoiqui isca huashquin, “Uqui fucahuun. Uhuun Upa Diosin mato unimamanon. Nan mai oni-huaitian matohuunoa shinanquin isca huani, ‘Un icano un ato iquimanonpacoī uhuun yorafo inonfo. Uhuunafori atona inonpacoiran,’ ishon Upa Diosin shinanyoni.

³⁵ “Man ua shara huamisi. Ascacun uhuun Upa Diosiri mato shara huashquin. Un fonaicaiton man ua pimamisi. Un nomiaiton man ua ayamamisi. Un matoqui nocoaiton ua oinyamafiamisishaquin man ua yoiqui isca huamisi, ‘Uhuun pushu muran iquiyohuu. Un mia pimafain min nuno uhuun pushu muran oshatiro.’ ³⁶ Un sahuutiromacuri man ua sahuuti sahumani. Un isincaitori man ua cushusharamisi. Ua cunu muran iquimanafoanno man ua oin camisiran,” ishon ua tanamisifo un yoishqui.

³⁷ Ascacun ua tanamisisharafo uhuun Upa Diosin aton chaca soashona. Nanfoan ua cumacaquin isca huashcani, “¿Ifon, ahuutian non mia oinmisimun min fonaincaiton non mia pimafain min nomiaitori non mia ayamamisi?

³⁸ ¿Ahuutianritsi min nocoqui nocoaiton non mia oinyamafiamisishaquin non mia nocon pushu muran iquimafain min sahuutiromacuri non mia sahuuti sahumamisi? ³⁹ ¿Ascan ahuutianritsi mia cunu muran iquimanafoan non mia oincani?” ishon ua yoishcani.

⁴⁰ Ascaifoan un aton niaifoan un ato yoiqui

isca huashquin, “Uhuun yorafo nan ua icoinra huafo futsafoan atohuunoa yoiqui isca huamisi ‘Nancai ahuamaran,’ ishon man yoimisi. Asca nan uhuun yora ahuamafishu man ato shara huamisi cuscafin nan uari shara huai cafisca man ato huamisiquin,” ishon un ato yoishquin.

⁴¹⁻⁴³ Ascashon nan ua icoinra huamafo tiri futsa niafoan un ato yoiqui isca huashquin, “Manfin ua chaca huamisiquin. Un fonainfaiatocai man ua pimamisima. Un nomiaitoricai man ua ahuara ayamamisima. Un matoqui nocofaiatocai ua oinyamafiamisishaquin man ua pimayamafain un sahuutiromafiacuri man ua sahuumamisima. Un isinincaitoricai man ua cushumisima. Ua cunu muran iquimanafoanno cai man ua oincamisima. Ascacun umaquinoashu fotacahuun. Nan yoshin chaca Satanás yafi afu yoshin chaca futsafo Upa Diosin ato chi urumanhuan itishara huashoan nannori mato potai. Nannoashu nanfoya man omitsiscapashquin,” ishon un ato yoiaiton.

⁴⁴ Nan ua icoinra huamafoan ua cumaquin isca huashcani, “¿Ifon, ahuutiamun non mia oinmisiquin min fonaincaiton non mia pimayamafain min nomiaiton non mia ayamamisima? ¿Ahuutianmun min nocoqui nocofaiton oinyamafiamisishaquin non mia cushusharayamafain min sahuutiromacun non mia sahuumamisima? ¿Ahuutianritsi min isinincaiton mia cushuyamafain mia cunu muran iquimafiafo non mia oin camisimamun?” ishon ua yocashcani.

⁴⁵ Ascaiton un ato cumaquin isca huashquin, “Un mato icon yoinon. Nan ua icoinra hua futsafo

man yoimisi isca huaquin, ‘Nancai ahuamaran,’ ishon atohuunoa man yoimisi. Ato asca huaquifin nan ua shara huaima cafisca man huamisiquin,” ishon un ato yoishquin.

⁴⁶ Un ato nannori yoiano umaquinoashu omit-siscapanacafo muran foshcani. Ascaino nan ua icoinra huafo uhuun Upa Diosin aton chaca soashonafo un icano ufu foshcani ufu ipash-caquin, –ishon Jesús ato yoini.

26

Jesús rutushcaquin afi ranan yoinannifo

Mr 14.1-2; Lc 22.1-2; Jn 11.45-53

¹ Ascano noco yoiqui anaititan Jesús afanan afu rafuafofi tsain futsa noco yoiqui isca huani,

² –Man man tapian nocon fusiti shafa man nococuana. [Diosin ahuun oinmati nan afu ica yonoo Egipciofoan aton furun iyoafofosi rutuqui futsani. Ascfaiaquicai nocon shunifoan aton furun iyoafofo finonmani ato rutuquima.] Nan non shinannisi nocon fusiti osha rafutan iqui. Ascan nantianri ua ato achimacani ua mastanonfo, –ishon Jesús noco yoini.

³ Ascan nantianri nocon yorafohuunshon Dios cufimisi niaiffofo futan Moisés cununi cuscan tapimamisifo non Dios fu tsainti pushu cushumisifo Caifás pushu ano ichanancani. Nan Caifás nocon yorafohuunshon Dios cufimisi niaifocoin ini.

⁴ Ascashu ichanancashon shinannifo, –¿Ahuuscashomain non Jesús achinoanti rutushquin? –ishon ahuara chanishtahuunshon rutupaicaquin. ⁵ Ascacun yoinifo, –Fusititancai non achitiroma yorafa

fasi mucacani nocoqui sinatiroforan, –icashu yoinannifo.

Ainfoan Jesusqui ininti ocani

Mr 14.3-9; Jn 12.1-8

⁶ Ascatan non Jesús fu Betania ano cani. Caashu Simón pushu muran non iquini. Nan Simón nami tocoi futsua ini. ⁷ Jesús nannoshon noco futan piaino ainfo ininti tsomashu oni aqui ocashquin. Nan moticanun ahuun anu alabastro. Amuran ahuun ininti fasi paratamacoin ahuun pui nuua. Ascashon ainfoan Jesús ahuun mapoqui ininti ocani.

⁸ Ocaiton oin non afu rafuafo ainfoqui non sinacoinqui yoini, –¿Ahuuscaimun nan ininti fasi paratamacoin ahuun pui nuua na ainfoan ocaiqui? ⁹ Nan ininti ocatama inanmitsashon ahuun rafanan pui fishon nan yora ahuuomafo inanshara icuanaran, –icashu non yoinanni.

¹⁰ Ascaiton non yoiai cuscan Jesús onanshon noco yoini, –¿Ahuuscaimun na ainfoqui man tsain chipuicain? Uafin nanton fasi shara huaquin.

¹¹ Manfin yora ahuuomafo fu ipanacaquin. Ratoran shafatan man ato ahuara shara huashotiro. Asafia uncai nuno mai ano matofu ipanacama.

¹² Ascan nan ainfoanfin uqui ininti ocaquin. Nan yora maiamamaquin ininti ocamisifo cuscan un nataiyamafiaiton na ainfoan ua shinanquin uqui ininti oca. Uhuun caya iquisi itishara huapai ua mai huashquiaifo cuscan. ¹³ Ascacun un mato icon yoi. Nan tsain shara uhuunoa manifotiton yoishcani. Nan ainfoan ua rama aca cuscari

yoishcani. Ascashon ua shara huaa cuscan ahu-
 unoa shinanpacushcaniran, —ishon Jesús noco
 yoini.

Judaspan Jesús ato achimani

Mr 14.10-11; Lc 22.3-6

¹⁴ Noco nannori Jesús yoaino non afu rafuafo
 doce futsan ahuun anu Judas Iscariote nocon
 yorafohuunshon Dios cufimisi niaifofu ano cani.

¹⁵ Ascacaini cashon ato yoiqui isca huani, —¿Un
 mato Jesús achimacun ahuuti pui man ua inan-
 tiromun? —ishon ato yocaiton. Cumanifo, —Non
 mia treinta toro oshopafo inantiroran, —ishon
 yoinifo. Asca huatan inannifo. ¹⁶ Ascano nantian
 Judaspan ahuun nomuran shinanqui tau huani,
 —¿Ahuuscashomain un ato Jesús achimanoanti? —
 ishon shinanriani.

Ahuun unutaqui Jesús afu rafumisifo futan pini

Mr 14.12-25; Lc 22.7-23; Jn 13.21-30; 1Co 11.23-

26

¹⁷ Ascano noco fusiti shafan man nocoano nan
 shafa misi farashati maisi non pimisi. Nantian
 non afu rafuafo Jesusqui cashon non yocani, —
 Ifo, na shafan nocon fuusititan. Nan nocon shu-
 nifoan ato facu iyoafofo Diospan nai oinmati fi-
 nonmani ato rutuquima nan non shinanmisi. ¿As-
 can rani min noco nichipaimun non mia itishara
 huashonon no futan anoshon piishquin? —ishon
 non yocani.

¹⁸ Jesús noco cumani, —Jerusalén ano fotac-
 ahuun. Nanno nocofunu futsaqui nocoshon
 yoiqui isca huacahuun. “Nocon tapimamisi-
 ton mia tsain fomaqui isca huaa, ‘Un naitian

man nocoti chaimashtaqui. Nocon fusititian non min pushu muranshon piiran,' ishon noco Jesús yoiaran," —ishon yoitacahuun noco huani.

¹⁹ Ascashu nan noco yoia cuscacoin huaquin cunu muran non itishara huani. Nannoshori chashoanun facu non pichani piishquin.

²⁰ Man fari caino non afu rafuafoya Jesús sapa ano tsaoni. ²¹ Nannoshon non piaiton Jesús noco yoini, —Un mato icon yoi. Nan ratoran futsan man ua ato achimairan, —noco huaiton. ²² Nicai non pusinima. Ascashon non yocani, —¿Umun, Ifon? —ishon nantifiton non yocapacuni.

²³ Ascaiton noco yoini, —Nan man ufutan taso murannoa misi pocotan piaitofin man ua ato achimaiquin. ²⁴ Ascan Upa Diosin tsain inon pacoai uhuunoa cununi cuscacoinfin un naicain. Ascacia nan nocofunun ua ato achimanai cainyamanifin shara icuanaquin, —ishon Jesús noco yoiaiton.

²⁵ Nicaquin Judas, nan ato achimaiton Jesús yocani, —¿Umun, Ifon? —huaiton. —Aifain. Minfiqui, —huani.

²⁶ Ascashon piaifoanno Jesús misi finifoantan iquisi apa Diosin cufiyoni —¡Aicho! Upa, min noco cushusharafafainiran, —huatan noco yoini, —Na uhuun caya cuscara. Picahuun, —ishon torupacushon nocoti inanni.

²⁷ Ascashon cucho finifoan afanan Apa cufini, —¡Aicho! Upa, min noco cushushararan, —huatan cuchoqui fimi unu manuta noco inanqui yoini. —Nantififain na ayacucahuun, —noco huani. ²⁸ Asca huatan noco yoini, —Naafin uhuun imi cuscaraquin. Uhuun imi focain un nai. Nantifi yorafoan chaca huamisihuunoashu un nai aton

chaca soashonon. Un ascano yora ichapafu Diosin potapacunonma. ²⁹ Ascacun un mato icon yoi. Uncai funa afanan mato futan ayaima. Nan uhuun Upa Diosin niaifoan nantifi iquinaitian un afanan maton futan ayashquin, –noco huani.

³⁰ Ascano man ahuun tsain yoiqui anaititan Diosin tsain non fanainni. Ascatan machi ahuun anu Olivo ano non cani.

*–Pedro min futsafo, “Un Jesús oinmisimaran,”
ishon min yoiran, –Jesús huani*

Mr 14.26-31; Lc 22.31-34; Jn 13.36-38

³¹ Ascashon afanan noco yoini, –Na yamutafin nantifain man ua potafaini ichoi caiquin. Diosin tsain cununi isca huaquin,

“Unfi chashoanfo cushumisi rutuicain.
Ascaino chashoanfo ichoi futsucaniran,”

icashu cununi. Nanscarifiai ua rutuaifoanno na yamutan man uhuunoashu ratufaini ichoicai.

³² Ascafia un funiashu Galilea ano un cai tauicai. Ascano man uqui chipo nocoicashqiran, –ishon Jesús noco yoiaton.

³³ Pedronun Jesús cumani, –Nantifiton mia potafiaifoannocai un mia potaimaran, –huaiton.

³⁴ Jesús Pedro yoini, –Un mia icon yoi Pedro. Tacara cuoataima min ato yoiqui “Uncai Jesús oinmisimaran,” ishon min ato yoiqui rafunon fusti huairan, –huaiton. ³⁵ –Ma, Ifo. Un mifu nafi-aquicai un ato yoinacama un mia oinmisimaran, –ishon Pedronun yoini. Ascaiton norifi nantifiton non nannori yoini.

Jesús Getsemaní anoshon apa cufini

Mr 14.32-42; Lc 22.39-46

³⁶ Ascatan ihuifo mapoano ahuun anu Getsemaní nanno Jesús no fu cashon noco yoini, —Nuno tsaocahuun. Uhuun Upa un cufiyotanon, —noco yoini. ³⁷ Ascatan Pedro yafi Zebedeo ahuun facu rafu Santiago yafi Juan nan rafu non fusti ato iyoni. Nan fasi omitsiscái tauai cuscan shinain fasi ahuun nomuran isicoinni. ³⁸ Ascashon ato yoini, —Un fasi omitsiscái cuscan uhuun nomuranshon shinain mun naacuana. Ascacun nunoshon oinyocahuun. Oshacaquima, —ishon ato yoini.

³⁹ Ato asca huatan chaimashta caashu fuopacacahuan Apa Dios cufini, —Upa un omitsiscái cuscan mian numatiromainquin ua numahuu. Ascashon un apaiyai cuscan huaquima nan min apaiyai cuscan fusti ua huahuu, —huani.

⁴⁰ Ascashon apa cufinquin anaititan afanan atoqui oquin oian man oshafo ini. Ascaiton Jesús Pedro yoini, —¿Man u futan Diosin cufiyotiomanun? ⁴¹ Oshacaquima. Dios cuficahuun Satanás mato chaca huamapaiyai cuscan huashcaquima. Ascashon Diosin mato amapaiyai cuscan marifi huapafiaquicái Diospan curushyamainocai man atiomaran, —ishon Jesús ato yoini.

⁴² Ato asca huatan afanan apa Dios cuficaicani. Cashon apa yoini, —Upa, min ahudara futsa yorafo numashqui atiomamainquin nan min apaiyai cuscan huahuu. Unfi man itisharaqui atohunoashu omitsiscacaini naashqui, —ishon Jesús apa cufini.

⁴³ Ascashu afanan atoqui oquin oian afu rafuafo afi oshafo ini. Fasi osha murancoianfo. ⁴⁴ Ascaino afanan ato anoashu cashon apa Dios cufini. Nan cufia cuscacoin afanan nannori cufini.

⁴⁵ Ascatan afanan oquin oian afi oshafo ini. Ascaiton ato yoini, —¿Manmun afi moiama? Natianfin nan chaca huamisifoan ua ato achimai fucaniquin. ⁴⁶ Funicahuun. Non canon. Nan nocofunun ua ato achimai man oiquin, —ato huani.

Jesús achinifo

Mr 14.43-50; Lc 22.47-53; Jn 18.2-11

⁴⁷ Ascaino nan Judas Jesús fu rafumisi futsan oaino a yorahuanrasi nopu yafi coshatifo tso-macanashu funifo. Nocon yorafohuunshon Dios cufimisi niaiffofoan futan Dios fu tsainti pushu niaifo patasharifoan ato yonoa funifo. ⁴⁸ Nan Judaspan yorafo iquisi yoiqui isca huani, —Un Jesús tamoqui tsoacaiton tapicahuun nanfin Jesusquin achicahuun, —ato huani. ⁴⁹ Ato yoiqui asca huatan samamashta Judas Jesusqui nocoshon ahuun tamo tsoacatan yoini, —Tapimamisiton, man yamuaran —ishon yoiaiton.

⁵⁰ Jesús cumani, —Uhuun yoran, nan mian apaiyai cuscan ua huahuu. Nanscayoi min oaquin, —huani. Ascaiton nan Judas fu fuafoan Jesús achinifo niaiffofo ano iyoshcaquin.

⁵¹ Ascaiton Jesús fu rafua futsan nopu fitan nocon yorafohuunshon Dios cufimisi niaifocoinin ahuun oinmati pashtufain rurani.

⁵² Ascaiton Jesús yoini, —Unuhuu. Min nopu ahuun ona muran huahuun. Nan nopun yora ru-tuafin arifi nopun natiroquin. ⁵³ Uhuun Upa Dios un yocaitofin ahuun oinmatifo afu icafo 72,000 ua nichishotiroquin ua cushui funonfo. ⁵⁴ Ascan uafin uhuun Upa Diosin ahuun nai oinmatifo ua

nichishotiroquin ua cushui funonfo. ¿Ascafia ahuuscashumun Diosin tsain uhuunoa cununi cuscan un yorafohuunoashu natiromaquin? Ascan uncai Upa Dios cufima ua ahuun oinmatifo afu icafo ua cushunon, —ishon Jesús ato yoini.

⁵⁵ Ascaino nantianri Jesús achipaiyaifoan ato yoini, —¿Unmun yora pofu cuscaracun man ua nopu yafi coshatifo yashon achi fua? Shafatifi un Dios fu tsainti pushu muranshon un mato yoifiaitocai man ua achipaiti huama. ⁵⁶ Ascafia nan man ua acai cuscan Diosin tsain yoimisisfoan uhuunoa cununifo cuscan nanscacoïn man ua huairan, —ishon Jesús ato yoini. Ascaino non afu rafuafo nantifi non amaqui ichoni.

Jesús niaiffoan ointaifi iyonifo

Mr 14.53-65; Lc 22.54-55, 63-71; Jn 18.12-14, 19-24

⁵⁷ Ascaino achicashon nocon yorafohuunshon Dios cufimisi niaifocoinin ahuun pushu ano iyonifo. Nan niaiffoan ahuun anu Caifás. Nan-nori niaiffo ichanannifo. ⁵⁸ Ascaino Pedro acachori cani. Acachori cafi ai fishtatama cani. Dios fu tsainti pushu cushumisifoya Pedro niaiffoan umainti ano tsaoni Jesusmain ahusca huacaniquin ishon oinpai.

⁵⁹ Nannoshon niaiffoan shinanpainifo, —¿Nonmun raquiri huatiroquin Jesús ahuara chaca huaran ishon rutushquin? Ahuacai ahusca huaiton non nicayomisima non rutuai, —icananshu nocon niaiffo afi ranan yoinannifo. ⁶⁰⁻⁶¹ Yora ichapafoan, —Jesús ahuara chaca huaran, —ishon ahuunoa tsain chaca yoinifo. Paracaquin. Ascafia niaiffoancai Jesushuunoa

ahuara chaca iconcoïn nicanifoma rutushcaquin. Ascashon futsafoan Jesushuunoa tsain chaca huaquin anaitiafoanno chipo nocofunu rafutan niaiffoan ointaifi Jesusqui tsain chaca huanifo. —Man non nicaitan na nocofunun isca huaquin yoia, “Nocon Dios fu tsainti pushu yorafoan aca cuscan unfi choquiatiroquin. Ascashon osha rafu non fusti finontan un afanan futsa huatiro. Uncai tsofutan atiroma. Urus fustifin un atiroquin,” Jesús iquitaran, —ishon nan rafutan yoinifo.
⁶² Ascano yorafohuunshon Dios cufimisifo aton niaifocoin nan Caifás Jesús yocani, —¿Miqui tsain chaca huafo cuscan icon iyamarai iconmamun? —ishon yocaino. ⁶³ Jesús puusinima. Ascaiton afanan yoini, —Diosin nan nipamisi ahuun anuhuunshon ua yoihuu. ¿Minmain Diospan Furunquin nan Diosin mia catonnimainquin? Ascan natian nannori un mia yonoi. Ua icon yoihuu, —ishon yocaiton.

⁶⁴ Jesús cumani, —Nan mian yoiai cuscafin unquin. Un mato yoinon. Upa Diosin ahuamamishti huatiro cuscan chipo man ua oinshquin. Uhuun Upa Diosin niaifo fu un icun. Urifimain un afu niaifocoianshu. Ascacun un nai ariashu coinfo camaquí oaiton man ua oinshquiran, —ishon Jesús ato yoini.

⁶⁵ Ascaiton nicai nocon yorafohuunshon Dios cufimisi niaifocoin, —Un Diospan Fururan, — Jesús icaiton nicai fasi sinacoïnni. Ascacun ahuun sahuuti fashnuqui yoini, —Noncai afanan yorafoan Jesusqui tsain chaca huai yopaima. Manmain nofocoin ahuun tsain chaca nicayamaifin, “Un Diospan fururan,” iquifin Dios chaca

huaquin. ⁶⁶ ¿Ascacun man ahuusca Jesús huapaimun? —ishon aton niaifocoinin ato yocaiton. Nantififain, —A rutucahuun, —huanifo.

⁶⁷ Asca huatan ahuun fusoqui cumo michofain sutufain futsan tapasni. Ascashon cashu mutsama huacaquin. ⁶⁸ Yoinifo, —Min Cristomainquin min nantifi tapicoian. Asca tsoan mia acamainquin noco yoihuu, —ishon cashu mutsama huanifo.

—Un Jesús oinmisimaran, —ishon Pedronun yoini

Mr 14.66-72; Lc 22.56-62; Jn 18.15-18, 25-27

⁶⁹ Ascaino Pedro pushu umainti caashu tsaoni. Ascano nocohuunshon Dios cufimisi niaifoaan ahuun oinmati shomayaton Pedro fuchishon yoini, —Jesús Nazaret anoa fu mirifi min afu oaquin, —huaiton. ⁷⁰ —Ma. Mian yoiai cuscacai un tapiamafinquin, —Pedronun aton ointaifi huani.

⁷¹ Asca huafaini caincaiti ano caacun nannoshori shomaya futsanri Pedro fuchishon ato yoini, —Na nocofunufin Jesús Nazaret anoa fu imisiquin, —ishon yoiaiton.

⁷² Afanan Pedronun yoini, —Ma. Min yoiai cuscafin Diosin tapiaquin uncai na nocofunu oinmisimaran, —ishon yoini.

⁷³ Sama racatan afu niafoan Pedro yoinifo, —Icon. Minfin mirifi Galilea anoaquin. Min tsainhuunshon non mia onanran, —ishon yoiaifoaan.

⁷⁴ Afanan ato yoini, —Uncai mato paratiroma. Diosin ua oin. Un chanicun Diosin ua chii uru muran potatiro. Nantonfin tapiaquin un mato icocoin yoiaiton. Ascan uncai na nocofunu

Jesús oinmisimaran, –ishon Pedronun afanan ato yoini. Ascaino samamashta tacara cuoni. ⁷⁵ Tacara cuoaino Jesús yoia cuscan Pedronun shinantani. –Pedron un mia yoi. Na yamutan tacara cuoataima min ato yoiqui rafu non fusti huai, “Un Jesús oinmisimaran,” –ishon Jesús yoia cuscan shinantani chifi caashu Pedro fasi uaini.

27

Pilato ano Jesús iyonifo

Mr 15.1; Lc 23.1-2; Jn 18.28-32

¹ Ascaino funamanrishta nocon niaifofoan shinanpainifo, –Ahuuscashomain non Jesús rutumatiroquin, –icashu yoinannifo. ² Ascatan munushcashion nan Romanon niaifoan ahuun anu Pilato ano Jesús iyonifo.

Judas nani cuscan

³ Asca huashon Judaspan Jesús rutuaifoan nicaquin fasi shinanni. –¡Ohua! Un Jesús ato achimanama shara icuanaran, –ishon shinanni. Ascashu nocon yorafohuunshon Dios cufimisi niaifofo yafi Dios fu tsainti pushu niaifofo ano cani treinta toro paratamacoin ahuun pui nuua ato nasoin cai. Ascacainicashion ato yoini. ⁴ –Unfin chaca huaquin. Jesuscai ahua chaca huayamafiamisicun un ato parashon achimanaran, –ishon ato yoiaiton. Cumanifo, –Ahuuscaquitsi min noco anori yoiyoa. Noncai ascara tapipaima. Mififin min shinanquin, –huaifoan. ⁵ Nicaquin nan Dios fu tsainti pushu muranshon ato naman torofo saafaini caashu afiri rusfipan tunushumuacucahuatan nani.

⁶ Asca huatan Judas cai cachiori niaifofaan nan torofo topinifo. Ascashu niaifofa afi ranan yoinannifo, —Nocon shunifoan yononi cuscan non ahuun rafanan yora rutumana nan puicai non Dios fu tsainti pushu muran huatiroma. Nan pui huati murancai non huatiroma. ⁷ Na torofohuunshon nan cuti huamisi ahuun mai non finon. Nanno yora futsafo non mai huanon, —icashu yoinannifo. ⁸ Ascasho nan mai anunifo —Imi maiiran, —huanifo. Natianri nannori yoiafo. ⁹⁻¹⁰ Ascano nan Diosin tsain yoimisi Jeremías inon pacoai cununi cuscan natian man nanscacoïn huaafo. Isca huaquin cununi,

“Israelifoan yoinifo, ‘Non treinta toro inantiro nan nocofunun noco achimashocun,’ ishon yoiafo. Nan torofohuunshon cuti huamisiton ahuun mai fiafo. Uhuun Ifoan ua yononi cuscan un cuti huamisiton ahuun mai fia. Nanscarifi aqui nanfoanrifi aton torofohuunshon cuti huamisiton ahuun mai fiforan,”

ishon Jeremías cununi.

Pilato ano Jesús iyonifo

Mr 15.2-5; Lc 23.3-5; Jn 18.33-38

¹¹ Ascashu Romanon niaifofaan ahuun anu Pilato fu Jesús nia ini. Nan niaifofaan Jesús yocani, —¿Minmun Judiofoan niaifocoin? —ishon yocaiton. —Nan min ua yoiai cuscafin unquin, —Jesús huani.

¹² Ascashon nocon yorafohuunshon Dios cufimisi niaifofa yafi Dios fu tsainti pushu niaifofaanri Jesús ahuaara chaca huamisiran huafiaifoannocai puusinima. ¹³ Ascaiton Pilato yoini, —¿Yorafoan

mia chaca huaifo cuscan min nicaimamun? ¿Min ato cumapaimamun? —ishon yoini. ¹⁴ Asca huafiaitocai Jesús cumanima. Tsain ichapa aqui chaca huafiaifoanricai fustishta ato cumanima. Ascaiton Pilaton ahuun nomuran shinanni, —¡Aira! ¿Ahuuscai ato cumapaimamun? —ishon shinanni.

Niaifoan ato yononi Jesús rutunonfo
Mr 15.6-20; Lc 23.13-25; Jn 18.38-19.16

¹⁵ Nan fusititian faritifi a cunu muran iquiafo fusti caimaquin Pilato ato yocapaoni. —¿Ratocai man caimapaimun? —ishon yorafo yocapaoni.

¹⁶ Nantianri cunu muran iquia nocofunu fasi pofu rutumitsamisi. Ahuun anu Barrabás ini. ¹⁷⁻¹⁸ Jesús ahua chaca huaiyamafiacun. A icai cuscan apaicaquin nocon niaifofu Jesusqui sinacaquin Pilato ano iyonifo. Nan acaifo cuscan Pilato man tapian ini. Ascacun Pilato nanno yora ichananfo yocani, —¿Ratocaimun un mato cainmashotioquin? ¿Barrabás iyamarai Jesús nan Cristo Diosin catoanran man huamisi? —ishon ato yocaiton. ¹⁹ Ato yocatan tsaoshon manani cumaifoan nicapaiquin. Ascaino ahuinin cunu fuma aqui noconi. Cunun yoiqui isca huani, —Nan nocofunu Jesús shara. Ahua chaca huamaquin. Ahuusca huayamahuu. Uhuun namapan un oian ahua chaca huayamafishu omitsiscaiton oin urifi uhuun nomuran ahunoashu un omitsiscacoinna. Ascacun ahuusca huayamahuu, —ishon Pilato ahuinin cunushoni.

²⁰ Ascafiacun nocon yorafohuunshon Dios cufimisi niaifofu yafi Dios fu tsainti pushu cushumisifoan nanno ichananfo ato yosiquin isca huanifo, —Jesús noco cainmashotamarocon

Barrabás noco cainmashohuun. Ascashon Jesús rutuhuu ishon Pilato yoicahuun, —ishon ato yononifo.

²¹ Ascacun Pilato ato yocani, —¿Nan rafu ratocaimun man fuchipaiquin un mato caimashonon? —ishon ato yocaiton. “Barrabasquian,” huaifoan. ²² —¿Un Barrabás caimashomun un Jesús nan Cristo Diosin catoan un ahusca huaicai? —ishon ato yocaiton. Afanan nantifiton yoinifo, —Mastahuun, nanon, —huaifoan.

²³ Ascaifoan Pilato ato cumani, —¿Ahuuscacufin? ¿Ahuamun chaca huaquin? —ishon ato yoiaiton. Ascacia fasi curushcain yoirianifo, —Mastahuun, nariscanon, —huanifo.

²⁴ Ascaiton Pilato oian tsoan nicapaitama fasirocon mucai finaifoan. Masu fitan aton ointaifi muchoquimuni. Muchoquimutan ato yoini, —¡Oincapon! Uhuun nuama. Un Jesús cainmapaifiainocai man cainmapaima. Manrocon fasi rutupai. Ascan matohuunfi nuuaquin, —ishon ato yoiaiton. ²⁵ Nantififain cumanifo, —Nanscanon. A nai nocohuun nuunonquin. Nocon facufohuunri nuunon, —ishon yoinifo.

²⁶ Ascaifoan nicaquin Pilato Barrabás ato cainmashoni. Ascashon ahuun ranushumuafo yononcun fichi cunoqui tuchiaton Jesús coshaqui futsanifo. Asca huashon mastanonfo iyonifo. ²⁷ Nan ranushumuafoan Jesús iyoafo anofin niaifoan ahuun pushu iniquin. Ascano nan niaifo cushmanisifoan ranushumuafo chifinoafo cunani Jesús oin funonfo. ²⁸ Ascashon ahuun sahuuti shorifain futsa shonan sahumanifo. ²⁹ Ascatan

mosha chainipafo maiti huashon maimafain poquiti ahuun mumihuuri tsoamashon ratocounun mai chachishon yoinifo, —¡Aicho! Minfin Judiofoan aton niaifoquin, —ishon cashu mutsama huanifo. ³⁰ Ascashon aqui cumo michofain ahuun poquiti fiantan ahuun coshapaacunifo. ³¹ Ascashofin cashu mutsama huacatan nan sahuuti shonan pucashon ahuun sahuuticoin afanan sahumanifo. Asca huatan mastai fo-caquin iyonifo.

Jesús ihui coyan iquinanqui mastanifo

Mr 15.21-32; Lc 23.26-43; Jn 19.17-27

³² Focani nan nocofunu Simonqui noconifo. Nan Simonfin Cirene anoashu cainniquin. Ascan nan ranushumaton yononi. —Ihui coyan iquinan noco foshoicahuun, —ishon iyamafainifo. ³³ Gólgota ano fonifo. Gólgota yoia mapo shao. ³⁴ Nanno nococashon Jesús fimi unu pau tashipia osia ayamapaiyaifoan muutacai Jesús apainima. ³⁵ Asca huatan Jesús iyocashon mastanifo. Mastacatan ahuun sahuuti fianpacunifo. Toquiri tocoro rafuya cashuqui nan finonmanaton ahuun sahuuti fiqui tau huani. Ascashon cuyonfianifo. ³⁶ Asca huatan tsaocashon a Jesús mastafa foisnifo.

³⁷ Ascano man ihui coyan iquinanqui mastacashon amanaonri cununifo isca huaquin,

NAN JESUSFIN ISRAELIFOAN ATON

NIAIFOCINQUIN

ishon cununifo. Nannori Jesús icaran ishon mastanifo. ³⁸ Ascashon yomutso rafuri mastanifo. Ocuma futsa futsafain ocuma futsa futsa anifo.

³⁹⁻⁴⁰ Ascashon camacaquin isca huanifo, —¡Cuu!

Minfin yoimisiquin nocon Dios fu tsainti pushu min choquiacaí. Ascatan osha rafu non fustitan min afanan futsa huairan min imisi. Mifin numatan ihui coyán iquinanmaquinoashu fotohuu. Min Diospan facumainquin, —ishon roanifo.

⁴¹ Nannori nocon yorafohuunshon Dios cumifisi niaiffofo yafi Dios fu tsainti pushu cushumisifo futan Moisés cununi cuscan tapimamisi-foan Jesusqui cashumutsamanifo. ⁴² Ascashon yoinifo, —Nanton futsafo numafiatiroshaquin aficai numatiroma. Ascan minmain Israeliffoan aton niaiffoquin ihui coyán iquinanmaquinoashu fotohuu. Min ascaiton oinquifin non mia icoinra huaicain, —ishon roanifo. ⁴³ Ascasho niaiffofoan nanno niafo ato yoinifo isca huaquin, —Jesús noco yoimisi, “Unfin Diospan facuqui,” ishon noco yoimisi. Nantofin Dios icoinra huamisiquin. Ascan Upa Diosin a fuchipaiquifin numatiroquin, —ishon aquí tsain chaca huanifo. ⁴⁴ Ascano afu masta rafutan aquí tsain chaca huacaquin roanifo.

Jesús nani cuscan

Mr 15.33-41; Lc 23.44-49; Jn 19.28-30

⁴⁵ Ascano fari masafinin racafishu nan maitio faquishpacucahuani. Ascashu man fari caino afanan shafani. ⁴⁶ Ascaino nantianri Jesús fasi oi ashcafinin apa cunani, —¿Elí, Elí lema sabactani? —nan yoipai, —¿Uhuun Diosin, Uhuun Diosin, ahuuscai mian potamun? —huani.

⁴⁷ Jesús ascaiton yorafoan mapo cashon nicaquin yoinifo, —Nicacapon. Elías cunaiton, —huanifo. ⁴⁸ Ascaino futsa ichoni fimi unu fochash muran mishan nanupacufoantan faca tahua shatun mishan tunhuuiniffoan Jesús inanpaiquin.

⁴⁹ Inanpaiyaiton atirifoan yoinifo, —Unuhuu. Elías oshomain fotomaicai non oinon, —huanifo.

⁵⁰ Ascano Jesús fasi fiisinacahuani. Fiisinacahuatan naani.

⁵¹ Ascashu Jesús natapaiyaino a Judiofoan Dios fu tsainti pushu murannoa pano puta pochimua aficoín fashnupacucahuani. Nanscatapaiyaino mai nayanaiyainquin. Toquirininhuanfo torufafaini. ⁵²⁻⁵³ Ascaino nan Diospan yorafo naacun mahua quini muran mai huanifo. Nan toquirinin huafo fupucui futsuaino Diosin afanan ato nimani. Ascashu Jesús funiaitian nanfori nan mahua quini murannoashu Jerusalén muran iquinifo. Ascaiton nanao yora ichapafoan oinnifo.

⁵⁴ Ascaino ranushumua niaifo yafi a futan Jesús cushuafoan mai naiyanaiyaicaino ahuara futsafori ahuascaraiton oincani fasi ratucoincaquin yoinifo, —Iconfinquin. Nanfin Diospan facuquin, —ishon yoinifo.

⁵⁵⁻⁵⁶ Ascaiton nannoshon ainfo ichapafoan chaicushon oinnifo. Nan María Magdalena non María futsa nan Santiago futan José ahua non Zebedeo facufoan aton ahuari. Nantifi nan ainfofo Galilea anoashu Jesús fu foanfainmisifoan nan apaiyaifo cuscan ato huashomisifo.

Jesús mai huani

Mr 15.42-47; Lc 23.50-56; Jn 19.38-42

⁵⁷ Ascatan man fari caino nocofunu ahuashta yopatanaima ahuun anu José nan Arimatea anoashu cainni. Nantorifi Jesús tanamisi sharacoin ini. ⁵⁸ Nan José niaifo Pilato ano cashon yoiquin isca huani, —Niaifon, un Jesús

toquirininhuan quini muran mai huapai. Un mia yocayoaran, –ishon yoini. Ascaiton, – Jesús ahuun caya José inancahuun, –ishon Pilato yononi. ⁵⁹ Ascaiton José Jesús ahuun caya pano oshopa sharacoinchi raconi. ⁶⁰ Racoshon toquirininhuan quini muran Jesús mai huani. A murancai tsoa maiyomisima muran mai huani. Ascashon toquirininhuanun fupofaini cani. ⁶¹ Nannoshori María Magdalena futan María futsan tsaoshon oinnifo.

Ranushumuafoan nan mahua quini ano cushunifo

⁶² Iyoconaino tunutitian yorafohuunshon Dios cufimisi niaiffo yafi Farisefo Pilatoqui fonifo. ⁶³ Focashon yoinifo, –Niashu nan Jesús chanishunin yoimisi, “Un naashu osha rafu non fustitan un afanan funitiroran,” imisi. ⁶⁴ Ascacun min ranushumuafo a maia toquirininhuan quini ano ato nichihuun cushunonfo. Min asca huaiyamaitofin afu rafuafoan ahuun caya onui futirofoquin. “Man funiaran,” icashu chanishcaquin. Jesús chani tauyomisi. Ascan chipocai fin fasi chani finacointirofoquin, –huaifoan. ⁶⁵ Pilato ato yoini, –Manfin mato Dios fu tsainti pushu murannoa maton ranushumuafo a toquirininhuan quini ano ato nichicahuun cushutanonfo, –ishon ato yoini. ⁶⁶ Ascaiton a toquirininhuan quini ano ranushumuafo nichinifo. Nanfoan toquirininhuan sapa tocoro fuposhon ahuara tuipaton tanyacunifo. Ranushumuafo nanno nichifurani funifo nannoshon cushunonfo.

28

Jesús funini cuscan

Mr 16.1-8; Lc 24.1-12; Jn 20.1-10

¹ Ascano Israelifoan noco tunutitian nan Domingo anaitia iyoconaino nan maia ano oin focani fonifo. ² Ascaino nantianri mai fasi curushcain nayanaiyaicaino nocon Ifo Diosin ahuun oinmati afu icafo nai ariashu fotoní. Fototan toquirininhuan fuputan acamaqui tsaoni. ³ Ascaino ahuun fuso fasi chashacoinni. Naan canan facaica ointsa. Ahuun sahuutiri fasi oshopa yoa rama furoa ointsa. ⁴ Ascaiton oincani ranushumuafu fasi ratui tari taricani aton ratupasi nayonifo. Nan naa shinantsa anifo.

⁵⁻⁶ Ascaiton Diospan oinmatinin afu nai muran icaton María rafu yoini, –Ratuyamacahuun. Mun tapia man Jesús funai yoa. Jesús man mastafiaitafo natian nunoma. Mato yoimisi cuscan man funia. Oin fucapon quini muran. Nan racaitano. ⁷ Ascashon afu rafuafo ato yoiriscatacahuun, “Jesús naafiaitashaqui man funiaquin. Galilea ano cai tauicai anoshon mato manashqui. Nannoshon man ointiro.” Un mato yoiái cuscan ato yoiriscatacahuun, –ishon Diosin nai oinmatinin ainfo rafu yoini.

⁸ Ascaiton nicatan nan ainfo rafu toquirininhuan quini anoashu ichonifo. Ratufiacani aton nomuran fasi unimacoincaquin afu rafuafo yoi focani ichonifo. ⁹ Ichoaifoanno Jesús atoqui niriscatani. Ascashon, –Mun moyaran, –ishon ato yoini. Ascaiton nan ainfo rafutan taicopacufuantan, –Min nocon Iforan –huaifoan. ¹⁰ –Ratuyamacahuun. Ascatarocon uhuun

ushtofu ua yoishotacahuun Galilea ano fononfo. Nannoshon ua oinshcaquin, –ishon ato Jesús yoini.

Ranushumuafoan yorafo chani huani cuscan

¹¹ Ascatan ainfofo Jesús anoashu foaifoanno ranushumuafori yorafohuunshon Dios cufimisi niaifofoqui nan oianfo cuscan atoqui chaninifo.

¹² Ascaiton nicacani niaifofo ichanancashon shinnannifo, –Nonmun ahuusca huaicai, –ishon. Ascashon ranushumuafo yoinifo, –Non mato yoiai cuscan nannoricoinrifi futsafo yoicahuun non mato pui ichapa inanon.

¹³ Ascacun ato yoiqui isca huatacahuun, “Jesús fu rafumisifoan non oshano fucashon Jesús ahuun caya man onuaforan,” ato huatacahuun.

¹⁴ Ascaiton niaifocoinin nicaquin Jesús ahuun caya anoma nica raquirira icaiton non yoisharaicanon mato ahuusca huanonma, –ishon niaifofoan ranushumuafo yoinifo. ¹⁵ Ascashon ato pui inanfoanno fucashon nan niaifofoan ato yoiafo cuscan nannoricoin ato yoinifo. Ascaiton nan maifoti anoafu futan Israelifoan nicanifo. Ascano nantian icoinra huanifo ranushumuafoan ato yoiaifo cuscan nicaquin.

Jesús ahuun unutaqui a rafuafo yononi cuscan

Mr 16.14-18; Lc 24.36-49; Jn 20.19-23

¹⁶ Ascashu non afu rafuafo once nan Jesús noco yoia cuscan machi Galilea ano non cani. ¹⁷ Ascashon oinquin non yoini, –¡Aicho!

Min nocon Ifo Jesús. Non mia fasi noiran, –ishon non yoini. Ascfiaitocai futsafoan icoinra huacuanima. ¹⁸ Ascano nocoqui

chaimashta oshon noco yoini, –Uhuun Upa ua yonoa nantifi nai ariafo yafi mai anoafori un yononon. ¹⁹ Ascacun manifoti anoafo yoifoanfafaitacahuun ua icoinra huafain ua tanasharanonfo. Uhuun Upa Diosin ahuun anuhuunshon yafi uhuun anuhuunshon non Diospan Yoshin Sharahuunshonri yorafo unu muran iquimashcaquin. ²⁰ Ascashon nantifi un mato yonoa cuscan huafain yorafori yosicahuun icoinra huafain ua nicasharanonfo. Unfin matofu iquicai. Ascashu nan un afanan oaitian un mato furi ipanacaran, –ishon noco Jesús yoini. Nanti.

Diospan Tsain
New Testament in Sharanahua (PE:mcd:Sharanahua)

copyright © 2008 Wycliffe Bible Translators, Inc.

Language: Sharanahua

Translation by: Wycliffe Bible Translators, Inc.

Sharanahua [mcd], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Sharanahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

8402923d-fd05-5a85-a7ae-203f04ecb375